

# WANTOK

**Great Quality**  
**Affordable Price**

Namba 1708  
Wan Wik, April 19 - 25, 2007

Niuspepa Bilong Yumi Ol PNG

K1 tasol  
long olgeta hap.



Soka bilong edukesen na develop

SAPOT: Ol bikman bilong Osenia Futbol Konfederesen (OFC), Embeseda bilong Frans (France) Patrick Boursin na sampela ol pilaia bilong wan wan kantri husat i kamap long Soka yut festival long Mosbi long Trinde dispela wik. Frans gavman i sainim tok orait long givim (Yuro) #6, 000 long dispela tonamen olgeta yia insait long PNG.

POTO: Andrew Molen.

## Gavman strongim Lo na Jastis

Neville Choi i raitim

STAT long Janueri 1, 2008  
Dipatmen bilong Jastis na Atoni  
Jeneral bai bruk i go kamap tupela  
opis.

Em nau bai Dipatmen bilong Jastis  
i stap aninit long lukaut bilong  
Seketari bilong Jastis we ol bai givim  
ol jastis sevis na polisi stia long gav-  
man; na narapela bai nupela  
Gavman Lo Opis we Atoni Jeneral  
yet bai lukautim. Dispela opis bai luk-  
luk long givim gutpela kwolati lo  
sevis i go long Nesenel Eksekutyutiv  
Kaunsel na gavman aninit long Atoni  
Jeneral, Stet Solisita na Solisita  
Jeneral.

Tupela dipatmen wantaim bai stap  
yet aninit long lukaut bilong Minista  
bilong Jastis.

Dispela bikpela senis wantaim ol

arapela we bai lukluk long strongim  
ol kot na wok jastis bilong kantri i  
stap insait long wanpela polisi wait-  
pepa gavman bai autim tude.

Namel long ol arapela senis i stap  
insait long dispela wait pepa em  
senis insait long Nesenel Judisal  
Sistem straksa we bai lukim sanapim  
bilong wanpela Suprim Kot we ol  
namba wan jas bilong yumi bai wok  
ful taim long en; Sanapim bilong  
wanpela intamidiet apils kot we ol i  
ken harim ol apil agensim Nesenel  
Kot bipo long kot i go antap long  
Suprim Kot; Rausim bilong 10-pela  
krismas bilong ol as ples Jas.

Dispela bai lukim ol as ples jas  
bilong yumi i holim opis bilong ol inap  
ol i no inap mekim wok bilong ol  
moa.

**Moa long pes 2**

## Nupela polisi bai brukim Jastis na Atoni Jeneral Dipatmen i go tupela

Lukim bikpela  
toksave long  
Bank of  
Papua New  
Guinea long  
Nupela K2 na  
rausim bilong  
olpela K1 -  
Pes 14 na 15

## PNG Jenerel Ileksen 2007

**YU GAT...**

**71**

De i stap bipo  
yu vot!

**YU REDI PINIS?**



Promotim Seif na Strongpela Sosaiti bilong yumi olgeta!



**Brian Bell** & Co. Limited  
*Shop with a friend*

**SPORTS**

HOME CENTRE CITY, GORDONS 325 8469  
PLAZA, BOROKO 325 5411  
KOKOPO 982 9027  
MT HAGEN 542 1999  
MADANG 852 1899  
GOROKA 732 1622  
LAE HOMECENTRE CITY 472 3200

**FOR THE LARGEST RANGE OF GENUINE BRAND SPORTING EQUIPMENT IN PAPUA NEW GUINEA.**





"Yumi mas bihainim pasin bilong Kraus na karim pen."

Kraus i bin hangamap long diwai kros na i karim sin bilong yumi long bodi bilong em yet. Em i mekim olsem bai yumi ken lusim pasin bilong sin olgeta na yumi i ken stap laip na bihainim ol pasin i stret olgeta. Ol i bin paitim em nogut na long dispela pen em i karim em i makim yupela i kamap orait gen. Yupela olgeta i bin i stap olsem ol sipsip i raun nabaut. Tasol nau yupela i kam bek pinis long dispela Wasman Bilong Sipsip i save lukautim gut spirit bilong yupela.

1 Pita 2: 24-25

## Gavman strongim Lo na Jastis

I kam long pes 1.

Long wankain taim bai makim bilong ol jas bilong ausait we bipo i nap long tripela yia, bai go antap long 6-pela yia.

Ligel Trening Institut, em skul bilong ol loya man, nau bai mas givim trening bilong ol Jas na Majistret tu. Nau yet em i save skulim ol nupela loya tasol.

Mak bilong strong bilong ol Distrik Kot bai go antap long daunim hevi long Nesenel Kot. Ol pe bilong ol majistret bai kisim glasim na bai ol i givim malolo mani bilong ol majistret i lusim wok pinis na bikpela wok trening bai stap long opim save na strong bilong ol majistret long distrik level.

Tasol bikpela senis insait long dispela wait pepa bai lukluk long ol viles kot opisa. Gavman bai lukluk long wanpela rot we ol i ken peim ol viles kot majistret na opisa. Bai ol i ken kisim inap trening tu bai ol i ken mekim gut wok bilong ol.

Long frod o giaman pasin na korapsen, Lo na Jastis sekta bai go pas long strongim mak bilong ol long painim na sasim husat wokmanmeri insait long ol gavman opis i mekim ol dispela paul pasin.

Wanpela bikpela wok glasim nau i kamap long Kriminel Koud na ol lo bilong en. Wanpela tas fos i sanap pinis we planti ol olupela lo bilong bipo bai ol i rausim na ol liklik rong bai nogat moa mekimsave bilong ol.

Dispela wait pepa i tok tu olsem ol lo bilong makim mekimsave, beil na ol lo bilong probesen na parol i mas senis.

I gat ol arapela senis tu we dispela waitpepa i tokaut long en. Deputi Praim Minista Don Polye bai makim Praim Minista Sir Michael Somare long lon-sim dispela waitpepa tude long Nesenel Palamen.

## Senisim NCDC Ekt i stap long han bilong Gavana

ROT bilong senisim nau Nesenel Kapitel Distrik Komisen Ekt we i givim olgeta pawa long gavana long ronim Komisen i stap long han bilong em.

Na gavana yet sapos em i gat wok o tok long senisim bai em i mekim, sapos nogat bai i nogat.

Dispela em bekim bilong Praim Minista Gren Sief Sir Michael Somare taim em i bekim askim bilong Memba bilong Mosbi Not Wes Rait Honorabel Sir Mekere Morauta long askim bilong em sapos Palamen inap long senisim dispela Ekt.

Sir Mekere Morauta i askim sapos Palamen i ken vot long senisim dispela Ekt we nau i mekim Gavana i mekim wok long tingting bilong em yet na dispela i opim rot long paul pasin long kamap isi.

Sir Mekere i tok i gat ol nius na toktok i kamap long pepa we i tok Sir Michael na Kabinet bilong em i tingting long rausim gen dispela Ekt tasol nau yet i nogat wanpela samting i kamap na em i laik wanem taim tru dispela wok bai kamap long rausim dispela Ekt.

Tasol long bekim Praim Minista i tok dispela Ekt em i Praivet Memba legislesen (lo) na olsem em o Palamen i nogat pawa long senisim.

- Paul Zuvani i raitim

# K100m gavman skul fi sabsidi go aut pinis

Paul Zuvani i raitim

GAVMAN i givim aut pinis dispela K100 milien skul fi sabsidi promis em i mekim long namel bilong dispela yia.

Na em i wok bilong Bod bilong wan wan ol skul long skelim sapos ol bai yusim dispela mani long dispela yia o long narapela yia, Edukesen Minista Honorabel Michael Laimo MP i tok.

Dispela K100 milien i go antap long K43 milien mani em Gavman i givim pinis long baset bilong em long dispela yia.

"Skul fi sabsidi mani em i go pinis na dispela K100 milien bai bihainim dispela wankain rot na Memba i mas sekim (dispela mani) long Distrik Edukesen Atoriti long Ilektoret bilong em," Mista Laimo i tok. "Dispela em (K100m) i go antap long pastaim K43 milien em gavman i givim long skul sabsidi."

Laimo i mekim dispela toktok bihainim askim bilong Memba bilong Ambunti/Drekikir long save sapos gavman i givim pinis dispela K100 milien long ol skul pinis o nogat.

"Long tu wik i go pinis mi mekim wanpela wokabout long Ilektoret bilong mi we ol papamama wantaim ol hetmasta i tok amamas long dispela gavman, moa yet long Praim Minista long givim dispela K100 milien skul fi sabsidi." Mista Aimo i tok. "Dispela em i no fri eduksen."

"Dispela i min olsem gavman bai baim 80 pesen bilong fi na ol papamama bai baim 20 pesen fi," em i tok.

"Tasol ol skul i statim pinis namba tu tem na ol manmeri i wok long askim long we stap dispela K100 milien."

"Mani i stap pinis long Nesenel Edukesen Dipatmen na i go long ol provins o nogat?"

"Na taim gavman i baim dispela K100 milien bai skul i bekim mani bilong ol o nogat?"

Em i tok bikos long presa sampela ol papamama i baim pinis ful skul em ol skul i askim long ol.

Tasol Laimo i no bekim gut dispela askim na olsem planti ol arapela Memba olsem Memba bilong Sohe Honorabel Peter Oresi i askim Memba long bekim gut.

Tasol Spika Jeffery Nape i singaut long Oda na tokim Mista Oresi olsem Minista i bekim pinis dispela askim na olsem Memba i mas sekim dispela mani long sistem bilong Edukesen long Ilektoret bilong em.

Nau yet *Wantok Niuspepa* i no inap long kisim tok klia long Edukesen Dipatmen sapos em i kisim pinis dispela mani o nogat bipo long em i go long prin.

## Hevi stap wantaim ol Memba bilong Palamen

HEVI i stap long han bilong ol Memba long i no kamap long sapatim ol Bil bilong Palamen long mekim ol i kamap lo na dispela i pulim bek sampela wok bilong Palamen.

Praim Minista Gren Sief Sir Michael Somare i mekim dispela toktok taim em i bekim askim bilong Morobe Gavana Luther Wenge sapos Gavman bai surukim taim bilong Jenerel Ilekten long Julai i go bihain long sampela taim.

Gavana Wenge i mekim dispela askim wantaim askim bilong taim we Ilekorel Komisen bai givim aut ol Rits bilong-kempen.

Dispela em bihain long ol toktok we i kam long sampela ol Memba na ol nius i kamap long dispela wik i tok long ol pipel bilong Hela long Sauten Hailans Provins bai i no inap long vot bikos ol i laikim provins bilong ol yet na i no laik vot aninit long Sauten Hailans Provins we ol i stap insait long em nau.

Long bekim askim bilong Honorabel Wenge Sir Michael Somare i tok hevi i stap long han bilong ol Memba moa yet long

ol Memba bilong Sauten Hailans long i no kamap na i givim sapatim long gavman long vot na surukim taim bilong Stet ov Imejensi long Sauten Hailans inap long bihain taim bilong Jenerel Ilekten.

Dispela i lukim provins nau i stap fri na i givim taim long ol long kamap wantaim ol tingting bilong ol yet we wanpela bilong ol em long i no abrusim wok bilong vot bikos ol i laikim gavman i mas bekim gut askim bilong ol.

Tasol Praim Minista i no inap long bekim gut askim bilong Mista Wenge sapos gavman bai pulim de bilong Jenerel Ilekten i go bek.

Na long askim long taim bilong Ilekorel Komisen i givim aut ol Rits Sir Michael i tok dispela i stap long han bilong Komisen.

Em i tok long save bilong de bilong givim aut ol Rits dispela bai kamap long namba 4 de bilong mun Me, 2007.

- Paul Zuvani i raitim

## Mosbi redi long diwai bung

Noreen Dada i raitim

MOSBI na tu Papua Niugini (PNG) i redi nau long holim namba 42 sesen bilong Intanesenel Tropikel Diwai Kaunsel we bai ron klostu wanpela wik olgeta.

PNG i olupela memba bilong Intanesenel Tropikel Diwai Kaunsel (ITTC) we long 20-pela yia em stap olsem memba i bin traim planti taim long holim dispela bung insait kantri.

Nau kam namba 7 de long mun Me i go 12 Me 2007, ol patipisen long ol arapela kantri husat save salim na wokim tred long ol tropikel diwai bai kam long PNG na lukim ol yet ol ples ol save baim ol tropikel diwai.

Namel long lukim ol ples ol patipisen long Latin Amerika, Esia na Yurop bai paitim tok wantaim ol grup makim PNG long glasim wok kamap na ol hevi bik bus sekta i gat long nau taim long salim ol tropikel diwai na tu long sait bilong envaironmen.

Long Tunde dispela wik, Dairekta bilong Polisi divisen long Papua Niugini Bikbus Atoriti (PNGFA) na man husat i go pas long stretim wok long



• Mista Kari. Foto: NOREEN DADA

holim bung, Dike Kari i tok wok i ron gut na ol komiti i lukluk long mekim dispela bung win stori.

"Grup we i makim PNG long dispela bung em Seketeri bilong Foren Afes na Tred o Seketeri bilong Envaironmen na Konsavesen bai go pas long em.

Ol arapela opisa insait long PNG grup bai ol teknikel opisa bilong PNGFA na ol arapela insait long diwai indastri.

Dispela bung em sans long olgeta luksave long husat

insait long wol i tred, baim na yusim ol tropikel diwai na em bai bikpela bung tru wan kain olsem Afrika, Keribien Pasifik Yuropien Yunien (ACPEU) bung we i bin kamap las yia.

Long nau taim olgeta komiti na lain husat i wok hat long ronim dispela ITTC bung i wok gut na mi amamas wantaim wanem wok yumi wokim inap nau. Long wankain taim, ol Non Gavman Ogenaisesen (NGO) husat i gat sampela hevi long we bikbus indastri i wok long karim aut wok insait long kantri bai i gat sans long

autim bel hevi bilong ol insait dispela bung.

Sapos ol NGO i gat sampela wari o hevi ol gat wantaim indastri, mi strongim ol long rejistram laik bilong ol long toktok insait dispela bung wantaim mi bikos ol straik o protes mas bai i no inap kisim bekim o luksave ol painim.

Salim ol petisen o bel hevi kam long mi we mi bai surukim go long siaman bilong ITTC we ol bai lukim petisen o pepa bilong ol stap insait long bung long mipela paitim tok long en," Mista Kari i tok.

Namel long ron bilong ITTC bung ol patipisen bai go long Is Nu Briten, Westen Provins, Moroba na Westen Hailans Provins long lukim ol agrikalarek projek na ol ples ol diwai kampani i stap long en long katim ol tropikel diwai.

Wanpela NGO midia oge-naisesen husat i stap long Kanada, Earth Negotiating Bulletin bai kam long kantri tu long kisim nius olgeta de long dispela wanpela wik bung bai ron.

Long wankain taim, Mista Kari i singaut go long olgeta man meri long Mosbi long givim helpim bilong ol long sait bilong lukautim sili na putim pipia i go long rait ples.



# OI LLG ileksen bai kamap long Ogas

ILEKSEN taim bilong makim ol Lokel Level Gavman (LLG) bai no inap kamap long wankain taim olsem nesanel jeneral ileksen.

Olgeta LLG ileksen bai kamap nau long mun Ogas.

Ilektorel Komisina Andrew Trawen i bin tokaut long dispela senis taim em i givim bikpela toktok bilong pasim wanpela woksop bilong olgeta ileksen menesa we i bin kamap long Wewak, Is Sepik Provins long wik i go pinis.

Em i tok sapos komisina i bin go het na karimaut LLG ileksen wantaim nesanel jeneral ileksen, hevi bilong sekyuriti bai bikpela moa, na tu i gat rot we ol pipel i ken paul liklik bikos em bai namba wan taim mipela bai yusim Preferensel Limitet Voting sistem.

Mista Trawen i tok brukim bilong dispela tupela ileksen bai dia moa, tasol i mobeta long mekim gut jeneral ileksen, olsem na i gutpela i gat tupela ileksen i kamap.

Em i makim de na taim bilong ol LLG ileksen olsem:

Opim ol Rit Pepa -	Ogas 9, 2007;
Nominesen i pas -	Ogas 15, 2007;
Taim bilong vot i op-	Septemba 8, 2007;
Taim bilong vot i pas-	Oktoba 28, 2007;
Pasim ol Rit Pepa-	Oktoba 30, 2007.

Dispela woksop i bin tokaut tu olsem olgeta 2007

ilektorel rol wok i pinis na olgeta provins i salim ol namba bilong ol i kam long Mosbi bilong stretim na redi long ileksen.

Ol dispela provins i pinisim olgeta wok sekim bilong ol em Is na Wes Nu Briten, Manus, Nu Ailan, Noten, Morobe, Madang, Simbu, Nesanel Kapitel Distrik (NCD), Enga, Milen Be na Wes Sepik.

Bai gat moa long 3 millien manmeri i vot insait long nesanel ileksen bilong dispela yia.

Dispela woksop i givim luksave long olgeta ileksen menesa insait long kantri long pinisim olgeta wok redi bilong ol insait long tupela yia tasol.

Long sait bilong mani, olgeta provins bai kisim ol mani waren bilong ol bai ol ileksen menesa i ken redi gut wantaim ol kaikai na sevis bilong mekim wok ileksen.

Olgeta menesa na ol akaunten bilong ol i pinisim wanpela wok mani kos long skelim gut ol ileksen mani.

Ol ileksen menesa yet i tok tenkyu na givim luksave long ilektorel Komisina Andrew Trawen long gutpela wok bilong em long redim 2007 jeneral ileksen.

Long wankain taim, woksop bilong ol ileksen opisa na polis i bin kamap gut na i nogat planti wari i stap long sait bilong wok bung na sekyuriti bilong ileksen.

# Bogenvil na PNG bai painim kain man olsem

..Tsiamalili, saveman husat save wok hat



•Ol soldia bilong PNG Difens Fos i karim bodi bilong leit Tsiamalili kam daun long balus long Jacksons Ples Balus, long Mosbi. **Poto: NICKY BERNARD**

### Veronica Hatutasi i raitim

BOGENVIL na pipel bilong em i stap long bikpela sori long lusim Administreta Peter Tsiamalili husat i bin dai long las wiken Sande long ples bilong em Amun long we kos Bogenvil.

Taim planti i sori long dai bilong bikman, ol i wari long husat tru bai kisim ples bilong em na go pas long ol wok em i kirapim long kisim Otonomes Bogenvil administresen na pablik semis masin i go fowet.

Helt na Bogenvil Afeas Minista, Sir Peter Barter i wanpela man i save gut

*"Maski em i go we, em i holim bikpela wok, em i no lusim tingting long ples na pipel bilong em."*  
- Sir Peter Barter.

Bogenvil Administresen na pablik sevis na putim ol mansave long ol posisen na lukim olsem ol wokman i mekim gut wok bihainim taim i kamapim ol gutpela kaikai.

"Kaikai bilong lidasip bilong em, strongim ol arapela long wok n ol hatwok em bin putim i stap ples klia long ol plen, ol polisi, ol lo, ol senis long administresen na prektikel restoren wok na ol developmen semis long Bogenvil. Na tu, long kamapim gut ol wok kondisen bilong ol opisa long hap.

"Bikpela samting em ol gutpela samting na wok kamap long ol plen, polisi em yet i kamapim i wok long kamapim ol gutpela senis long graun.

"Maski em i go we, em i holim bikpela wok, em i no lusim tingting long ples na pipel bilong em. Em i bin gat bikpela intres long Bogenvil na PNG.

"Bogenvil na PNG i lusim gutpela man bilong hatwok husat i wok inap em i lukim kaikai i kamap, i gat bikpela save na eksperiens na an husat i wok long PNG na ovasis i no save lusim tingting long ruts, famili na ples we em bin dai long en.

"Famili bilong em i lusim wanpela gutpela papa, pikinini na wanpisan. Na ol Torokina pipel i lusim man we i stap olsem "link" o bris na kontributa long gutpela na bihain taim bilong Bogenvil na PNG wantaim," Sir Peter i tok.

Bodi bilong leit Tsiamalili bai go long Bogenvil tumora apinun bihain long funerel sevis long Sen Joseph's Katolik Sios tumora moning yet.

## Planti no save kisim nius

PLANTI manmeri insait long Papua Niugini (PNG) no save kisim gutpela nius sevis long midia o ol nius ogenaisesen. Na bikpela namba bilong ol dispela lain em ol meri na mangi.

Dispela i kamap long ripot bilong Midia Kaunsel bilong PNG bihain long wanpela wok painim aut o seve bilong ol long hamas manmeri insait long PNG save kisim nius na infomesen sevis.

"I gat bikpela namba tru bilong ol manmeri stap husat i no save kisim sevis bilong midia na planti bilong ol em ol meri," teknikel advaisa bilong "Media Development Initiative" (MDI) na man husat i go pas long dispela seve, Dokta Richard Pearse i tok.

Em i tok ol mekim wok painim aut long lukim wanem kain rot bilong kisim nius i go long ol

manmeri olsem redio, niuspepa na TV em planti save yusim.

"Mipela i painim olsem bikpela namba bilong ol manmeri save yusim redio, namba tu em niuspepa na namba tri em TV," Dokta Pearse i tok.

Long dispela projek ol toktok wantaim 3600 manmeri insait long kantri.

-Andrew Molen i raitim

## Blek Jisas kisim sas na wetim kot tumora

### Veronica Hatutasi i raitim

STEVEN Tari o man we planti i kolim em "Blek Jisas" em polis long Madang Provins i sasim em long 7-pela taim em bin wokim pasin nogut long ol meri.

Em bai kisim sas tu long kiklim dai tripela yangpela meri.

Madang polis i bin kisim ol ripot long 5-pela yangpela meri na Tari wantaim na ol i sasim em.

Bos bilong Madang polis, Tony Wagambie Junia i tok ol sas i bilong rong em bin mekim namel long Jun 2005 na Me 2006. Ples

we ol dispela samting i bin kamap em long Matepi, Gunari, Gal na Siraul long Trensogogol eria, not kos Madang. Na krismas bilong ol meri i stap namel long 16 na 18 yias.

Mista Wagambie Junia i tok bai i gat moa meri i givim ripot na Tari bai kisim moa sas yet long wokim pasin nogut long ol yangpela meri.

Em i tok ol bai sasim sapek long dai bilong tripela meri. Mista Wagambie Junia i givim nem bilong dispela tripela dai meri olsem Rita Herman, Sialas Jim

na Evenick Erick.

Em i tok polis i wok long kisim moa ripot yet long ol birua na rong Tari i bin mekim long Ples Gal na Matepi namel long yia 2005 na 2006 na sasim em.


Tari i sapos long kamap long kot long Madang long dispela wik Mande tasol jas i no kamap na ol i surikim i go long tumora.

Dispela em long kot i harim 7-pela sas long em i wokim pasin nogut long ol meri long en.

Tari i stap long Beon Haus kalabus long Madang na wetim kot i stap.

## HYDRAULIC & GARAGE JACKS

We stock wide range of high quality hydraulic and floor jacks and stands for light to heavy duty applications.




Hydraulic Jacks



Stands

Floor Jacks



Light weight aluminium

**BISHOP BROTHERS**  
everything for industry  
www.bishopbros.com.pg

| PORT MORESBY | LAE | PORGERA | MT HAGEN | MADANG | KIMBE | RABAU | VANIMO | HONIARA



# Bogenvil i lusim wanpela top wokman


BOGENVIL i stap long bikpela sori taim em i lusim wanpela top pikinini bilong em long wiken.

Administreta Peter Tsiamalili husat i gat 54 krismas i bin dai long slip long ples bilong em long Amun long Torokina, wes kos Bogenvil, long Sande morning Epril 15.

Leit Tsiamalili i bin wok planti yia wantaim gavman bilong Papua Niugini (PNG) na Bogenvil, stat yet bipo long Bogenvil hevi i kamap.

Emi bin wok olsem Administretiv Seketeri long gavman bilong Primia Joseph Kabui pastaim long pait long Bogenvil.

Mista Tsiamalili i bin lusim bikpela wok bilong em long Mosbi na go long bek long Bogenvil long helpim pipel bilong em long redi long kamapim Otonomes Bogenvil gavman long 2005.



LEIT PETER TSIAMALILI: Bogenvil sori long lusim em.

Em i dai lusim 4-pela pikinini bilong em.

Presiden bilong Otonomes Bogenvil gavman, Joseph

Kabui, i tokim Wantok Niuspepa olsem em bai hat tru long senisim Mista Tsiamalili husat i gat bikpela ekspiriens

long wok bilong em.

Em i tok Otonomes Gavman bai i painim em tru long ol gutpela wok em i redim pinis bilong kirapim bek Bogenvil.

Rijinel Mamba bilong Bogenvil, Leo Hannett i salim pinis tok sori bilong em i go famili bilong leit Mista Tsiamalili na olgeta pipel bilong Bogenvil.

Emi tok Mista Tsiamalili i bin wanpela hat wok man wantaim bikpela save long wok adminstresen na pablik sevis na bai em i hat tru long painim kain ekspiriens man olsem.

Mista Hannett i tok olsem em i sori tru long lukim planti save manmeri bilong Bogenvil i wok long pinis isi olsem.

Em i tok Bogenvil i laikim tru ol save man/meri bilong em long wok bung wantaim na kirapim bek Bogenvil.

# Makim rait man bai bringim sevis

Pila Wasu i raitim

Praim Minista na Gren Sief, Sir Michael Somare i singaut long ol pipel bilong Wes Nu Briten Provins long sapotim ol kendidet i sanap long pati bilong em na gavman i ken go bek na pinisim ol wok em i no pinisim yet insait long provins.

Sir Michael i bin wokim dispela singaut long ai bilong planti tausen pipel husat i bin stap long bung na lukim em i tokaut long tripela kendidet long provins bai sanap long Nesenel Alaiens Pati tiket.

Peter Humphreys bai sanap resis long Wes Nu Briten Gavana sit, Victor Narere long Talasea Open na Michael Kartson long Kandrian Gloucester sit.

Is Nu Briten Gavana, Leo Dion i bin raun wantaim Sir Michael long dispela wokabaut i bin tok gavman bilong em i kamapim planti gutpela samting insait long 5-pela yia em i stap long pawa. Na ol i mas ilektim o makim ol bek gen long pinisim ol wok i stap yet.

"Taim dispela gavman i bin kisim pawa long 2002, ol foren risev mani i bin stap daunbilo tru, planti rot na bris na ol haus sik long kantri i bin bagarap. Ol stet entaprais olsem Telikom, PNG Pawa na Air Niugini i bin klostu bagarap olgeta bikos pastaim gavman i no wokim gutpela disisen long rot ol i yusim mani long en.

"Tasol taim gavman bilong mi i kam insait na wok long sotpela taim, ol samting i go gut. Kina i go antap long 31 sents egensim mani bilong Amerika, foren risev i go antap na planti rot na bris na ol stet entaprais i ron gut.

"Pipel i lukim trupela gro long ikonomi na Nesenel Alaiens i luk-save long kontribusen ol ris provins olsem Wes Nu Briten wantaim welpam na timba i kamapim.

"Mi wok long tok tasol olsem makim rait man na em bai kisim sevis i kam long provins," Sir Michael i tok.

Papa bilong Mista Humphreys i bin memba bilong Palamen long 15 yias na i bin holim sit bilong rijinel bilong Wes Nu Briten.

# Maikro Fainenes i op long Kimbe



WELKAM: Welkamim Gavana Genel Sir Paulias Matane a Ledi Kaludia long Kimbe taim ol i go lonsim nupela Maikro Fainens brens long hap.

OL Pipel bilong Wes Nu Briten i gat Maikro fainens sevis nau long provins we i ken sevim ol.

Dispela i bihainim nupela PNG Maikro Fainens opis ol bin opim long las wik.

Gavan Jenerel na Gren Sief, Sir Paulias Matane i bin opim nupela opis long Kimbe na moa long 2,000 pipel i bin bung long lukim opis opening bilong brens long provins.

Brens i bin op long las yia Novemba na nau, moa long 8,700 pipel i kamap memba pinis long PNG Maikro Fainens kampani.

Siaman Brown Bai i tok benk i kisim moa long K1 milien long sevis na long wankain taim tu, em i givim aut moa long K200,000 olsem dinau mani i go long ol liklik bisnis operetta long provins.

Mista Bai i tok Maikro Fainens

kampani i bin kirapim opis long Koki, Mosbi long Janueri 2005 na em i wok long kam gut pinis.

Long pinis bilong mun Me, samting olsem 100,000 manmeri i putim mani i go long skim na sevis i bin kamap long K21 milien. Na benk i bin givim aut moa long K18 milien dinau mani long samting olsem 11,400 pipel pinis i stap.

Em i tok visen o driman bilong ol em long gat wan milien kastoma long yia 2015 na long sapotim ol ruel pipel na bisnis long Papua Niugini (PNG)

PNG Maikro Fainens kampani i gat brens pinis na wok long Tabubil, Kiunga, Balimo, Daru, Koki, Popondetta, Kimbe na wanpela ejensi long Wara Mari.

Ol plen i stap long kirapim 5 o 6 moa brens long kantri long dispela yia.

**Up to 60% OFF DOMESTIC FARES**

**Air Niugini now makes domestic travel more affordable**

HAGEN POM RETURN	K485.30*
POM GOROKA RETURN	K493.00*
LAE POM RETURN	K390.70*
POM MADANG RETURN	K477.60*

\* Return Fare inclusive of taxes & surcharges. Conditions apply  
 Contact your nearest Travel Agent, Air Niugini Sales Office or book online at [www.airniugini.com.pg](http://www.airniugini.com.pg)

Call Toll Free 180 3444 now **Air Niugini**



# Karkum pipel redim komiti long lukautim trasel

James Kila i raitim

OL komyuniti lida bilong Ples Karkum long Sumgilbar Sab-Distrik long not kos bilong Madang Provins i bin bung na makim wanpela komiti bilong redim wok konsevesen o lukautim ol 'Leather Back' o bikpela trasel long nambis bilong ol.

Dispela bung i bin kamap long bikples Karkum na i bin lukim ol bikpela lain manmeri i kamap long skelim ol toktok i go i kam na makim stret ol lain papagraun na ol memba bilong ol sab kien long karim aut dispela wok.

Komiti i bin kamap bihain long askim i kam long wanpela non gavman ogenaisesen (NGO) ol i kolim ol yet 'Saut Pasifik Tetol Restoresen Projek' (SPTRP) insait long wanpela stadi o wok painim aut bilong ol i

soim long setel laif olsem Karkum em wanpela ples insait long wol we dispela bikpela trasel ol i save kolim 'Leather Back' i save karim kiau bilong ol.

Ol sampela bikman bilong kantri Amerika i bin go long Karkum na i toktok wantaim ol komyuniti lida long kamapim dispela trasel konsevesen projek.

Ol dispela lain bilong Amerika husat i go pas long SPTRP i bin go wantaim wanpela man i makim Papua Niugini (PNG) na bipo niusman, Wenceslaus Magun, long givim toktok na opim tingting bilong ol pieslain komyuniti long Karkum.

Bihain long ol i bin toktok wantaim ol Karkum pipel ol lain bilong SPTRP i bin go long ples Tokain, Malas na tu long Murukanam long givim wankain toktok long ol manmeri long konsevesen o lukautim ol dispela

bikpela trasel.

Mista Magun i tokaut olsem ol salientis o save manmeri long wol i painim aut olsem dispela bikpela trasel em namba bilong en long ol solwara long wol i wok long pinis.

Nau yet samting olsem 10 000 tasol i wok long stap olsem na yumi ol manmeri long kantri i mas lukautim ol na bihain ol pikinini na o l

tumbuna long bihain taim i ken lukim.

Ol save man bilong Amerika i tok Karkum nambis na tu ol nambis bilong Tukain, Malas na Murukanam em ol spesel ples tru bikos ol trasel ya i save raun raun long ol bikpela solwara long wol.

Tasol bihain long 15 yias, taim ol i laik karim kiau bilong ol, ol i save kam bek gen long

Karkum, Tokain, Malas na Murukanam na karim kiau. Ol pikinini trasel tu bai kam bek bihain na karim kiau.

Wanpela mausman bilong Karkum komyuniti, Joseph Mutindep na Willie Mayang i tok olgeta lida long Karkum i amamas na i tok tambu long ol manmeri i kisim kiau bilong bikpela trasel na tu kilim ol na kaikai mit bilong ol trasel. Ol i makim komi-

ti long putim was na tu kamapim ol wok bilong ol dispela trasel projek long kamap.

Wanpela papagraun bilong Karkum, Benny Wobol Yaiaim i tokaut strong tru olsem em i amamas long dispela developmen projek long kamap.

Tasol em i tok ol papagraun stret i mas stap long komiti na tu em i no laik ol man i gia-

man tasol na sutim het taim ol i nogat hap graun o eria we projek bai i stap long Karkum nambis.

Mista Yaiaim i tok olsem bikpela hap nambis em i stap long Begayam wanpisin bilong em, olsem na em i laik lukim ol helpim bihain i mas go stret long papagraun. Ol narapela i noken giaman na yusim projek long intres bilong ol.

## Sumgilbar pipel laikim developmen

James Kila i raitim

Planti ol ruel ples na ol eria long Sumgilbar Sab Distrik long Madang Provins i bagarap tru bikos nogat gutpela rot i go insait long dispela eria.

Ol pipel bilong dispela ol ruel ples i save brukim bus na wokabaut long we tru long kisim sevis.

Planti ol dispela ples long Sumgilbar Sab Distrik i stap long ol inlen o hap maunten ples long not kos rot long Madang Provins. Nesenel memba bilong Sumgilbar Distrik em Mathew Gubag.

Wanpela komyuniti lida bilong Sumgilbar Sab Distrik, Markus Arek, i bin tokim Wantok Niuspepa olsem long taim bilong independens yet inap nau, planti ol viles long ol maunten eria olsem Garup, Kensok, Basken Dimer, Kurum na Sevan na tu Wanuma i nogat gutpela rot.

Long taim bilong ren, rot i save bagarap tru na ol manmeri i save karim ol kopra kakao na ol gaden kaikai bilong ol na wokabaut i go daun long maus rot na kisim transpot long karim i go salim long maket.

Wanpela lida bilong Sevan eria, Raphael Dong i tok ples bilong em long Sevan i stat groim kopi, tasol nogat rot long karim kopi i go aut. Narapela samting tu em nogat ol lain long baim i save go long eria bilong ol na baim kopi.

Ol narapela ples lida long Sumgilbar i tokaut tu insait long ol bung long sab distrik em Wantok Niuspepa i bin stap long en planti i tok olsem memba bilong Sumka i no save tingting long bringim developmen insait long ol bikples long not kos.

I gat planti kopra na kakao na buai olsem kes krop ti stap tasol hevi bilong rot tasol i mekim na ol i no save karim dispela i go long maket.

Ol lida i tok memba i save tingting long KarKar ailan tasol.

Olsem na planti ol lida na ol pipel long Sumgilbar nau i laik lukim man i winim 2007 Nesenel lileksen na go long Palamen i mas tingting long developim ol ruel ples na eria long Sumgilbar.



### POSF TOKAUT LONG 16% INTRES I GO BEK LONG OL MEMBA

Mani i go bek long ol memba	Pesentes	Kina (milien)
Winmani long wok operesens (net profit bihain long takis)	13.5%	154.9
Transfe long ol risevs	2.5%	24.0
Olgeta intres i go long ol memba	16.0%	178.9
Hetlain Inflesien	1.3%	
Tru tru winmani mak i go long ol memba	14.7%	
Balens Sit	2006 K (milien)	2005 K (milien)
Olgeta invesmen	1,509.0	1,348.6
Net Aset	1,517.1	1,365.0
Net Aset Gro	152.1	330.8
Ol Risevs	110.6	134.6

#### Distribusen o Tilim bilong ol 2006 memba stetmen

Ol Memba nau i mas harim toksave olsem ol 2006 Anuel Stetmen bai go aut bihainim ol dispela rot na ples:

- Ol Pablik Seven bihainim wan wan ol peirol opis bilong yupela we ol i save salim pe slip bilong yu i go long en
- Ol Praivet Bisnis, bihainim adres o pos opis bokis namba bilong yupela, o sapos nogat, i go long adres bilong kampani yu wok long en

#### Ol Anuel Stetmen ol i printim bai go aut bipo long namba 22 de bilong mun Me, 2007.

- Ol Anuel Stetmen bai redi long yu ken kisim long ol Infomesen Kiosk long ol dispela hap long pinis bilong mun Epril, 2007:

1. Pot Mosbi
  - Graun Floa bilong Era Rumana (POSF Het Opis)
  - Brian Bell (Boroko)

2. Kavieng (Post PNG - Pos Opis)
3. Wewak (Post PNG - Pos Opis)
4. Kimbe (Post PNG - Pos Opis)
5. Alotau (Post PNG - Pos Opis)
6. Goroka (Post PNG - Pos Opis)
7. Lae (Graun Floa, Vele Rumana Opis)
8. Rabaul (Kokopo Tropicana Haus)
9. Mt Hagen (Namba 2 floa, Wampnga Haus)

- Long Kina Investment and Superannuation Services Limited opis - namba 2 floa bilong Deloitte Tower yu ken kisim nau yet.

Ol Memba i mas ringim POSF Member Services Dipatmen sapos ol i no kisim ol nupela 2006 stetmen inap namel long mun Jun 2007. Yu ken ringim tu Kina Tol Fri namba 180 1414.

Ol memba i mas yusim ol POSF Memba Details update fom long tokaut long wanem ol senis i kamap long ol stori bilong ol yet bai ol pas i ken go stret long ol.

Long kisim moa toksave, ringim:

#### Jeneral Menesa Memba Sevises

Mista John Auna  
Ph: 309 5207  
Fax: 321 3421  
Email: jauna@posf.com.pg

#### Employa Rilesens Opisa

Mista Frank Lokalyo  
Ph: 309 5270  
Fax: 321 4474  
Email: flokalyo@posf.com.pg

#### POSF Het Opis Memba Sevises

Ph: 309 5244  
Fax: 321 4406  
Tol Fri Namba: 180 1414

#### POSF Lae

Mista Aruai Doko  
Ph: 472 2272  
Fax: 472 6713  
Email: posflae@posf.com.pg

#### POSF Rabaul


Mis Senny Peril  
Ph: 982 8900  
Fax: 982 8901  
Email: posfrabaul@posf.com.pg

#### POSF Mt Hagen

Mista Allan Titip  
Ph: 542 1182  
Fax: 542 1186  
Email: posfhagen@posf.com.pg



# NGO helpim ol gret 7 na 8 sumatin



TENKYU: Able Rai, gret 8 sumatin long Tatana Praimeri Skul ausait long Mosbi makim ol sumatin long skul bilong em long kisim 5-pela komputa fri long Hope Worldwide (PNG). Sanap wantaim Able em Dairekta bilong Hope Worldwide, Luke Keria na long baksait, ol gret 7 na 8 sumatin.

Noreen Dada i raitim

HOPE Worldwide Papua Niugini (PNG) helpim ol sumatin long Tatana Praimeri Skul taim ol givim ol 5-pela komputa long helpim ol save moa long yusim na kamapim skil bilong ol taim ol yusim komputa.

Aninit long Infomesen Teknoloji program bilong em, Hope Worldwide PNG i save givim ol komputa fri o givim nating go long ol skul o ol lain husat ol laik givim i go long en.

Dispela program bilong ol save lukim ol askim ol dona o ol kampani husat i gat ol olupela komputa i slip

nating tasol i wok yet long opis bilong ol long givim go long ol we ol bai stretim liklik na givim go long ol skul wantaim nogat sas.

Antap long dispela tu ol save givim trening long ol skul tisa long yusim ol komputa program we bai helpim ol na tu ol sumatin.

Dispela ol komputa bai go long helpim long gret 7 na gret 8 sumatin yusim neks yia.

Long dispela taim skul i no skulim ol pikinini long yusim komputa bikos i nogat komputa long helpim wantaim save long yusim komputa.

Long nau i go inap neks yia, skul bai nau kamapim kos we ol

ken surikim komputa klas i go insait kos stadi buk bilong ol.

Mista Keria tokim Wantok Niuspepa dispela IT program bilong Hope Worldwide i long bekim hevi we ol sumatin i save painim hat long yusim komputa bihain ol lusim gret 8.

"Bikos taim na tekonojiji wok long senis hariap, ol sumatin mas save long taim ol yangpela yet long yusim ol komputa.

Sampela ol sumatin i kisim skul long komputa na ol inap long yusim masin wantaim nogat wari taim ol arapela i painim hat olsem na dispela liklik helpim bilong mipela i wanpela bekim long daunim dispela hevi," Mista Keria tok.

Ol ogenaisesen o lain husat i ken givim helpim long ol komputa we i wok na ol no yusim na slip nating long opis bilong ol i ken ringim Program Kodineta Tracy Wa-fewa long telepon 3256901 o 3112890 o salim e-mail go long hopepng@datec.net.pg

# Milen Be redi long wokim baio-disel

## ...K900 milien long kamapim

WEL PAM bilong Milen Be Provins bai opim dua long ol intanesenel na nesenenel maket long save olsem Papua Niugini (PNG) i inap long wokim baio-disel bensis.

Long liklik taim i go pinis, graun brukim seremoni we i makim tok orait bilong dispela baio-disel plent long kamap long Milen Be na nau provins i redi long wokim wok kamap bilong dispela plent.

Dispela projek i kamap long patnasip namel long Vitroplant (PNG), Milen Be Estate na Milen Be Provins Gavman we ol bai kisim 5-pela yia long kamapim plent na bai groim 100,000 hektas bilong ol wel pam long provins.

Abau insait long Sentral Provins em narapela hap ol bai groim narapela


100,000 hektas bilong ol wel pam long strongim hamas baio-disel ol mekim.

Dispela projek kamapim bikipela mak long PNG we kantri bai kamap namba wan ples insait long Saut Pasifik rijen na Esia long gat dispela kain plent yusim nupela na mobeta tekonojiji.

Aninit long bisnis, plent bilong Vitroplant PNG, ol bai wokim ap and daun strim prosesing we bai mekim mobeta velyu o prais ol makim long wel we i kam stret long ol wel pam.

Gavman i wetim tok orait yet na wok stretim long stat groim wel pam long ol graun ol makim tasol i kisim strong long Vitroplant PNG olsem ol bai stap long lukim olsem projek i stat na ron gut nau na bihain taim.

## Smart Banking



Save time  
Smart Banking

Call into your nearest BSP branch or phone 180 1212 to get full details on the new range of Smart Banking products to be launched soon



www.bsp.com.pg

# Ela Nambis nidim helpim

## ...Makim Earth De

Noreen Dada i raitim

NEKS wik Sande bikipela nambis bilong Mosbi ol save kolim Ela Bis (Ela Beach) bai askim long helpim bilong olgeta husat i stap long siti long klinim luksave nambis bilong em.

Sande 29 Epril bai makim Wol Earth De we olgeta pipel ijsait long wol bai helpim long klinim wan wan siti na komyuniti bilong ol long promotim tingting long gat klin na grin envaironmen.

Olgeta volentia husat i givim taim bilong ol long klinim wan wan hap bilong ol bai bungim wanem infomesen em ken long ples ol klinim, hamas pipel i helpim long klinim, wanem bikipela ol hevi ol lukim we dispela infomesen ol bai salim i go

long Ocean Conservancy.

Ocean Conservancy em wanpela bikipela envaironmen ogenaisesen long wol we wanem infomesen ol kisim long ol ples olsem Mosbi ol bai bungim, skelim na bai helpim ol kamapim ol was lukautim program bilong ol insait long wol.

Dispela yia, Ela Beach bai kisim helpim em nidim we planti taim i bin gat na i gat yet ol hevi long sait bilong tromoim pipia insait long wara na tu long wesana.

Embasi bilong Yunaitet Stets bilong Amerika, Trukai, Nau FM, Akzo Nobel/Taubmans, Protect Security, Ela Murray Intanesenel Skul na World Wildlife Fund i sampela ol ogenaisesen husat i soim laik long salim ol volentia go klinim Ela Beach.



# "Mi lida bilong Kantri Pati yet": Maxtone-Graham

## William Natera i raitim

MEMBA bilong Saut Waghi Jamie Maxtone-Graham i stopim wanpela bung papa bilong Papua Niugini (PNG) Kantri Pati, Sir Snake Giregire na bipo ambaseda Kiatro Abisinito i bin holim wantaim ol niuslain.

Long Mosbi las wik Fonde, Sir Giregire na Mista Abisinito i bin bung wantaim ol niuslain long tokim ol olsem PNG Kantri Pati i rausim Mista Maxtone-Graham olsem lida bilong Pati.

Sir Giregire i tok dispela em bikos Mista Maxtone-Graham i no toktok wantaim ol na kisim tingting bilong ol long sampela ol bikpela samting em wok long toktok long en, na i wok long mekim ol toktok bihainim tingting bilong em yet, na wantaim sapot bilong ol sampela Pati sapota we Pati i rausim pinis o i no luksave long ol.

Dispela bung i bin kamap ausait long haus bilong Mista Abisinito long Boroko. Taim bung i laik stat stret, Mista Maxtone-Graham i wokabout i kam insait long get na

askim, "wanem samting wok long kamap long hia."

Mista Abisinito i bekim, "Wet inap mipela pinis."

Mista Maxtone-Graham i tok, "Nogat wanpela as long dispela i kamap. Yupela wok long brukim pati. Yumi mas stap strong na go insait long ileksen."

Sir Giregire i tok Mista Maxtone-Graham i mekim planti samting we i no stret wantaim lo (konstitusen) bilong Pati.

Em i tok Mista Maxtone-Graham ken kamapim pati bilong em yet.

Tasol Mista Maxtone-Graham i soim wanpela pas i kam long Paul Bengo, Rejistrar bilong Integriti bilong Politikel Pati na Kendidet Komisen we i tok olsem Mista Maxtone-Graham em Memba bilong Palamen na lida bilong PNG Kantri Pati, na bai go pas long Pati long dispela ileksen.

Tasol Mista Abisinito i strong olsem grup bilong ol bai go het wantaim disisen ol i mekim na rausim Mista Maxtone-Graham olsem lida bilong ol.



• Mista Maxtone-Graham (raithan) i paitim tok wantaim Mista Abisinito (sindaun long lephan).  
POTO: WILLIAM NATERA

# Senisim ol pasin bilong ileksen taim

## Andrew Molen i raitim

OL MANMERI mas senisim pasin na tingting na makim gutpela lida long taim bilong ileksen.

Dispela em tingting bilong Robert Pati, wanpela komyuniti lida bilong Porgera long Enga Provins.

Planti tok em i taim bilong ol nupela na yangpela lida long go insait long palamen na kisim kantri go fowet.

Em i tok em i taim bilong senisim pasin na tingting na kisim ol nupela lida husat i gat tingting tru long developim na karim kantri.

Ol toktok bilong Pati kamap long dispela taim we Papua Niugini (PNG) wok long redi long go insait long jenerel ileksen bihain long tupela mun.

"Ol manmeri nau i mas vot wantaim lewa bilong ol na noken wantaim bel bilong ol," Mista Pati tok.

Senisim ol olpela pasin we



•Mista Pati. POTO: ANDREW MOLEN

i save kamap long taim bilong vot, em i tok.

Mista Pati tok long taim bilong ileksen ol manmeri save bihainim ol kendidet husat i mekim bikpela kaikai

na kilim planti pik o i givim mani long ol na dispela kain pasin em i no gutpela.

Em i tok ol manmeri noken lukluk long dispela ol samting tasol ol i mas lukluk long

polisi o ol tingting bilong dispela kendidet long wanem kain wok ol bai mekim sapos ol i sanap long palamen.

"Maski long kisim gris mani, pik, kaikai, kar na ol arapela samting.

"Ol i grisim yumi nau na bihain taim ol i kisim opis bai ol i no inap lukluk long yumi moa.

"Sapos yumi lainim gutpela sevis na developmen i kam long komyuniti bilong yumi orait yumi orait yumi mas senisim pasin na tingting na makim stret ol gutpela lida," Mista Pati tok.

Mista Pati tok long ol arapela bikpela kantri na ol developim kantri tu olsem PNG, ol kendidet i no save kilim pik na mekim bikpela kaikai o karim ol man long kar long rot na singaut i go i kam.

"Taim ileksen i kam ol manmeri save lukluk long wanem kain sevis ol kendidet bai kisim i kam olsem helt, edukesen, rot na ol arapela," Mista Pati tok.

# Sevis i no go long Koroba/Kopiago

## Timon Henry i raitim

OL 8-pela distrik insait long Sauten Hailans Provins i no kisim sampela sevis i kam insait olsem, edukesen, helt, rot na bris long sampela ol distrik bilong dispela ris provins.

Ol manmeri bilong Koroba/Lake Kopiago i singaut long sevis i mas go long ples bilong

Inap long sampela yia i go pinis i kam inap nau, 9-pela skul insait long Lake Kopiago i nogat ol skul saplai bilong ol sumatin we ol ken kisim save long en.

Ol papamama bilong wanpela skul i tok long 10-pela yia i kam inap nau, skul i no kisim wanpela skul saplai na olsem, ol i askim Sauten Hailans

Edukesen Dipatmen sapos dispela skul long Lake Kopiago i rejista insait long nesanel edukesen dipatmen o nogat.

Ripot i kam long Wantok Niuspepa i soim olsem planti ol tisa i nogat gutpela haus bilong slip na wok.

Planti ol tisa husat i woklong sampela hap olsem Lake Kopiago, Erave, Samberiki las Wiru na sampela ples moa insait long Komo Bosave, i slip long kunai haus we wara i wok long bagaram-pik.

Dispela i soim sampela hap bilong ol develop provins na kantri o stap olsem.

Maski yumi gat kain kain risos na mani tasol yumi turangu yet.

# BULLBAR SPECIAL

TO SUIT TOYOTA LAND CRUISER  
70 SERIES RUNOUT MODELS  
HURRY WHILE STOCKS LAST

WAS K3,400  
NOW  
**K1,950**  
Price Includes GST  
and Fitting

CALL YOUR FIRST CHOICE BRANCH TODAY

Port Moresby.. Ph 3229400	Goroka..... Ph 7321844	Wewak.... Ph 8562255
Lae ..... Ph 4781800	Mt. Hagen.. Ph 5421888	Vanimo... Ph 8571254
Kokopo..... Ph 9829100	Kimbe..... Ph 9835155	Tabubil... Ph 5489060
Madang..... Ph 8522188	Lihir..... Ph 9864099	Porgera.. Ph 5479367
Kavieng..... Ph 9842788	Buka..... Ph 9739915	Alotau.... Ph 6410100


Ela Motors

TOYOTA

Your First Choice

www.elamotors.com.pg





**ELECTORAL COMMISSION**  
Papua New Guinea



**ELECTORAL COMMISSION**  
Papua New Guinea

# CHANGE IN METHOD OF VOTING UNDER THE LIMITED PREFERENTIAL VOTING (LPV) SYSTEM

The National Parliament in August 2006 passed legislative changes to the Organic Law on National and Local level Government Elections. Among the many changes, was the change in the manner of voting under the Limited Preferential Voting (LPV) system. The new legislative change will split the ballot paper into TWO separate documents. These two documents will be called a candidate poster and the actual ballot paper.

date poster and a ballot paper to be used in the elections.

Copies of the candidate poster will be given FREE to all aspiring candidates for the 2007 general election weeks in advance prior to the actual polling time. They can use that as campaign material, courtesy of the Electoral Commission.

The slight change in the manner of voting under LPV is a provision in law that has come into force on the 21st of September 2006 and as such will be implemented in the coming 2007 general elections.

**ANDREW S. TRAWEN, MBE**  
Electoral Commissioner

Sections 124 and 125 of the Organic Law as amended, require a candi-

## Below here is the candidate's poster and ballot paper

**2007 GENERAL ELECTIONS - NATIONAL PARLIAMENT**  
**CANDIDATE POSTER**  
**TURUMU OPEN ELECTORATE**

**DIRECTIONS**

- ▶ This is a candidate poster. Do not write on it.
- ▶ Write your vote on the **BALLOT PAPER**.
- ▶ Choose three preferred candidates from this poster.
- ▶ Write the candidate numbers or the names of the three candidates of your choice beside the numbers 1, 2 and 3 on the **BALLOT PAPER**.

 <b>10</b> ISAIAH MANALUVA GREEN	 <b>11</b> BOKI RED	 <b>12</b> KILA YELLOW
 <b>13</b> GRACE BLACK	 <b>14</b> SUSAN YELLOW	 <b>15</b> STEVEN VERI BLUE
 <b>16</b> BILL BROWN	 <b>17</b> DAISY MAROON	 <b>18</b> ALICE PURPLE
 <b>19</b> MARGARET TAN	 <b>20</b> ELLY ORANGE	 <b>21</b> DAVID PINK

Printed under the authority of the PNG Electoral Commission. It is an offence to alter/mark/change this poster. Do not write on it

000000 TURUMU OPEN ELECTORATE

000000

**2007 GENERAL ELECTIONS**  
**NATIONAL PARLIAMENT**  
**BALLOT PAPER**  
**TURUMU OPEN ELECTORATE**

**HOW TO VOTE**

- ▶ Write the candidate number or name of your first choice candidate beside number 1
- ▶ Write the candidate number or name of your second choice candidate beside number 2
- ▶ Write the candidate number or name of your third choice candidate beside number 3

**DO NOT PUT ANY OTHER MARK ON THIS BALLOT PAPER !**

1 [ ]

2 [ ]

3 [ ]



STORI TASOL

wantaim



FR. PAUL LIWUN, SVD

Pes bilong Jisas

DISPELA stori em i bilong wanpela yangpela man, husat i bin bihainim lotu bilong Ista Sande na i laik selebretim dispela amamas bilong Ista wantaim olgeta manmeri long peris bilong em.

Em i sindaun insait long haus lotu prea na singsing wantaim narapela manmeri. Tasol taim pater i givim tok skul i stap, em i go ausait long toilet na narapela lain i kisim spes bilong em.

Long taim bilong autim bilip, olgeta manmeri i sanap long prea na singsing. Taim yangpela man i joinim ol, em i pilim olsem wanpela man i kam na sanap long baksait bilong em. Na em i bilip olsem dispela man em i JISAS tasol na em i amamas na prea yet i stap. Tasol i gat strongpela laik insait long bel bilong em long tanim na lukim man i sanap long baksait bilong em. Taim em i tanim, em i no lukim pes bilong Jisas, tasol pes bilong wanpela man nating bilong graun. Olsem na em i tingting planti na i tok: "Mi no bilip sapos pes bilong Jisas i wankain olsem pes bilong man nating bilong graun".

Em i pasim ai na prea gen. Bihain em i tanim na lukluk gen. Em i no lukim pes bilong Jisas tasol bilong man nating i stap olsem yet. Olsem na em i prea strong moa: "Jisas, sapos em i tru, yu tasol i sanap long baksait bilong mi, plis, soim pes bilong yu long mi". Em i tanim na lukim pes bilong man i save kolektim plastik botol na cocacola ken long siti. Em i save long dispela man.

Em i tanim na lukluk long alta gen na lukim pes bilong Jisas antap long diwai kruse. Em i tokim em yet gen; "Mi no bilip, sapos pes bilong Jisas i wankain olsem pes bilong man i save bungim ol rabis bilong siti". Tasol long taim bilong konsekrasio, em i tok strong long em yet: "Em i tru. Nau mi save klia. Pes bilong Jisas i mas wankain olsem pes bilong manmeri bilong graun, olsem pes bilong papa, mama, brata na susa bilong mi, ol manmeri i gat sik AIDS, lek nogut, kalabus manmeri na mi tu".

Sapos yumi luksave long pes bilong Jisas i stap insait long pes bilong yumi yet, em bai isi long yumi long luksave pes bilong Jisas i stap long pes bilong ol narapela manmeri. Olsem na noken hat wok long painim pes bilong Jisas long narapela hap. Pes bilong em i save stap wantaim yumi long wanem hap yumi go na stap. Inap manmeri lukim pes bilong Jisas insait long pes bilong yu?

GLASIM TOK

wantaim



FR. IOLLINGTON WIAM

Tok gris i gutpela na kaikai i nogut

TRU long Papua Niugini (PNG) dispela gris tok i bikpela hevi i save paulim planti manmeri long wanem yumi ol manmeri yet i no save sindaun na glasim gut taim ol manmeri i save kamapim dispela kain tok.

I gat sisen bilong gris tok i stap. Em taim bilong kempen na yumi gat tupela mun i stap bai i kamap. Ol manmeri husat i laik sanap resis em ol kam wantaim gutpela pasesel we ol i pasim pinis i stap.

Dispela kain gris tok bilong ol, ol i no save tingting long yumi. Ol i laik grisim yumi long givim vot long kamapim biknem bilong ol yet.

Dispela em wanpela sik i save paulim yumi na taim dispela man o meri i win, em i save kilim het bilong em long mani na ol i no save bringim sevis i go long ol pipel long wan wan ilektorel bilong ol.

32 yias i go pinis na bikpela namba bilong ol manmeri i bin i stap long taim bipo. Sapos

Ol Katolik bisop i bung long Mendi

TUPELA wik bung bilong ol Katolik Bisop bilong Papua Niugini (PNG) na Solomon Ailan bai toktok long ol samting i karamapim ol pastoral wok, hevi tupela kantri na ol pipel bilong ol i bungim na wanem rot stret sios aninit long Katolik Bisops Konprens (CBC) i ken painim ol rot long stretim ol dispela hevi.

Narapela bikpela samting we konprens i glasim em "ol pikinini". Bung i kamap long Mendi long Sauten Hailans Provins.


Bisop bilong Mendi Katolik Daiosis, Stephen Reichert husat i lukautim dispela bung i kamap long daiosis bilong em i tok konprens i makim dis-

pela het tok, "ol pikinini" long glasim ol sosel hevi i wok long kamapim hevi long ol pikinini.

"Planti taim, ol pikinini long olgeta hap bilong wol na PNG i no wokim asua tasol ol hevi i save pundaun long ol na bagarapim laip na sindaun bilong ol. Olsem na mipela i makim dispela het tok bilong glasim ol pikinini bilong yumi long rjen," Bisop Stephen i tok.

Em i skruim tok i go moa ye na i tok "ol samting i sut long politiks, sosel na ekonomi ol bikpela man i kamapim i save kamapim hevi long laip bilong ol pikinini long PNG na Solomon Ailan".

Bisop Reichert i tok konprens bai glasim evanjelaisesen na



OL BISOP: Sampela ol Katolik Bisop long wanpela lotu i bin kamap long Vunapope Ketitrel, Is Nu Briten Provins.

autim Gutnius na putim ol progrem long helpim pipel long en.

Ol daiosis long PNG na Solomon Ailan i karimaut planti sosel wok progrem long sapatim wok bilong pis na jastis.

Bisop Stephen i tok em i namba wan taim long planti bisop long go long Mendi na ol i amamas tru long gutpela na naispela welkam ol pipel i bin givim long taim ol i kamap long Mendi

Ples Balus. Konprens i bin stat long Epril 14 na bai pinis long Epril 24. na long Epril 25, ol bisop bai lusim Mendi long kisim balus i go bek long ol wan wan daiosis bilong ol.

Makim wanpela spesel spots wik

Veronica Hatutasi i raitim

Papua Niugini (PNG) em i wanpela Kristen kantri olsem i stap long Mama Lo na i moabeta long makim wanpela spesel wik insait long yia olsem spots wik. Na i no holim ol spots long Ista na Krismas pestode.

Bisop bilong Kavieng/Manus Daiosis, Ambrose Kiapseni i autim dispela tingting bihainim sampela samting i wok long kamap long kantri we i soim olsem yumi ol pipel long

PNG i minim o nogat na i no givim luksave ol bikpela Kristen pestode olsem Ista na Krismas na stap insait long ol lotu selebresen.

Dispela em long pilaim spot o ol pilai long Holiwik na Ista wiken na Krismas taim tu. Long ol dispela bikpela de, pilai i pulim tingting bilong ol

pipel na ol i no luksave o go long ol lotu selebresen bilong tingim ol dispela bikpela pestode bilong sios. "Samting yumi wokim

i go agensim wanem ol papa bilong dispela kantri i wokim long putim PNG olsem wanpela Kristen kantri insait long Mama Lo.

NUPELA ILEKTOREL ROL

SAPOS YU GAT

18 KRISMAS O MOA, NA NEM

BILONG YU I NO I STAP LONG NUPELA

ILEKTOREL ROL, YU MAS GO LUKIM PROVINSEL

ILEKSEN MENESA O DISTRIK OPIS KLOSTU LONG

YU NA STRETIM WANPELA

ENROLMEN FOM PEPA...

EM BILONG APDETIM O STRETIM 2002 ILEKTOREL ROL?


NOGAT, EM I NUPELA ENROLMEN PROGRAM BILONG NUPELA 2007 ILEKTOREL ROL.







# YUMI na HIV wantaim



Fr Jude Ronayne Forde OFM

## Noken givim Sik HIV long narapela

OL manmeri i kisim pinis sik HIV ol i save kolim ol PLWHA ("People living with HIV/AIDS") em ol tarangu i save karim hevi long dispela sik. Na laip i hat tru.

Wanpela bikipela wok long HIV/AIDS ministri em olsem - yumi no laik bai wanpela moa manmeri o pikinini i kisim dispela HIV binatang. Olsem na, "aweanes" o toksave i go aut pinis long olgeta hap bilong kantri long dispela sik i stap na we man i ken kisim dispela sik.

Hia long Papua Niugini (PNG) planti i save kisim long sex: pren pasin - pamuk pasin - brukim marit - pilai nating. Olgeta de,

mipela i harim tok long narapela famili i kisim bagarap long HIV. I luk olsem ol "aweanes program" i no wok gut. As bilong dispela em sampela manmeri i no harim tok - o i no bilipim tok - o manmeri i laik bihainim laik bilong ol yet. Tasol, wanpela samting i klia - maski yu save o nogat, HIV i stap na sapos yu prenim man o meri i gat dispela sik, yu tu i ken kisim dispela vairas nogut, na bagarap long en.

Hia long PNG, wan wan tasol i save ol i gat HIV pinis. Em ol dispela lain i bin kam na sekim blut bilong ol. Tasol, bikipela namba tru - i mas go antap long 80 pesen (%) - ol i no save

ol i gat dispela sik na wanpela i wok long givim sik long narapela. Olsem na, namba bilong ol manmeri i kisim HIV nupela i save wok long go antap long olgeta de. Em bikipela wari nau.

Tasol, mi laik tok long ol lain i save pinis ol i gat HIV - na ol i wok long bihainim olpela laipstail bilong ol na givim binatang long narapela. I gat stori long niuspepa long wanpela man long Australia. Long yia 2000, em i bin painimaut em i gat HIV. Tasol, em i no wari long narapela. Em i go prenim 16 meri moa na givim sik HIV long ol. Nau em i kamap long kot!

Givim sik long narapela manmeri, olsem, em bikipela rong tru. Bagarapim laip bilong narapela manmeri i brukim lo bilong God na i brukim lo bilong Gavman tu. Long PNG yumi gat spesel lo long was long dispela - ol i kolim HAMP Act.

Tasol, wari bilong mi i olsem. Nau mi lukim sampela PNG, ol i save ol i HIV pinis, tasol dispela save i no save banisim ol long painim nupela poroman o pamuk nabaut.

# Lukluk long program bilong ol dokta

Noreen Dada i raitim

MOA wok na luksave mas go insait long lukluk long program bilong ol residen dokta na wok stretim mas kamap long stretim wanem kain hevi ol gat long sit bilong wok bilong ol.

Dispela em singaut bilong Nesenel Dokta Asosiesen (NDA) Presiden Dokta Kauve Pomat taim em toktok long hevi bilong ol residen dokta o ol sumatin dokta husat i pinisim stadi bilong ol long yunivesiti na wok long namba wan taim insait long ol haus sik.

Dokta Pomat go het long tok pasin long ol dokta aninit long residen program long stopim wok i no nupela samting na i mas kisim sampela stretim.

Long tupela wik i go pinis, ol residen dokta i bin tingting long stopim

wok liklik bihain long planti bilong ol i no bin kisim pe bilong ol long laspela tripela mun na i autim wari bilong ol olsem dispela i no gutpela pasin we bos bilong ol Nesenel Helt i soim.

Wantok Niuspepa i toktok dispela wik wantaim Dokta Pomat husat i tok ol dokta i kisim pinis ol advans o sampela liklik mani long lukim ol sindaun orait inap nem bilong ol kamap long pe rol we Dipatmen bilong Pesonel Menesmen i dipatmen husat bai go pas long stretim luksave bilong ol olsem ol wok manmeri long helt sekta.

"Hevi hia em nem bilong dispela ol dokta i no go hariap long Dipatmen bilong Pesonel Menesmen i luksave olsem ol wok manmeri na putim nem bilong ol long pe rol.

"Asua go bek long bos bilong ol dokta, Dipatmen bilong Helt.

"Watpo na ol no surikim nem bilong ol residen dokta i go hariap long Dipatmen bilong Pesonel Menesmen, dispela i no nupela hevi, olgeta yia yumi save harim wan kain hevi kamap.

"Wanem taim bai ol atoriti wokim rait pasin

na stretim dispela hevi olgeta?" Dokta Pomat i tok.

Mi bai i no inap klia long save sapos Dipatmen bilong Pesonel Menesmen i putim ol dispela dokta long pe rol pinis tasol bikipela samting em ol kisim sampela liklik mani long lukautim ol yet na famili bilong ol," Dokta Pomat i tok.

Wantok Niuspepa i bin traim toktok wantaim Seketeri bilong Helt Dipatmen, Dokta Nicholas Mann long tok klia long dispela tasol i no bin inap long kisim long stretim tok.



AIDS AWEANES: Moa HIV/AIDS aweanes olsem dispela i mas kamap. Fall foto.

## MEDIA COUNCIL OF PAPUA NEW GUINEA

### MEDIA FOR DEVELOPMENT INITIATIVE

#### PABLIK NOTIS

Midia Kaunsel bilong PNG i laik holim sampela ol bung long toktok wantaim ol lain husat i laik save long MDI Komyuniti Grants Program. Dispela ol bung bai hap belo. Mipela tok welkam long ol midia haus, sivil sosaiti ogenaiesen na gavman dipatmen long stap insait long ol bung.

Ol bung bai givim toksave long rot bilong bihainim long pulmapim MDI fanding aplikesen, rot MDI save makim ol lain husat ken kisim grant bilong ol Improved Program Kontent (Improved Program Content o IPC) wok. Ol bung bai stat long Epril 30, 2007, na bai kamap long 4-pela rijen bilong PNG.

Bihain long yupela bekim dispela toksave long soim laikim long kamap long ol bung, bai mipela toksave long ol hap stret yumi bai bung long en. Sapos wanpela maus manmeri long ogenaiesen bilong yu i laik kam long ol dispela bung, plis toksave long mipela bipo long Tunde, Epril 24, 2007. Yu ken toksave long;

Mary Carlua  
Activities Coordinator  
Telepon: 323 5977  
Feks: 323 3349  
Email: mcarlua@mdi.org.pg



Australian Government  
AusAID

MDI is a joint initiative of the Government of Papua New Guinea and Australia managed by the Media Council of Papua New Guinea with funding assistance from AusAID.

# Pasifik ailan gavman opisa kisim salens

...Luksave long HIV hevi nau

Noreen Dada i raitim

OL Pasifik ailan atoni jenerel, helt minista na sinia gavman opisel husat i stap long Rijinel Hai Level Konsaltesen long HIV bung i kisim strongpela singaut long lukluk na stretim hariap ol hevi bilong HIV long lainim sampela samting long ol samting we i kamap bipo taim.

Dispela singaut i kam long Australia jas na man husat i go pas long helpim long daunim ron bilong HIV na helpim ol husat i gat dispela sik, Jas Michael Kirby.

Jastis Kirby husat i ki not spika long dispela rijinel bung long Auckland, Nu Silan i tokim ol gavman opisa

bilong 15 pasifik ailan kantri olsem 'planti rot ol kisim bai gat pen na bai hat tasol ol mas kisim long stretim sampela hevi."

Jastis Kirby go het long tok i nogat marasin long stretim o pinisim HIV na bikipela prais long baim entiro retro vairol (ARV) marasin bai putim planti moa hevi long intansenel komyuniti.

"Moa taim na wok mas go insait wok long stopim ol pipel kisim binatang bilong HIV.

"Pasifik ailan lida na ol lain husat i mekim ol polisi i mas lukim olsem wok ol kirapim i sut long bekim o painim sampela stretim long ol bikipela hevi we i kirapim planti toktok

namel long ol pipel," Jastis Kirby i tok.

Pasifik Senta bilong Yunaitet Nesens Developmen Program (UNDP), Pasifik Rijinel Raits Risos Tim na UNAIDS i kirapim dispela Rijinel Hai Level Konsaltesen long HIV na Lo long glasim ol rot long lukim olsem ol lo bilong wan wan kantri long sait bilong HIV, i rispektim na was lukautim gut rait bilong ol pipel husat i gat HIV.

Long dispela bung, Pasifik Senta bilong UNDP, Pasifik Rijinel Raits Risos Tim na UNAIDS i autim wanpela humen raits stia buk long helpim kamapim rifom o sampela senis long lo we ol Pasifik ailan kantri i ken traim yusim.



Namba wan hap long stori bilong raun bilong ol PNG sumatin long Amerika.

# Amerika, ples bai yu kirap nogut long em

...Lukluk raun bilong 4-pela sumatin

**7-PELA** wik wokabaut bilong 4-pela PNG skul sumatin long Amerika i bin opim ai bilong ol long ol gutpela na hait sait bilong dispela bikpela kantri long wol planti i no save lukim.

Kantri na pipel we planti bilong yumi i save lukim olsem olgeta lain i gat olgeta samting long amamasim laip na sindaun bilong ol.

Sebastian Mathias Sovera Seri o narapela nem Toli i gat 14 krismas i pinisim gret 8 long Wards Strip Praimeri Skul na i wet long go long Don Bosco Teknikel Skul neks yia.

Alfred Joel Meruru Seri (Imran) i gat 17 krismas i wokim gret 11 long Pot Mosbi Nesenel Hai Skul. Lester Chariton Govi Seri i gat 19 krismas i wokim gret 12 long Pot Mosbi Grama Skul na Leo Balun bilong Bulolo i skul long Yunvesiti bilong Teknoloji long Lae.

Wanpela famli pren i bin askim ol yangpela sumatin long go malolo na lukim Amerika.

Ol bin raun long wanpela liklik

yut na raun winim moa long 15,000 kilomita lukim ol bikpela siti, bihainim ol baksait rot i go olsem long bikbus, ol ples wesana (desert) na sno o ais.

Ol i lukim ol sait bilong Amerika we sampela pipel bilong Amerika yet i no save long en.

Bipo ol i go, ol tisa na ol poroman bilong ol i bin askim ol long putim olgeta samting ol i lukim long notbuk na plen.

"Olgeta i bin laik bai mipela i painaut rot Amerika i kamap ris na laipstail bilong ol na dispela em bikpela intres tu mipela i bin gat," Leo i tok.

Ol narakain samting i bungim ol long olgeta kona ol i laik tanim. Planti nois na hariap long wokim samting i kamap laip long Los Angeles i no redim ol long nogat nois laip ol i lukim long Rhyolite, wanpela taun long Nevada Stet we wanpela taun i bin gat bikpela bisnis na planti pipel long en.

Tude, taun i nogat manmeri long en, olsem 3,000 ol narapela "ghost" taun long Amerika o taun

we pipel i lusim na nogat man i stap long en

Ol dispela kain taun em bipo em ol maining, loging na wel taun o ples we Amerika i bin painim ol risos long ol.

Long gutpela taim bilong ol, samting olsem 10,000 pipel i save stap long ol tasol nau, ol tewel tasol na ol bruk na olpela bilding i stap.

4-pela i bin raun long ol ghost taun long 4-pela stet na ol i lukim ol taun we i wok long pinis.

Ol bin kisim planti poto long Golfil, Nevada, ples we bikpela ston kothaus i soim bikpela bilong em long gut taim bilong em.

Nau samting olsem 2,000 pipel tasol i stap namel long wanpela bipo hai skul na planti tripela stori bisnis bilding na wanpela amamas hotel i bin stap long en. Taim ol main i pinis, Golfil i pundaun na pinis tu.

**Moa long dispela stori neks wik...**



SAVE LONG SINDAUN BILONG AMERICA: Ol sumatin bilong PNG i raun lukim Amerika long lainim kalsa na sindaun bilong ol.



NOGAT HAUS: Ol manmeri husat i nogat haus long Kalifonia long Amerika.

## Soim rispek long olgeta: Geno

...UPNG makim 52 greduesen

Noreen Dada i raitim

OL sumatin husat i greduet long Yunivesiti ov Papua Niugini (UPNG) i kisim strongpela singaut long kamap lida husat i gat strongpela, gutpela tingting na pasin long wok bung wantaim ol pipel long kantri.

Sief Ombudsman Komisina, Ila Geno husat i ges spika long greduesen i go het long salensim ol sumatin long soim rispek long olgeta pipel maski wanem kain komyniti ol kam long en na daunim ol yet long helpim kamapim kantri.

"Bikos yu kisim digri, diploma,

masta o wanem kain setifiket nau, i no min yu lukluk daun long ol arapela.

"Wantaim dispela mak yu winim long kisim save long bikpela edukesen institut, yu mas soim olsem yu lida na i ken helpim long bringim developmen long kantri.

Planti taim ol yangpela i save kisim rong rot na painim olsem ol i no inap painim we bilong ol kam bek tasol mi laik salensim yupela long kisim strong long save yu kisim long yunivesiti na yusim dispela long kamap ol lida wantaim strongpela na gutpela tingting," Mista Geno i tok.

Las wik Fraide UPNG i lukim kain olsem 1000 sumatin i greduet long 6-pela skul bilong ol long Skul ov Humentis na Sosel Saiens, Skul ov Lo, Skul ov Netrol na Fisikol Saiens, Skul ov Bisnis Administresen na Skul ov Helt na Marasin.

Dispela i makim namba 52 greduesen bilong UPNG we Vais Sansela Profesa Ross Hynes na nupela Sansela, Stephen Pokawin i salensim tu ol sumatin long go insait long pablik laip wantaim skil na save ol kisim long helpim kantri.

## Edukesen Dipatmen sapatim strong teknikel na vokesenel trening

TEKNIKEL na Vokesenel Edukesen em bikpela samting we Dipatmen bilong Edukesen insait long 10-pela yia plen i strongim bikos em i givim skul na save long ol yangpela na ol i ken helpim long ol wok developmen bilong kantri.

"Vokesenel na teknikel trening i helpim planti pipel bilong yumi insait long ol distrik na



Dokta Pagello.

komyniti long wokim ol samting i helpim ol yet na ol famili i go hetim sindaun na laip na tu,

wokim ol samting long kisim mani na i no olgeta taim askim long helpim," Seketeri bilong Edukesen Dokta Joseph Pagello i tok i no longtaim go pinis.

Het tok bilong Edukesen long 2007 em, "Teknikel Vokesenel Edukesen - Skills developmen long Bildim Nesen", em i tok.

Dokta Pagello i tok dispela het tok i bilong strongim "self reliance"

na promotim " skills" developmen long olgeta skul, moa yet long ol hai, vokesenel na teknikel skul anit long nesenel edukesen sistem.

Yumi mas givim dispela skul na trening i go long planti pipel long helpim ol kamapim gut laip bilong ol na tu, ol i ken kontribuit i go long ol wok developmen bilong kantri, Dokta Pagello i tok.

Whatever your education or work experience, CIC has Training for YOU

**TRAIN FOR SUCCESS IN 2007!**

Gain accredited awards and skills to secure a good job, high pay, security, respect. CIC Training includes easy-to-master Study Materials, expert Guidance, Tests & Model Answers, Exams, Award, Registered Despatch, CIC Members' website.

**International Diplomas (£170 or US\$350)**

- \*Accounting, Hotels, Travel & Tourism, Computers & IT, Economics
- \*Sales & Marketing, Global Marketing, Advertising, Public Relations
- \*Business, Management, Human Resource/Personnel, Administration
- \*Insurance, Secretary, Purchasing, Project Management, Banking
- \*Leadership, Employee Development, Business Start-Up, Strategy
- \*Business English, Office, Communication, International Business
- \*Advanced Management, Organisational Behaviour, Stores & Stock

**BA Programmes: BBA, BFA, BMA, BCom, BA Eng; MBA**

- \*Business, Finance, Human Resources, Marketing, English
- \*Commerce, Administration, Organization, Development

**Write, fax or email for a FREE Prospectus to:**  
**CAMBRIDGE INTERNATIONAL COLLEGE**  
 PO Box 1378, Southampton, SO17 3WX, Britain  
 website: [www.cambridgecollege.co.uk](http://www.cambridgecollege.co.uk)  
 email: [info@cambridgetraining.com](mailto:info@cambridgetraining.com) Fax: 00 44 1534 485071

Papua New Guinea National Training Council Approved Training Provider



# Nogat inap wok na stil pasin kamap bikpela

**Dia Edita,**

Mi laik rait na toktok planti long dispela pasin we ol lida bilong mipela long Is Sepik Provins i no gat taim long helpim Sepik i gro na stopim stil pasin.

Bilong wanem na planti stil pasin, pik poket, reip, stim (hom bru), mariwana i kamap strong long taun o distrik bilong mipela.

Bikpela asua o sutim tok i mas go long ol lida husat i no wokim planti ol faktori na givim ol wok i go long ol yut

o manmeri husat i gat save tasol i stap nating long Wewek Taun.

Ating ol lida mas wok bung wantaim long 2007 Nesenel Ileksen na traime wokim moa faktori long Is Sepik Provins.

Em tingting we mi olsem wanpela kendidet bilong Wewek Taun open sit i lukluk long en.

**JOHN KRIOSAKI  
WEWAK  
E.S.P**

# Mt Hagen maket stail tru

**Dia Edita,**

Mi wanpela grasrut bilong bikpela bus Nebilyer, ausait long Maunten Hagen hia tasol long Westen Hailans Provins. Mi laik givim tingting bilong mi wantaim ol manmeri bilong provins na Papua Niugini (PNG).

Mi laik tokim yupela olgeta pipel bilong PNG olsem, i tru olsem Hagen i luk smat na stail tru bikos long wanem samting? Yumi olgeta bekim. Mt Hagen maket tasol.

Taim mi raun long Hagen Siti olsem long Saina taun o Renbo, Hagen Pos Opis, Polis Stesen, PNG Pawa Opis, top taun, benk na planti moa mi save les tru long wanem ol i no luk gut na mi i save laik traun.

I no luk olsem taun. Pipia save pulap na stap long olgeta hap kona bilong dispela taun.

Ol meri i save salim buai na smok long fran long ol opis na i save mekim ples i doti tru olsem ples bilong ol pik na dok na ol kanaka.

Ol manmeri i no save yusim het bilong ol na tu ol wait manmeri i save kam na tanim tanim het bilong ol long

wanem long pasin bilong yumi. Mi i save sem pipia stret.

Yupela sampela i save mekim nabaut nabaut na bagarapim ples na mipela ol gutpela manmeri i save kisim nem nogut tru nating long taun na ol liklik strit i save bagarap long pipia na buai spet na mekim Hagen i go nogut olgeta.

Tasol wanpela hap ples i mekim Hagen i luk stail tru na mi i save raun planti taim long hap, sindaun, lukluk na mi i save amamas wantaim ol man. Hagen maket i luk nais tru na stail moa long ol arapela hap bilong taun.

Olsem na manmeri husat i stap long Hagen i mas lukautim gut ol arapela hap tu. Em ples bilong yumi long slip kirap, raun raun, kaikai long gutpela ples. Yumi mas rispektim maket na siti wantaim.

**TANO WATI  
GRASRUT  
NEBILYER  
WESTEN HAILANS PROVINS**

# Peter Ipatas noken giamanim ol manmeri

**Dia Edita,**

Yes mi wanpela mangi Madang stret na mi laik autim dispela i go long ol pipel bilong ol long lukim na skelim.

Long de 17, Sarere long Bates oval fil Peter Ipatas stap long Madang na toktok long 'Fri Edukesen' na tu em i lonsim pati bilong em na bikpela toktok tru em mekim long dispela de na det.

Ol bikpela manmeri wantaim ol pikinini yumi bin bung long dispela de we em i autim het tok long fri edukesen. Em i tok olsem 'Fri

Edukesen' bai stat long elementri i go inap long yunivesiti. Dispela tok-tok tasol em i paul olgeta.

Wanpela askim em olsem, "Gren Sief Sir Michael Somare i bekim dinau pinis long Wol benk tu o nogat?"

Em i bikpela rong yumi ol Papua Niugini (PNG) i gat olsem na noken, giamanim ol manmeri long "Fri Edukesen"

Mipela save olsem olgeta samting i mas i gat mani long baim. Nogat wanpela samting em i fri o kam nating. Ol

samting olsem wara, pawa na ol arapela samting. Yupela ol politisen i mas noken tok tok long ol fri edukesen na yusim nem bilong Bikpela.

Mipela ol manmeri, yumi wan wan gat wok long dispela graun olsem Bikpela i tokim Jeremaia. Bai mipela i bai wok hat long kamapim wanem sating mipela i laikim long en.

Fri Edukesen ating em i no trupela tok.

**LINUS EDDIE  
MADANG PROVINS**

# Kaunim vot long Wabag na Porgera

**Dia Edita,**

Mi tok plis long yupela ol Wantok wok manmeri long yupela i ken halivim bel hevi bilong i go long llektorel Komisina bilong 2007.

Taim bilong ileksen i kam klostu na mi laik tokim yupela olsem ol pipel bilong Wes Enga olsem, planti taim ileksen i kam na go pinis na planti braiberi pasin save kamap.

Nau askim bilong mi i go olsem,

Landep Laga long Porgera distrik mas kaunim vot long Porgera taun i no long Wabag, Is Enga.

Na mi laikim Wantok Niuspepa i mas salim pas i go long Komisina long helpim mipela ol ol pipel bilong Wes Enga.

**PETER P  
MAUNTEN HAGEN  
WESTEN HAILANS PROVINS**

# Sapotim Polis na Kraim Stopas TV Program

**Dia Edita,**

Mi wanpela grasrut man bilong bik bus insait long lowa Nebilya, Mt Hagen, Westen Hailans Provins. Mi lukim wanpela pas o nius long Wantok Niuspepa na bel bilong mi i amamas nogut tru long ritim dispela nius o pas.

Na mi givim bikpela sapot long Polis na Kraim Stopas Program long EMTV. Dispela nius wantaim het tok olsem, 'Polis TV Program Karim Gutpela Kaikai' long seksen bilong advataismen, Law na Justice Sector, Mas 15, 2007 long pes 22.

Bihain ol toktok bilong Dairekta bilong Polis Midia Yunit, Superintendent, Dominic Kakas i tok planti gutpela wok i kam long pablik long bekim singaut bilong Kraim Stopas Program long TV i wok long lukim polis i holim sam-

pela biknem na strongpela raskol insait long Papua Niugini (PNG).

Dispela i gutpela tru we i soim olsem pablik i wok long go pas long daunim na stretim hevi bilong lo na oda insait long kantri.

Konstebulari o Polis i luksave olsem ol yet i no inap long paitim i daunim hevi bilong lo na oda insait long olgeta komyuniti long kantri. Polis i nidim sapot bilong ol pablik man na meri.

Dominic Kakas i surikim moa toktok olsem kopret plen bilong 5-pela yia i kam bai yumi wok bung long stretim sindaun long komyuniti bilong yumi.

Na tu em tokaut olsem long Kraim Stopas Program, pablik i wok bung wantaim polis na ol polis i holim pasim pinis husat

raskol i kilim meri Saina long Kina Mat sop long Mosbi long yia 2003. Na tu holim pasim Blek Jisas long Madang. Na narapela polis i holim bek biknem raskol husat i ronawe long Buimi Haus Kalabus long Lae, Morobe Provins. Na tu kilim tupela bikpela raskol long Lae na planti moa yet.

Gutpela wok program i wok long mekim. Na tu bikpela amamas long pablik i wok long wok bung wantaim polis long painim ol raskol o ol stil man.

Yumi mas wok bung olsem long mekim kamap gut komyuniti bilong yumi na bai ol manmeri i stap gut long olgeta taim.

**TANO WATI  
GRASRUT  
NEBILYER**

# Winim 10-pela yia nating

**Dia Edita,**

Mi wanpela mangi Kabwum na nau mi i stap long Kimbe.

Wari bilong mi em i olsem, taim bilong ileksen i kam klostu olsem na yupela pipel bilong Kabwum i mas lukluk gut na makim lida.

Ol pipel bilong Kabwum, em i taim long makim wanpela gutpela lida long bringim ol sevis insait long Kabwum.

**DICK KANAU  
KIMBE  
WNB**

**MEDIA COUNCIL  
OF PAPUA NEW GUINEA**

## TEAM LEADER

The Media Council of PNG (MCPNG) is seeking to recruit a Team Leader to head the implementation group managing the Media for Development Initiative (MDI), Component 1.

MDI is designed to support an open and democratic media in PNG with aims to build the capacity of the media sector by helping to address issues of access, content and voice. Funding for the project comes from AusAID, MDI is managed through a Partnership between the Media Council of PNG and the Governments of PNG and Australia.

The position of Team Leader involves development and implementation of strategic plans and programme policy, management of a small team, overseeing a grants facility, and reporting to relevant bodies including the MDI Advisory Board, AusAID and the Media Council of PNG

The successful applicant will possess:

- A university degree in an appropriate discipline, such as public sector management, business management, development studies, education;
- Significant experience in managing people, resources, finances;
- Substantial work experience in a variety of environments, eg. Government, NGOs, private sector, donors;
- Excellent English language skills; in writing, on the phone, negotiating, at meetings;
- Demonstrated success working in a small team;
- Strong analytical, organisational, inter-personal skills;
- Must possess high-level people management skills;

An interest and /or background in the Media would be an advantage.

Interested persons will need to complete the relevant application documentation.

For further information contact the Media Council of PNG on 3233740 or 3233512 or email [jhkill@mediacouncil.org.pg](mailto:jhkill@mediacouncil.org.pg) or [hjustin@online.net.pg](mailto:hjustin@online.net.pg)

**Closing Date: Friday 20<sup>th</sup> of April 2007**




Yu laik autim tingting bilong yu -  
Salim wanpela pas i kam long Edita long:

Ol Pas i go long Edita  
P. O. Box 1982 BOROKO, NCD

Sapos yu save long email, yu ken salim pas bilong yu i kam long:  
[editorial@wantok.com.pg](mailto:editorial@wantok.com.pg)

Yu mas raitim tru tru nem, telepon namba na pos opis bokis bilong yu. Sapos nogat, mipela i no inap putim pas bilong yu insait long pepa.  
Wantok i gat rait long katim o stretim ol pas bai em i bihainim olgeta lo bilong niuspepa.





KOMENTRI

Votim man i gat maus na strong bilong makim pipel

DISPELA wik long Tunde las sindaun bilong dispela Palamen i bin kamap. Tasol i nogat planti memba i bin soim pes long kirapim wok bilong dispela bikpela haus tambaran bilong yumi. Nogat tru.

Na bikos i nogat inap memba i stap insait long semba, spika i surikim palamen sindaun i kam long aste, Trinde.

Ating dispela sindaun na wokabaut bilong ol memba bilong yumi i soim klia strong bilong Nesenel Palamen long mekimsave long ol memba taim ol i no makim gut maus bilong ol pipel.

I tru olsem planti ol memba mipela i save lukim long EMTV long taim bilong askim i save sindaun mauspas tasol. Sampela i save silip na wan wan taim bai yu harim sampela i save pulim nus tu.

Olsem wanem na dispela pasin i save kamap? I nogat tru wanpela wok bilong ol memba bilong mekim? I mobeta yumi ol pipel i mas glasim gut tru wokabaut na wok bilong wan wan ol memba bilong yumi insait long Nesenel Palamen.

Yumi mas klia nau olsem taim yumi laik makim 1, 2 na 3 bilong votim manmeri bilong makim yumi insait long 5-pela yia i kam, yumi mas luksave long strong bilong em long toktok makim yumi na strong bilong em long sanap insait long bikpela haus tambaran na paitim toktok i go kam.

Noken votim ol man husat i save tok gris long taim bilong kempein tasol na taim ol i winim opis, bai yu no inap lukim nuspes bilong ol o harim nek bilong ol i pairap insait long palamen.

Ating em i taim tu long dispela opis bilong spika bilong palamen i mas sanapim ol strongpela mekimsave tru i stap long husat memba bilong palamen i no sindaun long olgeta palamen sindaun insait long wan wan yia. Sapos memba i no kamap long palamen, noken givim pe ol i save kisim long go sindaun.

Yumi nidim ol mausman husat i gat belwari long yumi ol pipel. I no ol lida husat i save go silip insait long palamen sesen.




Skelim gut oda namba wan

YUMI harim olsem ol polisman yet i paitim wanpela bosman bilong ol yet nogut tru long Mosbi long mun i go pinis. Ol i no soim pasin bilong luksave long level bilong man o meri long wok bilong ol insait long polis fos. Ol i paitim em tasol olsem wanpela nupela polisman o wanpela ausait man.

Samting i kamap pinis na go long han bilong lo pinis we kot i wok long harim toktok bilong ol dispela lain husat i paitim dispela bikman bilong polis. Dispela bikman bilong polis em yumi planti i save em loya bilong polis fos husat i go pas olsem Dairekta bilong Prosekyusen, Thomas Eluh.

Yumi skelim pasin nau long opis bilong polis fos we yumi ol pablik i gat bikpela luksave olsem em opis bilong karimaut wok bilong strongim lo na oda insait long kantri. Yumi save olsem wanem hevi i kamap



bai ol polisman i stap long stretim olsem na yumi save amamas long lukim ol polisman bilong mipela i werim yunifom na mekim bikos yumi pilim seif long birua bilong lo na oda.

Ating polis fos i gat sistem o lo bilong bihainim long wok bilong ol tu i stap. Ol mas harim tok bilong ol bos na oltaim abrusim ol stil na trabel pasin we i no ken soim piksa nogut long ai bilong gavman na pablik. Ol i kolim disiplin o oltaim bihainim lo.

Tasol long karimaut oda bilong bos em narapela samting na wok aninit long lo em narapela samting we i mas wok poroman olgeta taim namel long ol polisman wankain tu long ol ami na

woda. Taim bos olsem Komisina o Komanda o opere-sen bos bilong em i givim oda, ol polisman bai go aut na karimaut.

Olsem na taim ol bosman i givim oda olsem, ol mas oltaim poromanim dispela oda bilong ol wantaim luksave bilong lo na oda bai polisman i karimaut oda bihainim luksave bilong lo. Nogut em karimaut oda bilong bos na wanpela lek bilong em abrusim mak bilong lo na em bai popaia nau. Em nau bai pablik i ting olsem bosman i givim oda long wokman i go het na kukim ol haus na kilim ol pik dok na ol samting long ples.

Olgeta samting ol polisman save mekim em pablik save ting olsem ol i karimaut oda bilong bikbos. Na bikbos i karimaut oda bilong gavman. Olsem na sapos kaikai bilong dispela oda i krangi long tam-bolo, orait pipel i ting olsem samting i kam long antap long

het na kam daun.

Insait long ol polis fos na ami o woda em olgeta samting em mas bihainim oda bilong bikbos. Olsem na long dispela as, sapos bosman i givim oda wantaim gutpela tingting na luksave bilong kamapim gutpela ansa long dispela oda, orait polisman tu bai kamapim gutpela wok bilong em. Sapos oda i kam wantaim paia, em nau bai wokman tu bai laitim paia.

Planti taim ol pablik i save kotim polis fos long ol bagarap na hevi ol save kisim long han bilong polis. Na taim Kot i skelim olsem ol i no bihainim oda na lo, orait em save makim kompensesen. Ating gavman i peim planti kompensesen pinis long dispela. Olsem na bikpela samting em save stat long taim bosman i givim namba wan oda na kaikai bilong wok save kamap. Gutpela o nogut em stat long oda namba wan.

Sios em wanem samting?

"Tasol God i mekim yupela pinis na yupela i stap lain manmeri bilong em stret. Yupela i stap ol pris bilong lain bilong king. Yupela i stap lain manmeri i Holi, em ol lain manmeri tru bilong God.

Yupela i stap lain manmeri God i bin makim bilong em yet" 1 Pita 2:9

Planti manmeri long ol sios bilong yumi ol i no save gut sios em wanem samting. Olsem na ol i no save wanem wok sios i mas mekim long dispela graun. God i bin makim yumi bai yumi stap lain manmeri bilong em stret. Dispela em i bikpela samting tru. God i ting wanem long sios bilong em? Sios i mas ting wanem long em yet. Long namba wan hap bilong dispela buk yumi laik save long tok bilong Baibel long sios. Tasol pastaim yumi mas mekim klia as toktok bilong dispela tok, "sios."

As toktok bilong dispela tok "sios."

Tude dispela tok "Sios" i gat kain kain as toktok. Na sampela as i narakain long as toktok bilong "sios" long Baibel.

Sampela manmeri i ting sios em i haus lotu. Tasol Baibel i no yusim dispela tok sios taim em i tok long haus lotu. Long Nupela Testamen as toktok bilong sios



em i wanpela lain manmeri. Em i no haus.

Yumi save tok long Baptis Sios o Roman Katolik Sios. As toktok bilong dispela tok sios em i olsem. Sampela lain Kristen long planti ples ol i holim wankain bilip long ol as tok bilong Baibel.

Tasol long Nupela Testamen i nogat kain kain sios i bihainim kain kain bilip. Baibel i no yusim sios olsem.

Wanem as toktok bilong tok sios long Baibel? Long tok ples Greek, as toktok bilong sios em i wanpela lain manmeri i bung wantaim olsem na as bilong tok sios long Nupela Testamen em i olsem: "Ol manmeri bilong God i bung wantaim."

Long Nupela Testamen sios i gat tupela as toktok.

Sampela taim as toktok bilong sios em i olgeta manmeri bilip long krais. Olgeta disaipel tru bilong krais ol i stap insait long sios. Long Matyu 16:18 na Efesus 1:22-23 mining bilong sios i olsem.

Sampela taim long Nupela Testamen as toktok bilong sios em i wanpela lain kristen i bung long wanpela ples. Long 1 Korin1:12, Aposel 14:23, Rom 16:5 mining bilong sios i olsem.

Long dispela WantokNiuspepa bai yumi yusim tok sios olsem Baibel i save yusim. Bai yumi tok long ol lain manmeri bilong God i bung wantaim. Taim yumi tok long ol sios long ples (Sampela lain kristen i bung long sampela ples). Taim yumi tok long sios, yumi no tok long haus lotu o wanpela lain Kristen i holim wanpela kain bilip.

Orait, Baibel i tok wanem long ol dispela sios o lain manmeri bilong God i stap insait long bikpela sios bilong God?

Nupela Testamen i gat sampela tok piksa bilong tok save long sios.

Baibel i yusim sampela tok piksa long mekim klia mining bilong tok sios na tok save long pasin bilong sios. Ol manmeri long olgeta hap graun ol inap long save gut as toktok bilong ol dispela tok piksa. Holi Spirit i save yusim tok piksa i klia long olgeta kain manmeri bilong lainim yumi long sios. Em i no save yusim bikpela na longpela tok. Bai yumi tingting long ol bikpela samting yumi i ken lainim long

ol dispela tok Holi Spirit i save autim.

Sios em ol manmeri o famili bilong God.

Ol Kristen ol i manmeri bilong God stret. (1Pita 2:9-10). Ol i pas wantaim God olsem wanpela pikinini i pas wantaim papa bilong em (Ro 8:16-17; Ga 4:6-7).

God i laikim tru sios bilong em. Em i save lukautim sios na givim em yet bilong helpim sios. Em i save stretim pasin bilong sios olsem gutpela papa (1 Jo 3:1; Mat 6:25-34; Hi 12:6-11.)

Olsem na olgeta kristen tru ol i stap brata na susa long Krais. Yumi wan lain na wan blut wantaim olgeta manmeri bilong God (Efesus 2:11-19; Ga 3:28; 1K 3:10) olsem na pasin bilong sori em i bikpela mak bilong wokabaut bilong ol kristen long ol sios wan wan (Jo 13:34-35). Ol kristen bai i lukautim ol brata na helpim ol brata i sot long samting, olsem na papa God i save lukautim na helpim ol (Rom 14:13-23; 1Jon3:17-18).

Dispela tok i lainim yumi tu i gat wanpela rot tasol bai yumi ken kam insait long sios. Yumi mas bilip long krais na kisim em. I nogat narapela rot bilong kamap pikinini bilong God (Jo 1:12-13). Olgeta man i no bilong lain manmeri bilong God.



Published Weekly, Thursday, for Word Publishing Company, Ltd.

P.O. Box 1982, Boroko, NCD Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Pe bilong wanpela yia 52 niuspepa

Table with 2 columns: Ples and Air. Rows include PNG, AUSTRALIA, ASIA PACIFIC na JAPAN, AMERICA na EUROPE.

General Manager Elizabeth Koriga

Editor Neville Choi

Published at Section 58, Allotment 3 Office 2, Waigani Drive.

Word Publishing Company limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.





**BANK OF PAPUA NEW GUINEA**

# PRES STETMEN

Long Epril 19, 1975, Papua Niugini kamapim moni bilong em yet Kina na Toea. Dispela helpim long strongim yangpela kantri bilong yumi. Olsem tasol nesanel flek, nesanel singsing, na nesanel kres, Kina na Toea em wanpela nesanel mak we soim kalsa na tredisen bilong yumi.

Kina kisim nem bilong em long wanpela sel yumi save yusim olsem moni long taim bipo long ol hap bilong Hailans na Momase. Toea (long tokples Motu em ol tok olsem toya) kisim nem bilong em long wanpela paspas ol manmeri save bilas wantaim long ol nambis hap bilong Papua.

Pastaim yumi save printim moni bilong yumi long pepa substret (paper substrate). Nau yumi save printim long polima substret (polymer substrate). Long 1998 yumi printim K50 na long 2005 yumi printim K100, na yumi bungim ol tredisenel disain wantaim ol disain em i no tredisensel. Palamen save stap long fran bilong ol dispela pepa moni. Dispela soim piksa olsem yumi wanpela kantri, husat save wok bung wantaim long gro.

Tude, Epril 19, 2007, makim namba 32 krismas bilong Kina na Toea. Long makim dispela taim, Gavana bilong Benk bilong Papua Niugini, Mista L. Wilson Kamit, i tokaut olsem bai yumi gat wanpela nupela K2 pepa moni.

## 1. Fran



Bai ol i daunim sais bilong Papua Niugini Nesanel Kres. Dispela em piksa bilong Pisin bilong Paradais sindaun antap long wanpela Kundu (dram) na wanpela spia, na Palamen Haus we i soim piksa bilong wanpela kantri na wok bung wantaim.

Disain we i raunim Palamen Haus, Nesanel Kres, na namba, i olsem ol lokel disain we ol mekim long stail bilong tude. Ol dispela disain i no makim, o tokaut long wanpela samting.

## 2. Baksait.



Baksait bilong dispela pepa moni i gat olgeta disain olpela K2 pepa moni bin gat.

- I Tamiok bilong Maunten Hagen
- I Paspas (Toea) bilong Sentral Provins
- I Tit bilong dok bilong hap bilong Bogenvil, na
- I Kleypot bilong Sepik Provins

ken lukim ol liklik disain gen we bihainim stail bilong:

- I Tapa bilong Oro Provins
- I West Ben bilong Galp Provins
- I Kanu bilong Trobriand Ailans
- I Sil bilong hap bilong Sepik
- I Kanu bilong Wes Sepik
- I Sil bilong Madang, na
- I Ol stik bilong Huon Galp long Morobe Provins.

## 3. Bikpela bilong em:

Bikpela bilong dispela pepa moni em 70 x 140 milimita na ol printim long polima substret.

## 4. Kala bilong em:

Ol bungim ol kala olsem grin, blu, na sampela hap em gol.

Ol printim dispela pepa moni long polima na dispela em ol sekyuriti samting ol putim long em long stopim ol lain nogut long kamapim ol giaman K2 pepa moni:-

- 1: Kompleks Kliia Windo (Complex Clear Window) - I gat wanpela liklik hap olsem windo long dispela pepa moni. Dispela windo em i kliia o yu ken lukluk i go long arapela sait bilong pepa moni. Dispela kliia hap i gat sain bilong Benk bilong Papua Niugini.
- 2: Sedo Imis (Shadow Image) - I gat wanpela mak bilong logo bilong Benk bilong Papua Niugini we yu inap lukim sapos yu apim na lukluk long em aninit long lait.
- 3: G-Swis Fitsa (G-Switch Feature) - I gat g-swis long fran na baksait bilong pepa moni, na sapos yu holim pepa moni aninit long lait, kala bilong em bai senis.
- 4: Embos (Emboss) - Namba "2" i stap long wanpela narapela kliia windo.
- 5: Opset (Offset) - Ol sekyuriti disain we ol i printim wantaim ol kain kain kala bilong renbo.
- 6: Intagalio - Ol yusim intagalio stail bilong print long fran bilong pepa moni.
- 7: Iridisen Fitsa (Iridescent Feature) - Sapos yu holim pepa moni wanpela we o narapela we bai yu lukim kala bilong Pisin bilong Paradais long baksait bilong pepa moni senis.
- 8: Ol Sirel Namba - I gat ol bilakpela namba we i save lait sapos yu putim aninit long altra vaiilet (ultra violet) lait.

Bai yumi stat yusim nupela K2 pepa moni long Kina na Toea de, Epril 19, 2007. Bai yumi yusim tu olpela K2 pepa moni tasol isi isi bai yumi rausim inap yumi yusim nupela tasol.

Tude em i narapela bikpela de long histori bilong stori bilong moni bilong Papua Niugini.

Wan (1t) na tu (2t) toea em yumi bai stop yusim tude.

L. Wilson Kamit, CBE  
Gavana





# TOK PISIN NEWS

from Radio Australia

radioaustralia.net.au

Harim TOK PISIN long  
Radio Australia  
**101.9FM**  
Port Moresby

**Tok Pisin Service**  
6am - 7am 6080; 7240(KHZ)  
7pm - 9pm 5995; 6020; 9710; 1280(KHZ)



**WARI LONG PIKININI:** Dispela meri i ron i go holim pasim pikinini bilong em husat em i wanpela sumatin bilong Virginia Yunivesiti long Amerika we wanpela man i bin karim gan i go insait na kilim dai ol sumatin na manmeri bipo long em i kilim em yet.  
(AP FOTO/STEVE HELBER I KAM LONG AAP IMAGES)

**Man kilim dai 33 pipel long Amerika Yunivesiti**

SAMTING olsem 22 pipel i bin dai taim wanpela man i karim gan na go sutim ol natim insait long wanpela yunivesiti long Amerika.

Samting olsem 30 narapela i kisim bagarap, sampela ol i kisim bikpela bagarap tru.

Taim Tracy Bowden i salim ripot i kam, polis i traim long painimaut olsem wanem tru na dispela birua i bin kamap.

Polis i bin kwik taim go long Virginia Teck kempus, samting olsem 4-pela awa saut wes bilong Wasington (Washington DC), taim ol i kisim ripot bilong ol gan pait.

Insait long tupela ol 'sutaut' long kempus, wanpela i bin kamap insait long wanpela domitori o haus slip na narapela insait long wanpela klasrum.

Leftenen Wendell Flichum bilong polis dipatmen long yunivesiti i tok ol i no save yet husat dispela man wantaim gan i bin sutim dai ol sumatin.

Polis i tok dispela gan man tu i dai pinis, tasol ol i no save husat i bin sutim em i dai.



**NATIONAL CAPITAL DISTRICT COMMISSION**  
REGULATORY SERVICES DEPARTMENT

**PUBLIC NOTICE**

**Establishment of New Educational Institutions**

The Department of Regulatory Services of the National Capital District Commission (NCDC) wishes to advise all those who intend to establish new educational institutions to obtain necessary statutory approvals from the NCD Physical Planning Board and the Building Board under the Physical Planning Act and the Building Act (Chapter 301) respectively.

Listed below are the minimum site areas requirements laid down in the Physical Planning Regulation to ensure that the necessary facilities that area required of a school are accommodated within the school area.

- |    |                                  |      |
|----|----------------------------------|------|
| a) | Primary School/Community School  | 2ha  |
| b) | Day High School/Technical School | 8ha  |
| c) | Agricultural Vocational School   | 20ha |

Additionally, the schools must conform to the intended use of the area as specified in the National Capital District Urban Development Plan and the NCDC Zoning Map. That is schools should be established in suitable locations to ensure the established rules, regulations, policies and plans are respected and complied with whilst providing an environment that is safe and conducive for schooling, making sure that the well being and the welfare of the students are safe guard.

On the whole, the Commission has a strong desire and a statutory responsibility to ensure that development in the city is undertaken in an orderly manner to achieve a Vibrant, Attractive, Sustainable and Livable City for all.

**AUTHORISED BY: NCDC MANAGMENT**

**Driti tokaut em i no kisim askim long ol embasi long abrusim ku**

LONG Fiji, Len Fos Komanda Kenol Pita Driti nau i tokaut olsem em i no bin kisim wanpela askim i kam long Amerika, Australia na Briten long kamapim trabel insait long wanpela miting wantaim ol sinia opisa long mun Novemba las yia.

Dispela tripela kantri i sakim ol toktok long ol i bin traim long kamapim sakim Fiji Militari Komanda sampela de bihain long ku i kamap long mun Disemba.

Insait long wanpela toktok em i mekim long ol soldia long Fiji las wik, Kenol Driti i bin tok, Australia Hai Komisina, US Ambeseda na Britis Hai Komisina i bin bungim em pastaim long kamap bilong ami tekova.

Komodo Frank Bainimarama i bin rausim Fiji gavman long Desemba 5 na bihain long en, em yet i bin makim em yet long wok Praim Minista.

Kenol Driti i tok taim em i no kisim wanpela askim long sakim Komodo Bainimarama, em i tokim Pacific Beat progrem dispela kain toktok i ken minim narapela samting olgeta.

**SI PM i go yet long 5-pela de lukluk raun long disasta eria**

SOLOMON Ailans Praim Minista Manasseh Songavare i go het long 5-pela de raun bilong em long rijen we guria na bikpela si bruk i kamapim bikpela bagarap moa long tupela wik i go pinis.

Moa long fopela ten pipel i bin dai na planti moa i nogat haus moa.

Mista Songavare i bin askim ol intanesenel dona lain long stap longpela taim long helpim na kamapim gut gen ol ples we Gizo taun i bin bungim bikpela tru, moa long ol arapela lain.

Em i tok gavman bai glasim tingting sapos bai ol i muvim ol ples manmeri i stap long nambis eria bikos long dispela ol kain taim nogut i ken kamap gen.

Plantu ol viles pipel i stap kem antap long ol maunten bikos ol i ting nogut narapela guria na sunami bai kamap gen.

Tasol ol gavman jiolojis i tok ol i no ting wanpela bikpela guria bai kamap gen long wanem dispela guria bilong dispela mun Epril i bin daunim sampela long ol senis aninit long graun.

Long arapela nius Australia i mekim wok painim long ol soldia blong em.

Wanpela lain bilong Australia Dipatmen bilong Difens i wok long i stap insait long wanpela wok painim bilong lukim wanem ol hevi soldia na polis bilong en inap bungim long helt bilong ol bihainim wok bilong ol.

# Pacific BEAT

4. 5. 6am & 4pm, 5pm  
including sport

Listen to Radio Australia  
**101.9FM Port Moresby**

Radio Australia current affairs programme which focuses on island nations, bringing you morning and evening coverage of Pacific current affairs including interviews with political leaders, newsmakers, and the people who make the Pacific beat.





Save Bilong Helpim



Milleum Developmen Gols (MDG)

Environmen bilong PNG

Papua Niugini gat planti netrol risos olsem ol minarel (gol, wel, kopa), bik bus na solwara risos na ol ples bilong planti kain enimol na plaua we ol arapela kantri i no gat na tu i no planti insait long wol.

Tasol environmen o bus na wara bilong PNG i wok long bungim planti bagarap nau long ol kain pasin olsem insait agrikalsa we ol pipel i rausim diwai na bus long kamapim gaden na maining wok we i yusim ol kain kain marasin, masin na rausim bikpela hap bilong ol bik bus.

Bikpela risos bilong PNG em graun we 97 pesen long olgeta graun insait PNG em ol papa-graun yet i bosim na 3% em gavman i bosim.

Dispela i min gavman i gat limited o liklik pawa long kisim graun long wokim developmen wok we ol mas bungim pastaim ol papagraun long kamapim sampela kain ikonmik wok.

Hevi long sait bilong graun save kamap planti taim na kompensesen planti tai i save banisim developmen long kamap bikos ol daunim strong long wokim invesmen.

Moa long neks wik...

Sotpela Tok Skul

Skrum tok long Infomel' Bisnis

Ol lain salim kaikai, ais blok na dring mas:

- 1. Lukim olsem kaikai i gutpela long man meri long kaikai;
2. Lukim olsem ol redim kaikai gut, kukim kaikai gut na salim insait ol dis we i klin na ol mas sindaun long ples we i klin;
3. Noken karim kaikai ol kukim wantaim ol enimol we i stap laip tu;
4. Noken salim kaikai we i olpela;
5. Noken redim, holim o salim kaikai sapos ol gat sampela sua o skin infeksi;
6. Yusim klin naip, spon, praim pan long redim na salim kaikai;
7. Yusim klin spon, fok long sevim kaikai na noken yusim han bilong yu;
8. Yusim klin wara na tawel long wasim ol fok, spon, naip bihain yu yusim ol;
9. Gat hap kontena we i gat maus long pasim long ol pipel tromoim rabis na;
10. Lukim olsem wara ol yusim long mekim ais blok i orait na i nogat pipia o i doti.

Sapos ol lain kukim na salim kaikai i no bihainim dispela 10-pela samting ol ken bungim fain daunblo o inap long K50.

Moa long neks wik...

Tupela meri go pas long potato projek

TUPELA meri tisa long Madang Provins i go pas long "Making a Living" program bilong Edukesen Dipatmen Skul Kirikulam long groim ol kain swit potato long helpim ol sumatin na komyuniti i kisim moa na gutpela kaikai.

Sharryl Ivahupa em bosmeri bilong Wol Visin Swit Potato projek na Felicity Sebora wanpela tisa bilong Erima Praimeri Skul klostu long Madang Taun i go pas long wok bilong lukautim swit potato projek long skul na tu, tilim ol kain swit potato rop long komyuniti.

Wol Visin Intanesenel long Madang i helpim ol skul long provins long groim ol swit potato aninit long "Making a Living" program bilong Edukesen Dipatmen Skul Kirikulam.

Aninit long "Farmer Evaluation and Multiplication of Sweet Potato" projek bilong Wol Visin, em i helpim ol skul long praimer i go antap long sekonderi

level long bungim ol data o ripot long ol kain swit potato, luksave long ol binatang na sik i save bagarapim ol swit potato na givim ol samting long planim i go long ol papamama bilong ol sumatin na ol ples klostu.

Australia Senta bilong Intanesenel Agrikalsa Risets (ACIAR) i givim fanding na Wol Visin Pasifik i wok bung wantaim Nesenel Agrikalsa Risets Institut (NARI) long go pas long ol program.

Mis Ivahupa i tok rot we skul i bihainim long tilim ol samting long planim i gutpela bikos em i mekim isi long ol komyuniti long kisim wanem ol kain swit potato rop ol i laikim long planim na groim.

Em i tok 42 sumatin bilong Erima Praimeri Skul i bin planim ol potato long ol plot bilong ol na ol i amamas long lukim kaikai we gaden potato i karim long en.


Sampela kaukau em ol i kaikaim na sampela em ol i salim long maket. Em i tok ol sumatin i

amamas tru na kisim sampela ol rop bilong bilong ol swit potato na planim long ol gaden bilong ol long ples.

Em i tok aweanes long tes swit potato planim i wok long kamap bikpela wantaim ol papamama na komyuniti na ol i wok long go katim ol swit potato rop long planim.

"Program i kamapim ol gutpela samting na nau ol komyuniti i gat ol nupela kain swit potato i karim moa na gutpela na bikpela kaikai," Mis Ivahupa i tok. Mis Sebora i tok long planti yia, ol asples i wok long traim kisim ol rop potato long planim na nau, wantaim dispela skul projek, ol kain swit potato i stap klostu long ol na i helpim ol tru.

"Mi bilip olsem bikpela samting em kaukau i stap long helpim pipel i stap laip. Long kain taim olsem nau, em i helpim tru pipel bikos sampela long ol i save karim kaikai na redi hariap, winim ol dispela we pipel i gat pinis long gaden bilong ol," Mis Sebora i



GUTPELA KAIKAI: Gutpela swit potato o kaukau ol sumatin bilong Erima Praimeri Skul long Madang Provins i autim long tes swit potato projek bilong ol.

tok. Wol Visin i wok long ol rurel eria bilong Papua Niugini (PNG) long 30 krismas, moayet, long Madang long karimaut swit potato risets long helpim pipel i gat ol gutpela kain kaukau i ken kamapim ol gutpela kain we i ken

redi long sotpela taim tu. AusAID, hap han bilong Gavman bilong Australia, i givim mani, helpim long karimaut Begasin Bugati Rurel Developmen Projek na tu. Manam Ailan Komyuniti Beis Disasta Menesmen projek.

Moa meri kendidet long jenerel ileksen

Noreen Dada i raitim

RISETS we Yunaitet Nesens Developmen Program (UNDP) sapot projek i givim go long nesenel gavman i soim olsem nupela kain 'developmen' wok long kamap we moa meri i resis insait long 2007 nesenel ileksen.

Tasol maski planti meri wok long resis long ileksen, makim na namba bilong ol meri husat win na go insait long palamen i nogut tru.

UNDP projek risets meri, Enaha Kwa i tok dispela las wik taim em toktok na glasim

wok kamap bilong ol meri long palamen long Papua Niugini (PNG) Ekonomik na Polisi Rivyu bung long Yunivesiti bilong Papua Niugini (UPNG).

Mis Kwa tok olsem long 1992 ileksen, tripela meri kendidet i bin inap long winim ol sia long palamen, long 1997, tupela meri winim sia na long las nesenel long 2002, wanpela meri tasol (Minista bilong Dipatmen bilong Komyuniti Developmen na Memba bilong Mosbi Saut, Dame Carol Kidu) i winim sia.

"I gat askim long gavman mekim spesol to we i holim ol

sia we bai helpim ol meri go insait palamen.

Dispela tu ken helpim ol (gavman) long winim Komenwelt Plen bilong em long Eksen bilong Jenda Ikwality (wankain luksave bilong ol manmeri) we 30 pesen (%) bilong dispela 109 sia em ol meri mas holim," Misis Kwa tok.

Dispela kain tingting long gavman makim hamas sia na holim dispela ol sia long ol meri inap kisim long palamen i bin kirapim planti toktok namel long las yia we ol singaut i kam olsem bekim long i no inap

meri long palamen i long gavman makim 20 pesen (21 sia) long ol meri long palamen.

Plantu lida long gavman na oposisen olsem Oposisen Lida, Peter O'Neil long dispela taim i bin tok ol meri olsem ol man mas wok hat long winim we bilong ol go insait palamen.

Tasol ripot we i kam long risets Misis Kwa i wokim i soim olsem namba bilong ol meri husat i soim laik long resis insait jenerel ileksen i go antap long 50 na moa na i luk olsem dispela em nupela kain samting we bai kamap gen bihain taim insait ol ileksen.

Advertisement for "BE AIDS FREE" coupon competition. Includes text: "Send your coupons to: FTC Production, P.O. BOX 961, BOROKO, NCD. TEL: 3254718 / MOB: 6825865. Win 'Friends That Care' (FTC) music CD's and Return Airfares to anywhere in PNG sponsored by: AIRLINES (PNG) LTD. Question No. 14: Maski planti manmeri i nogat rot long kisim ol marasin we i dia moa long daunim strong bilong HIV/AIDS. I gat ol tritmen i stap we ol i ken yusim long daunim strong bilong sik na mekim mipela i stap longpela taim moa. Tru o nogat? ANSWER: \_\_\_\_\_ Name: \_\_\_\_\_ Sex: \_\_\_\_\_ Age: \_\_\_\_\_ Address: \_\_\_\_\_ Contact: \_\_\_\_\_ PROUD SPONSORS: WANTOK, PNG MICROFINANCE LTD, EDA-RANU Airlines PNG, MAFM YUMFM, NREDE.




**YUMIFM Redio Program**


**Program bilong Wanwan De - Mande - Fraide**

6am - 10am - Sankamap show - Host: Kas.T  
 6:15am - Komuniti Notis Bod  
 6:30am - Nius Hetlains / Bondei grittings  
**STOP & SHOP GES FAIA KOMPETISEN**  
 6:45am - Niuspepa Hetlains  
 7:00am - Major Nius Bulletin - YUMIFM Nius Senta  
 7:15am - Powerhaus Hit prediksen  
 7:30am - **STOP & SHOP GES FAIA KOMPETISEN**  
 8:00am - Major Nius Bulletin - YUMIFM Nius Senta  
 8:15am - YUMIFM Bisnis / Market Ripot  
 8:30am - **STOP & SHOP GES FAIA KOMPETISEN**  
 9:00am - Nius Bulletin - YUMIFM Nius Senta  
 9:15am - Luksave long Komuniti (Redio Pilai)  
 9:30am - **STOP & SHOP GES FAIA KOMPETISEN**  
 9:45am - YUMI PAINIM WOK Segment  
 10:00am - Nius - YUMIFM Nius Senta  
 10am - 2pm - Monin Trek na Belo Pack -  
 10:10am - Lukatim yu yet - Helt toktok - RH Hyper Mart  
 10:15am - Powerhaus Hit Prediksen  
 10:45am - YUMI PAINIM WOK Segment  
 11:00am - Nius - YUMIFM Nius Senta  
 11:10am - Cont'd - Lukauti yu yet - Helt toktok  
 11:30am - Nius Hetlains b'long Belo Taim  
 12:00pm - Major Nius Bulletin - YUMIFM Nius Senta  
 12:10pm - ESI COOK RICE Belo taim Dedikesen  
 12:15pm - Komuniti Notis Bod  
 12:20pm - cont'd ESI COOK Belo taim dedikesen  
 1:00pm - Nius - YUMIFM Nius Senta  
 1:10pm - cont'd ESI COOK RICE Belo taim dedikesen  
 1:15pm - Powerhaus Hit Prediksen  
 2:00pm - Major Nius Bulletin - YUMIFM Nius Senta  
 2pm - 6pm - Avinun Draiv Taim - Host: UNCLE ET  
 2:00pm - 4:00pm (Tunde / Fondei) TOKAUT TOKSTRET  
 2:45pm - YUMI PAINIM WOK Segment  
 3:00pm - Nius - YUMIFM Nius Senta  
 3:10pm - Avinun cruz  
 4:00pm - NIUS - YUMIFM Senta  
 4:10pm - SAUT B'long UNCLE ET - foapela singsing  
 4:30pm - Nius Hetlains  
 4:45pm - YUMI PANIM WOK Segment  
 5:00pm - Nius - YUMIFM Nius Senta  
 5:10pm - 6:00pm - FLAME KULCHA (1 hr)  
 6:00pm - MAJOR NIUS BULLETIN - YUMIFM NIUS Senta  
 6pm - 00am - NAIT BEAT - Host: ANGRA KENNEDY  
 6:10pm - 7:00pm Mon kamap sho  
 6:15pm - Powerhaus Hit Prediksen  
 6:45pm - Komuniti Notis Bod (Toksave wantaim Vaviessie)  
 7:00pm - 9:00pm - COCA COLA GARAMUT  
 9:00pm - 00am - Nait Beat - Isi Cruz long nait  
 00am - 6am - BRUKIM TULAIT SHOW  
 00:00 - Early Monin Taim Cruz (ol lain brukim tulait So)

**BAT helpim ol atis**



•Pening bilong Alex Mebri.



• Tupela man skelim na stori long pening.

Britis Amerikan Tabako (British American Tobacco o BAT) ol holim wāpela eksibisen long lonsim-Galeri PNG (Gallery PNG) long Crowne Plaza Hotel las wik Fonde.

Eksibisen em olsem so, we ol atis i soim ol piksa ol i penim o kisim wantaim kemra, o ol kaving na kain ol narapela samting ol i mekim.

Dispela eksibisen we BAT i go pas long em i helpim ol atis long resim moa long K40,000.

Kopret na Reguletori Afeas Menesa bilong BAT, Augustine Bire i tok olsem

kain eksibisen i bihainim tingting bilong BAT long kamapim ol komyuniti projek.

"Ol PNG lokel menesa i wok bung wantaim ol lokel komyuniti long kamapim gut moa sindaun bilong ol dispela komyuniti," Mista Bire i tok.

As tingting bilong dispela eksibisen em long pulim ol lain insait long kantri yet long baim ol at.

Sampela ol atis husat i bin soim wok bilong ol dispela eksibisen em John Siune, Alex Mebri, Andy Nombri, Ratoos Gary, Jason Pini, John Bom na Daniel Waswas.



**Wanpela stail 'kaving' bilong haus antap long diwai i soim olsem i no oi atis husat save penim piksa tasol i bin stap long dispela eksibisen. Ol poto: WILLIAM NATERA**

**SP WIKLI HIT HIT PARADE**

Date Ending: Saturday: 21/04/07

W/B	L/W	T/W	SONG	ARTIST
1	1	1(16)	Swit Love	Patti Potts Doi
2	2	2(14)	Lite malar	Patti Potts Doi
3	3	3(13)	Auna Fonza	Mogai
4	4	4(4)	Talaigu	Patti Potts Doi
5	5	5(4)	Missing Roses	Moqai
6	6	6(4)	Secret	Daville
7	7	7	Tau Taine	Nahorau'u
11(3)	8	8	Tago Urere	Patti Potts Doi
9	9	9	Tara Wai ?	Taita Maraga
10	10	10(4)	Esi Madi	Taita Maraga
12	11	11	Lady Kairuku	Moqai
0	15	12	Where Stap Love	AnsiomNakikus
13	13	13	Kadis mulai	Junior Insects
15	14	14	Meri Nissan	Giveway stringband of Lonahan
8	12	15	Island Walai	Mr A
0	0	16	Morokea	Gravity
14(4)	16	17	Tehine Moana	Nahorau
16	17	18	au Noho	Nahorau'u
18	18	9	Sangmaia Girl	Daville
20	20	20(4)	Sumi Rere	Lerams of Kagua

**RADIO AUSTRALIA TOK PISIN PROGRAM HARIM LONG: 101.9 FM**

**Radio Australia Tok Pisin Program - MANDE**

**Moning - Nait**

6AM Stesen Op - Nius Hetlain - Musik na ol intaviu  
 6:30AM Nius na Karen Afeas  
 7AM Stesen Pas  
 7PM Stesen Op  
 7:01PM Ol Hetlain na Program Privu  
 7:15PM Spots  
 7:30PM Nius na Karen Afeas  
 8PM Helt  
 8:15PM Musik  
 8:30PM NIUS  
 8:40PM Spots Riplei  
 8:55PM Musik  
 9PM Stesen Pas

**TUNDE**

**Moning - Nait**

6AM Stesen Op - Nius Hetlain - Musik na ol intaviu  
 6:30AM Nius na Karen Afeas  
 7AM Stesen Pas  
 7PM Stesen Op  
 7:01PM Ol Hetlain na Program Privu  
 7:15PM Musik na Chit-Chat  
 7:30PM Nius na Karen Afeas  
 8PM Marna Graun  
 8:15PM Musik/Spots  
 8:30PM NIUS  
 8:40PM Helt Riplei  
 8:55PM Musik  
 9PM Stesen Pas

**TRINDE**

**Moning - Nait**

6AM Stesen Op - Nius Hetlain - Musik na ol intaviu  
 6:30AM Nius na Karen Afeas  
 7AM Stesen Pas  
 7PM Stesen Op  
 7:01PM Ol Hetlain na Program Privu  
 7:15PM Musik na Chit-Chat  
 7:30PM Nius na Karen Afeas  
 8PM Focus  
 8:15PM Musik/Spots  
 8:30PM NIUS  
 8:40PM Marna Graun Riplei  
 8:55PM Musik  
 9PM Stesen Pas

**FONDE**

**Moning - Nait**

6AM Stesen Op - Nius Hetlain - Musik na ol intaviu  
 6:30AM Nius na Karen Afeas  
 7AM Stesen Pas  
 7PM Stesen Op  
 7:01PM Ol Hetlain na Program Privu  
 7:15PM Musik na Chit-Chat  
 7:30PM Nius na Karen Afeas  
 8PM Youth  
 8:15PM Musik/Spots  
 8:30PM NIUS  
 8:40PM Focus Riplei  
 8:55PM Musik  
 9PM Stesen Pas

**FRAIDE**

**Moning - Nait**

6AM Stesen Op - Nius Hetlain - Musik na ol intaviu  
 6:30AM Nius na Karen Afeas  
 7AM Stesen Pas  
 7PM Stesen Op  
 7:01PM Ol Hetlain na Program Privu  
 7:15PM Musik na Chit-Chat  
 7:30PM Nius na Karen Afeas  
 8PM Wantok  
 8:15PM Musik  
 8:30PM NIUS  
 8:40PM Youth Riplei  
 8:55PM Musik  
 9PM Stesen Pas

**SARERE**

**Nait**

7PM Stesen op - Ol Nius Hetlain/Program Privu  
 7:05PM Musik na Chit Chat  
 7:30PM Nius  
 7:40PM Wantok  
 8PM Lokal Ben  
 8:30PM Nius  
 8:40PM Musik/Chit Chat  
 9PM Stesen Pas

**SANDE**

**Nait**

7PM Stesen op - Ol Nius Hetlain/Program Privu  
 7:05PM Musik na Chit Chat  
 7:30PM Nius  
 7:40PM Famili Blong Serah (Redio Plei)  
 8PM Lukluk Bek Long Wik  
 8:30PM Nius  
 8:40PM Musik/Chit Chat  
 9PM Stesen Pas

**TV GAID**

**FONDE 19 APRIL, 2007**

5.29AM STATION OPEN  
 5.30AM G JOYCE MEYER  
 Religious programme  
 6.00AM G TODAY  
 9.00AM G CREFFLO DOLLAR  
 Religious Program  
 9.30AM EMTV PRIME TIME LINE UP  
 2.59PM STATION RE-OPEN

**KIDS KONA**

3.00PM G WIGGLES  
 3.30PM G HI-5  
 4.00PM G HOT SOURCE  
 4.30PM G THE SHAK  
 4.57PM G EMTV TOK SAVE  
 5.00PM G THE SLEEPOVER CLUB  
 .29P G EMTV NEWS UPDATE  
 5.30PM G BERT'S FAMILY FEUD  
 6.00PM G NATIONAL EMTV NEWS  
 6.30PM G A CURRENT AFFAIR  
 6.59PM G NEWS UPDATE IN TOK PISIN  
 7.00PM G TEMPTATION  
 7.30PM G SPORT SCENE

7.57PM G EMTV TOK SAVE  
 8.00PM M 24  
 9.00PM PG THE SIMPSONS  
 The show follows the comical adventures of the Simpson family in the town of Springfield.  
 9.30PM M THE FOOTY SHOW  
 11.00PM G AFL  
 00.10AM G EMTV NEWS REPLAY  
 00.40AM Australia Network

**FRAIDE 20 APRIL, 2007**

5.29AM STATION OPEN  
 5.30AM G JOYCE MEYER  
 Religious programme  
 6.00AM G TODAY  
 9.00AM G CREFFLO DOLLAR  
 Religious Program  
 9.30AM EMTV PRIME TIME LINE UP  
 2.59PM STATION RE-OPEN

**KIDS KONA**

3.00PM G THE EGGS  
 3.30PM G HI-5  
 4.00PM G THE SHAK  
 \*\*new time\*\*

4.30PM G FOREIGN EXCHANGE (Return)  
 4.57PM G EMTV TOK SAVE  
 5.00PM G HOT SOURCE  
 \*\*new time\*\*  
 5.30PM G FISHING NORTH AUSTRALIA  
 6.00PM G NATIONAL EMTV NEWS  
 6.30PM G A CURRENT AFFAIR  
 6.59PM G NEWS UPDATE IN TOK PISIN  
 7.00PM G TEMPTATION  
 7.30PM G RUGBY LEAGUE TEST - AUSTRALIA v NEW ZEALAND  
 Suncorp Stadium, Brisbane.  
 Expert Commentary team: Ray Warren and Andrew Voss, joined by rugby league analysts Peter Sterling, Phil Gould, Matthew Johns and Ben Ikin.  
 9.57PM G EMTV TOK SAVE  
 10.00PM G IN MORESBY TONIGHT  
 \*special time\*  
 10.30PM M SPORTS DISASTERS  
 11.30PM G ICC CRICKET WORLD CUP- AUSTRALIA v NEW ZEALAND  
 3.00AM G ESCAPE WITH ET  
 3.30AM G AUSTRALIA v IRELAND

continues.....

**SARERE 21 APRIL, 2007**

7.30AM AUSTRALIA NETWORK  
 10.30AM PG THE MUSIC JUNGLE  
 The Music Jungle is a mix of the hottest music clips, behind the scenes features plus viewers own performance videos. Hosted by Asha Kuersten.(Premiere)  
 11.30AM G THE SHAK Kids series  
 Midday G TALK TO THE ANIMALS  
 12.30PM G GARDEN GURUS  
 2.00PM G SUPER 14: BRUMBIES v W.FORCE from Canberra  
 4.00PM G THE CAR SHOW  
 4.30PM G THE BOAT SHOW  
 5.00PM G AFL  
 One-hour highlights of the week's football competition.  
 6.00PM G NATIONAL EMTV NEWS  
 6.30PM G AUSTRALIA'S FUNNIEST HOME VIDEO SHOW  
 7.27PM G EMTV TOK SAVE  
 7.40PM G SUPER 14

Live Super 14 action - Waratahs v Highlands From Sydney

10.00PM G IN MORESBY TONIGHT  
 10.30PM G TOTAL RUGBY  
 11.00PM G EMTV NEWS REPLAY  
 11.30PM G ICC CRICKET WORLD CUP: AFRICA v NEW ZEALAND  
 11.40PM G ICC WORLD CUP: SOUTH AFRICA v NEW ZEALAND  
 3.00AM G ESCAPE WITH ET  
 3.30AM G SOUTH AFRICA v NEW ZEALAND continues...

**SANDE 22 APRIL, 2007**

7.30AM EMTV-PRIME TIME LINE UP  
 8.29AM STATION OPEN  
 8.30AM G BUSINESS SUCCESS  
 9.00AM G SUNDAY  
 11.00AM G SUNDAY FOOTY SHOW  
 1.00PM G SURFSPORT: Rip Curl  
 2.00PM G WILD ADVENTURES with David Ireland  
 3.00PM G THE PACIFIC WAY  
 4.00PM G SUNDAY FOOTBALL: EELS v BULLDOGS All the action of the NRL sea-





## TORO

**TORO SAVE RAUN I GO LONG RENBO MAKET NA GO STRET LONG HAP WE OL TARI SAVE SALIM LEMFLEPS...**

**LONG HAP EM BAIM WANPELA BIKEPELA KE LEMFLEPS NA WOKABAUT NA KAIKAI ISI ISI I GO LONG HAUS...**

**EM INO SAYE OLSEM OL GETA DOK BILONG STRIT I BIHAINIM EM LONG SMEL BILONG LEMFLEPS.**

**TORO EM GRIDI STRET... EM KAIKAI OL BUN KANTAIM NA TOK TENKIU LONG OL DOK LONG BSKOTIM EM I GO LONG HAUS.. NOGAT, OL I KIRAP NA RONIM EM..**

**AAAH! GO PAINIM LEMFLEPS BILONG YUPELA YET!!**

**UMN!! NAISWAN!**

**ARRR!!**

## BIABIA

**BIABIA HOSTIM WANPELA PATI NA SALIM INVITESEN I GO LONG GEST BILONG EM...**

**EM TOKIM TAPIS BILONG EM LONG TAPIM INVITESEN I GO LONG OL GEST LONG HOLIDE INN...**

**LONG DE BILONG PATI OLGETA GEST I GO LONG HAIWAWE HOTEL NA WET I STAP...**

**BIABIA TASOL I GO LONG HOLIDE INN NA WETIM OL GEST LONG HAP...**

**BAI MI HOSTIM WANPELA PATI NA SINGAUTIM OLGETA BIKMAN I KAMA NA TOKIM OL OLSEM MI SANAP LONG ILEKSEN...**

**SALIM INVITESEN LONG OLGETA BIG KLAIENTS LONG HOLIDE INN PATI MI BAI HOSTIM...**

**YES BOSS!**

**TAPIS I ABRUS NA TAPIM HAIWAWE HOTEL...**

**MI SPENDIM KIO,000 LONG HOSTIM PATI NA NOGAT WANPELA KAME! OL I GO WE!**

## KANAGE

**KANAGE KOK LONG SINGAIT TAIM RYAN PINI I SWIM...**

**RYAN EM SWIM I GO NA EM WINIM OLGETA WOL KLAS SWIMAS BILONG AUSTRALIA... EM KISIA GOL..**

**AMAMAS I KILIM KANAGE NA EM PANSIM SIMEN WOL BILONG HAUS...**

**BIHAIN LIKLIK KANAGE I PAINIMACAT OLSEM OLGETA PINGA BALONGEM I BRUK PINIS...**

**GORYAN!!**

**GO!!**

**KREK!!**



**As bilong mango kamap olsem ples bilong lukautim sipsip**

Sapos yu man bilong kaikai lem flep i gat wanpela hap yu ken go long en. Dispela hap bai yu lukim ol sampela bik manmeri save go long en. Ol dispela lain em ol save wok long bikpela opis save laikim olsem belo mas kam hariap na bai ol i go na baim lem flep bipo em i pinis. Dispela hap em long Waigani klostu long Morauta Haus namel long ples bilong wokim ol mep na wanpela olpela opis we ol manmeri i no wok moa long en. I no long taim bai dispela hap long as bilong

mango bai kamap olsem ples bilong lukautim ol sipsip.

**Dogs bai win olsem yet o nogat?**

Long wiken wanpela tim bilong Mosbi i win long namba wan gem bilong SP Kap long Mosbi. Dispela win i mekim na ol manmeri long Mosbi i amamas liklik long lukim olsem tim bilong ol i winim las yia sempion tim bilong SP Kap na nau bikpela askim i kamap long wan wan man olsem dispela win i ken kisim ol Dog bilong Mosbi lukim fainel long pinis bilong SP Kap?

**Tok aut tok stret long prais bilong coke**

Ol coke o coca cola lain mas tok

aut na tok stret long wanem prais nau ol i salim long stua. Nau yet yu go long liklik stua o haus kaikai bai yu painim olsem prais bilong coke nau em K2:20 long ken na long 500ml K2:70 we planti ol lain i no save olsem prais i senis pinis. Bikpela askim nau i go long ol lain husat i save wokim ol sof drink insait long kantri long luk-save long dispela hevi, nau yet tu ol sof drink save kam aut sait long kantri i wok long kamap planti nau na prais bilong ol i tambilo stret we ol liklik manmeri i ken baim tasol bikpela ting ting em ol man meri i laik baim PNG made Tasol.

**Olsem em tok win tasol bai yu skelim na tingting.**

## PAINIM NEM INSAIT

M	A	N	U	S	N	A	L	I	A	H	N	E	T	S	E	W
Y	A	M	U	K	S	I	N	O	L	A	R	T	E	K	E	D
I	S	D	E	A	R	M	E	L	A	R	T	N	E	S	P	C
S	R	E	A	E	I	S	S	E	P	I	K	F	T	A	O	N
N	S	B	V	N	C	L	Q	O	I	R	N	E	V	I	K	E
U	N	O	W	R	G	I	A	R	W	P	N	I	O	C	L	S
B	J	R	Q	T	S	U	F	N	H	I	F	A	T	V	I	N
R	B	O	G	E	N	V	I	L	C	O	H	S	I	D	B	A
I	C	M	S	U	B	R	W	E	T	K	N	E	M	N	Y	L
T	E	C	D	I	S	I	M	B	U	L	B	Z	R	U	F	I
E	N	G	A	O	P	E	?	E	S	N	P	V	E	A	C	A
N	T	A	E	L	U	W	S	W	E	H	I	P	D	D	O	H
S	W	R	P	K	I	D	A	L	Y	O	L	F	N	U	N	
W	E	S	N	U	B	R	I	T	E	N	I	A	P	A	N	E
R	E	I	Y	X	N	M	C	F	O	I	M	G	P	S	B	T
T	N	M	S	W	A	I	O	B	N	C	V	F	P	T	C	S
S	A	U	T	E	N	H	A	I	L	A	N	S	O	R	O	I

Painim ol dispela provins bilong yumi:

MANUS	NU AILAN	IS NU BRITEN	WES NU BRITEN
BOGENVIL	MOROBE	MILEN BE	NCD
WESTEN	ORO	IS SEPIK	SANDAUN
MADANG	ENGA	SIMBU	GALP
SENTRAL	WESTEN HAILANS		ISTEN HAILANS
SAUTEN HAILANS			

ANSA BILONG LAS WIK...

A	I	R	N	I	U	G	I	N	I			K	A	G	O	A
P	S		S	I	A	L	E	T								
L		E														
E	A		K													
S																
B																
A	I		J													
L	T															
U	I															
S	R															
U																
Y																
T	K															
I	E															
I	S															
I																

ANSA BILONG LAS WIK...

1	6	3	5	8	4	7	2	9
8	7	5	2	9	3	6	4	1
9	4	2	6	1	7	5	8	3
5	1	6	9	3	2	8	7	4
2	3	4	8	7	6	1	9	5
7	8	9	1	4	5	2	3	6
6	5	7	3	2	9	4	1	8
3	2	8	4	5	1	9	6	7
4	9	1	7	6	8	3	5	2

			5	6	7	1		4
				9	1	2		
1			4			5	8	6
	3				6			9
4	5						6	1
6			9				5	
8	2	3				9		5
		4	6	3				
9		5	2	8	4			

Ol ansa bai kamaut long neks wik so putim was long neks wik pepa!!

## EMTV TV GAID

son>Your expert commentary team: Ray Warren and Andrew Voss joined by rugby league analysts Peter Sterling, Phil Gould, Matthew Johns and Ben Ikin

6.00PM G NATIONAL EMTV NEWS  
6.30PM G SEVENTH HEAVEN  
7.30PM G 60 MINUTES  
8.27PM G EMTV TOK SAVE  
8.30PM M SUNDAY NIGHT MOVIE: CATCH ME IF YOU CAN (2002) Crime/Drama/Thriller - The true story of a real fake. Based on the true story of Frank Abagnale Jr., a successful con artist who managed to pass himself off as several identities and the FBI agent hot on his trail. Stars: Leonardo Di Caprio, Tom Hanks, Christopher Walken.  
10.30PM G EMTV NEWS REPLAY  
11.00PM G PRAISE  
Midnight Australia Network

MANDE 23 APRIL 2007

5.29AM STATION OPEN  
5.30AM G JOYCE MEYER Religious programme

6.00AM G TODAY  
9.00AM G CREFFLO DOLLAR Religious Program

9.30AM CLASSROOM BROADCAST  
KIDS KONA  
3.00PM G NEW MACDONALD'S FARM  
3.30PM G HI-5  
4.00PM G THE SHAK  
4.30PM G FOREIGN EXCHANGE  
4.57PM G EMTV TOK SAVE  
5.00PM G HOT SOURCE  
5.29PM G EMTV NEWS UPDATE  
5.30PM G BERT'S FAMILY FEUD  
6.00PM G NATIONAL EMTV NEWS  
6.30PM G A CURRENT AFFAIR  
7.00PM G TEMPTATION  
7.27PM G EMTV TOK SAVE  
7.30PM G TOK PIKSA  
8.00PM PG 1 V 100  
9.00PM PG WHAT'S GOOD FOR YOU  
10.00PM G PASTOR KINGAL MIN-ISTRIES: "Anointed For Exploits" Religious Program  
10.30PM G EMTV NEWS REPLAY  
11.00PM G CHM SUPERSOUND

Midnight Australia Network

TUNDE 24 APRIL 2007

7.15AM G TODAY \*special time\*  
9.00AM G CREFFLO DOLLAR Religious Program  
9.30AM G JOYCE MEYER Religious programme  
10.00AM CLASSROOM BROADCAST  
11.30AM EMTV PRIME TIME LINE UP  
2.59PM STATION RE-OPEN  
3.00PM KIDS KONA  
3.00PM G NEW MACDONALD'S FARM  
3.30PM G HI-5  
4.00PM G THE SHAK  
4.30PM G FOREIGN EXCHANGE  
4.57PM G EMTV TOK SAVE  
5.00PM G HOT SOURCE  
5.29PM G EMTV NEWS UPDATE  
5.30PM G BERT'S FAMILY FEUD  
6.00PM G NATIONAL EMTV NEWS  
6.30PM G A CURRENT AFFAIR  
7.00PM G TEMPTATION  
7.30PM G HAUS & HOME

8.27PM G EMTV TOK SAVE  
8.30PM G SP CUP RUGBY: BULLDOGS v WARRORS  
Bring It On: 1 EMTV brings you all the highlights of the Port Moresby games..  
9.30PM PG 20, TO 1  
10.30PM G EMTV NEWS REPLAY  
11.00PM G MCLEOD'S DAUGHTERS  
12.45AM G ICC CRICKET WORLD CUP: SEMI FINAL #2 continues to 830am.....  
Midnight AUSTRALIA NETWORK

TRINDE 25 APRIL 2007

8.30AM G TODAY \*\*special time\*  
9.00AM G CREFFLO DOLLAR Religious Program  
9.30AM G JOYCE MEYER  
\*\*special time\*\* Religious programme  
10.00AM CLASSROOM BROADCAST  
2.59PM STATION RE-OPEN  
11.30AM EMTV PRIME TIME LINE UP  
2.59PM STATION RE-OPEN  
3.00PM KIDS KONA  
3.00PM G NEW MACDONALD'S FARM

3.30PM G HI-5  
4.00PM G THE SHAK  
4.30PM G FOREIGN EXCHANGE  
4.57PM G EMTV TOK SAVE  
5.00PM G HOT SOURCE  
5.29PM G EMTV NEWS UPDATE  
5.30PM G BERT'S FAMILY FEUD  
6.00PM G NATIONAL EMTV NEWS  
6.30PM G A CURRENT AFFAIR  
6.59PM G NEWS UPDATE IN TOK PISIN  
7.00PM G TEMPTATION  
7.27PM G EMTV TOK SAVE  
7.30PM G MCLEOD'S DAUGHTERS:  
8.30PM M I SHOULDN'T BE ALIVE  
A thrilling new series with terrifying, true stories of human endurance and the will to survive - narrated by Charles Woolley.  
9.30PM M WEDNESDAY NIGHT MOVIE: SPAWN (1997) Thriller/Action/Fantasy/Horror - A mercenary is killed, but comes back from Hell as a reluctant soldier of the Devil. Stars: Michael Jai White, John Leguizamo, Martin Sheen  
11.30PM G ICC CRICKET WORLD CUP: SEMI FINAL #2 continues to 7.30am.....





# Nupela megasin bilong UPNG

**TINGIM** dispela gutpela sumatin nius na entatenmen niuspepa bilong ol jenalisim sumatin bilong Yunivesiti bilong Papua Niugini (UPNG), ol save kolim Uni Tavour?

Dispela niuspepa i no autim wanpela isyu long tripela yia go pinis nau. Tasol ol jenalisim sumatin i gat dispela tingting long tok 'noken tok em dai yet' na i kamapim wanpela nupela megasin.

Pefoming Ats Nius em entatenmen kala megasin we ol drama na musik ats sumatin husat i stadim jenalisim bilong UPNG i kamapim

Dispela megasin i tokaut long ol nius we i kamap long yunivesiti na entatenmen nius long ol sumatin husat i hangere long ridim ol kain kain infomesen.

Ol het tok long namba wan isyu bilong Mas i samting we i klostu long lewa bilong mi, Ats na PNG musik we insait ol 'dok pait' bilong ol toktok, ol pefoming ats sumatin tokaut strong agensim stren long kamapim Musik Sumatin Asosiesen we ol pret dispela bai bagarapim ol sans ol gat long wokim ol prodaksen.

Ol pefoming ats na musik sumatin i kam aninit long Melanesian Institut bilong Ats na Komyunikesen (MIAC) insait long Skul bilong Humentis na Sosel Saiens we skul i luksave long Krietiv Ats progrem (we ol pinisim sampela yia i go pinis) na Jenalisim progrem we ol bin laik pinisim tasol aninit long administresen bilong bipo Vais Sansela, Profesa Les Eastcott i strong long lukim go het.

Wantaim tok orait bilong ol pablisa bilong Pefoming Ats Nius (PAN) na edita bilong em, Luther Scat Lamang, Glasim Musik i ken autim sampela bilong dispela infomesen insait long dispela nupela megasin olsem ripot bilong Musik Sumatin Asosiesen we i kirapim planti toktok long wanpela bung las mun.

Siaman bilong bung na fainal yia musik sumatin, Richard Masi i tok ol sumatin

i gat inap memba long rejistaim wanpela asosiesen wantaim Spots na Rekriesenel Opis (SARO) tasol sampela sumatin i ting olsem nupela asosiesen long ol sumatin stadim musik bai bagarapim ol pefoming ats prodaksen.

Taim mi lainim long kain 'asosiesen' ol musik sumatin i laik kamapim, mi tingting sapos em bai go gut wantaim ol plen na wok bilong ol pefoming ats sumatin.

Ol pefoming ats sumatin i bekim wantaim askim, "Wanem samting musik i wokim em yet long kirapim asosiesen bilong em yet? Dispela bai gat bikpela bagarap long stren long sait bilong mani na sindaun bilong ol sumatin."

PAN ripot tok olsem namba tu yia stadi sumatin,



**RAIT NEK:** Florence, meri husat i bin winim 2006 Ice Discovered i singim PNG Nesanel Entem long stat bilong SP Kap gem 2007. Kain nek we planti manmeri i save laik harim i bin pairap dispela taim.

i pairap strong tru long yunivesiti, ol ples arere long en na sampela hap long siti.

Kempes FM i save putim gutpela entatenmen we ol sumatin husat stadim jenalisim i ronim na win stori bilong em bai go het sapos ol sumatin na leksara bilong ol i lukautim gut ol masin we ol ausait ogenaisesen olsem Midia Kaunsel i helpim long givim.

Sampela taim ol save askim mi long toktok long redio bilong ol na mi amamas long stap insait long dispela developmen hap bilong givim jenalisim trening long UPNG.

Sapos Kempes FM i no inap stretim sampela wari long redio, Pefoming Ats Nius bai helpim long raitim long ol kain kain samting long putim insait long ol pes bilong en. Insait long dispela Mas

em tok bai i no inap gutpela long yunivesiti.

Luther i kamapim tu wanpela asples musik grup we i profailim tu ol pefoming ats sumatin na wok manmeri bilong Melanesian Institut bilong Ats na Komyunikesen we Luther tok ol kamapim grup 12-pela mun i go pinis long givim luksave long wanpela leksara bilong ol.

Em kamapim Profail 2006 long givim luksave long Daniel Jonerdhagtt, musik leksara long UPNG husat i save singsing, raitim singsing, stretim musik na danis.

Ben i bungim ol asples PNG musik wantaim ol musik long intanesenel maket, mekim ol wokim ol samting we i narakain long ol arapela bipo ben stren i kamapim.

Kirap bilong Profail 2006 i gutpela tingting na sapos ol gat strongpela bilip long wanem samting ol ken wokim, ben i inap long bihainim kain wokabaut bilong ol ben olsem Sanguma na Tambaran Kalsa we bipo memba bilong Sanguma, Tong Subam i nau wok wantaim stren.

PAN gat sampela gutpela samting insait long en olsem tok pani, samting we i kamap long bipo we i no stret, poem, toktok ol arapela i wokim, yunivesiti na sumatin nius, toksave bod, musik profail, ol pas we i kamap insait long 8-pela pes bilong em.

Sampela toktok go raun olsem megasin bai givim fri advertising spes tasol tingting bilong mi em, taim em i megasin ol sumatin yet i wokim, i mas gat sampela mani we ol bungim long stretim sait bilong prinim megasin.

Dispela megasin save kam aut olgeta mun we Yunivesiti Pres i prinim; namba tu isyu bai kam aut dispela mun. Lukim olsem yu painim na kisim wanpela kopi bikos olsem mi, yu bai laikim tu.



**SOIM STAIL:** Ol boi nogut bilong 9-Mail bras ben i bin stap long amamasim stat bilong SP Kap 2007. Poto i soim ol i hatim skin stret-long soim stail bilong ol long pilaim bras ben.

Luther i tok em bai moabeta sapos ol rejistaim grup olsem sab-afiliet bilong Pefoming Ats Sumatin Asosiesen (PASA) sapos ol sumatin i laik.

"Musik na tieta (drama) i go wantaim long wokim ol so na bruk long PASA bai i no inap gutpela tingting," Luther i tok strong.

PAN tok musik na tieta ats

aninit long bikpela nem pefoming ats i kirapim planti toktok long yunivesiti taim ol kamapim gen ol so las yia long Ullie Beier tieta, we ol sumatin kamapim tripela so na kisim gutpela bekim.

Tasol i gat planti gutpela moa samting long dispela nupela sumatin megasin we em kamap na kisim ples bilong Uni Tavour.

Long las tripela yia nau mi

no kisim wanpela gutpela toksave watpo Uni Tavour i no moa kam aut tasol mi ting i no inap mani i bikpela as bikos i no bin gat ol jenalisim sumatin husat soim laik long raitim stori long pepa bilong ol we nem i kam long Kuanua tokples.

Ol jenalisim sumatin yet i raitim ol stori na i save autim pepa na long wankain taim tu, kamapim Kempes FM, we

isyu tu, ol ripot i tok aut strong agensim nogat stes lait insait long Ullie Beier tieta we i banisim ol pefoming ats prodaksen long kamap insait 2007.

PAN i tok meri husat go pas long ronim tieta ats, Sophie Naime tok sapos ol stage lait i no kam bek hariap, ol bai mekim ol prodaksen ausait long kempes we

**Yu ken lukim ol musik stori bilong Glasim Musik insait tasol long The National olgeta Mande.**


## ENROL LONG NUPELA ILEKTOREL ROL NAU!!

## NOGUT, YU NO INAP VOT!

### Vot bilong yu bai senisim sindaun bilong yumi na PNG!



**YU GAT TRIPELA SANS LONG VOTIM GUTPELA LIDA!**





# Tok pilai wantaim Kanage olgeta wik!!

I stat nau...



**A**nkol Kanage em wanpela ankol abilong dinau stret long ol liklik taka boks long haus yet. Ankol Kanage i wok long mekim dispela dinau pasin bilong em i go na ol stua kipa i bel kas kas long em pinis.

Taim ol stoa kipa i lukim olsem ankol

Kanage i kam long stua bilong ol, ol i save hait o go arasait. Wanpela taim ankol Kanage i go long dinau long wanpela taka boks we em i gat step leda long en i stap.

Stua kipa em i lukim Kanage long we yet na em i go hait aninit long kaunta. Ankol Kanage i kam lukim olsem nogat stua kipa tasol em i save olsem stua kipa em i hait i stap.

Yu save, ankol Kanage ya, em i giman long pairapim step leda i go daun tasol isi isi tru i kamap antap gen na wetim kipa long kaunta i stap. Taim stoa kipa isi tru apim het long spaim Kanage, ankol Kanage i makim long pinga tasol na tok, "Beng!! Wanpela tinpis i kam."

Ankol Kanage em ankol Kanage. No plei ap.

### UPNG POM SITI

Wanpela nait Mista Johnson wantaim famili bilong em i askim Kanage long go kaikai wantaim ol long Karanas. Taim Kanage kamap, ol i amamasim em na welkamim em i go long kaikai tebol.

Taim ol i sindaun na kaikai i stap, wanpela dok bilong famili i wok long lukluk strong long Kanage i kaikai i stap. Kanage tait long kaikai na em tu lukluk strong long dok i stap. Na Kanage i kirap na askim Mista Johnson bilong wanem na dok bilong em i wok long lukluk strong long em i stap. Mista Johnson i bekim Kanage olsem, "Noken wari long ol. Ol jeles long wanem yu kaikai long plet bilong ol."

### BULOLO MOROBE

Kanage i save stap long Mosbi. Wanpela wiken, boi kalap long balus na go long Rabaul. Em i go long lukim ol bagarap maunten paia i kamapim. Balus i go kamap long Rabaul Ples Balus na Kanage lusim balus na go arasait. Em i lukim wanpela yangpela meri tolai sanap ausait long teminel na em i askim meri long Tok Inglis olsem, "Hey lady, is this Rabaul town?"

Meri tolai kirap na bekim. "Em nau." Kanage paul na askim gen na meri ya i mekim wankain tok-tok. Kanage belhat na tokim dispela yangpela meri Tolai olsem, "Oh no. it seems that she is trying to trap me. This is not Rabaul." Em i tok olsem pinis na kalap long balus na go bek long Mosbi.

Samting tru i olsem Kanage i no save long tok pisin. Em i save long Tok Inglis tasol. Watpo? Bikos em i bilong Papua yah.

### Lapun Hookworm Lae

Kanage go painim buai long Wewak Maket i stap. na harim ol manmeri i singaut nabaut na tok olsem tupela meri i pait long wanpela man. Em i harim olsem na givim 20t i go long wanpela lapun mama na sindaun i go daun long kisim buai. Taim em i wok long kisim buai ol manmeri i singaut moa na bik maus i stap. Kanage harim i go nogat na em i askim lapun mama. Lapun mama i kirap na tokim Kanage. Bipo long taim bilong mipela ol lapun mama mipela i save pait long dispela hap bun bilong pik. Tasol long nau long dispela taim ol wait man i brigim na kamapim kain kain samting. Asua bilong ol wait man na nau tupela yangpela i wok long kros pait long samting ya banana. Kanage ya harim lapun ya tok olsem na em i lap nogut tru. Mama, dispela fasin filong yufela Sifik na mipela i save les. Fikos yufela i no save fihainim lo filong Fafel i staf long Matyu 7:7

### Wantok Man Wewak

Lapun Kanage kus i go tulait na go long haus sik long kisim sampela kus marasin. Em i go kamap long haus sik na wanpela nes meri askim em long wanem kain sik i kisim em. Na Kanage kus wantaim na tokim nes meri: O pikinini, strongpela kus i bagarapim mi stret. Mi no slip long nait. Mi kus i go i go na skin bilong mi i bagarap. Nes meri kirap na

tokim Kanage. Sori tru papa. gayman i sot long mani na mipela tu i sot long kus marasin. Kanage harim olsem na tokim nes. Na bai olsem wanem nau. Mi kam long kisim marasin. Mi no kam long yu tokim mi olsem gavman sot long mani na nogat kus marasin. Nes meri ya tingting i go na tokim Kanage. Maski yu go long haus na painim sampela tumbuna marasin na dring. Kanage belhat na tokim nes meri ya olsem. Sapos mi go long haus na kus i mekimsave long mi, bai mi kam bek long haus sik na kisim yu go long haus na bai yu soim mi we bilong wokim marasin bilong ol waitman.

### Marasin Boi Wewak

Wanpela taim, wanpela soka kompetisen i kamap long Bulolo namel long ol Bulolo Forestri Koles na Wau Sekenderi Skul tim. Planti ol manmeri i lukluk i stap wantaim ol sampela waitman. Tupela tim i no pilai gut olsem na waitman i kirap na tok olsem, "Ol lain pilai deti gem stret." Kanage i harim na em i kirap na i tok, "Tru ya, ol i no was was na ol i kam long pilai."

### Bulolo

Wanpela taim bubu Kanage i go long opis bilong Praim Minista long Waigani. Tasol taim em i kamap long opis ol sekyuriti long hap i laik rausim em long wanem ol i no save olsem em i kam long lukim

Praim Minista. Lapun Kanage i kirap na tokim ol sekyuriti olsem, "Hey, yu ting mi the smol boi ah? Mi the papa to Praim Miniesta ah. Mi the papa ahio ol i les long lalim mi go intait yah. Me mekit the wat." Ol sekyuriti i harim em i toktok na ol lap indai i stap. Ol i bisi long lap na lapun Kanage i go insait hariap tru long opis.

### Gras rut man Waigani

Salim Kanage Tokpilai bilong yu i kam long: Kanage Tokpilai P.O. Box 1982 Boroko, NCD, PNG

## Tingim PNG Jenerel Ileksen 2007!

### Nem bilong yu stap long nupela Iektorol Rol?

HEY TOROI  
YU ENROL TU?  
ILEKSEN I KAM  
KLOSTU NAU!  
YU MAS VOTIM  
GUTPELA LIDA  
BILONG YU.

AIIEE!! MI MAN  
BILONG PLES! PIPIA MAN  
TASOL, NOGAT MAN BAI  
BISI LONG MI!

NOKEN TOK  
OLSEM! VOT  
BILONG YU I GAT  
PAWA!! GO PUTIM  
NEM NAU!!

GO LUKIM  
PROVINSEL ILEKSEN  
MENESA O DISTRIK OPIS  
KLOSTU LONG YU NA  
STRETIM ENROLMEN FOM  
PEPA NAU!



2007 VOTE LPV

**Tingim gut na vot stret long kendidet i gat gutpela tingting!**

Australian Government ANAAD

HIV/AIDS DOES NOT DISCRIMINATE





**NEM:** Adella Nawak  
**KRISMAS:** 19 (meri)  
**ADRES:** Mercy Secondary School, P.O.Box 580, Wewak, E.S.P.  
**SAVE LAIKIM:** Tok pani, danis, lukim muvi na rait go kam wantaim penpren.

**NEM:** Jonathan Paile  
**KRISMAS:** 24 (man)  
**ADRES:** C/- Andrew Api, Vanimo Correctional Service, P.O. Box 124, Vanimo, Sandaun Province.  
**SAVE LAIKIM:** Lukim TV, pilai soka, swim, harim musik na mekim pren.

**NEM:** Joseph Efi  
**KRISMAS:** 22 (man)  
**ADRES:** Joseph Efi, St. Gerard School of Nursing, P.O.Box 7207 Boroko, NCD.  
**SAVE LAIKIM:** Lukim vidio, harim musik, mekim pani wantaim ol pren na bungim nupela pren.

**NEM:** Titus Tepi  
**KRISMAS:** 24 (man)  
**ADRES:** Kokopo Business College, P.O. Box 504, Kokopo, E.N.B.P.  
**SAVE LAIKIM:** Harim musik na pilai spots olsem boxing na taekwando.

**NEM:** John Kon  
**KRISMAS:** 18 (man)  
**ADRES:** St. Joseph Secondary School, P.O.Box 18, Mendi, S.H.P.  
**SAVE LAIKIM:** Bungim ol nupela pren.

**NEM:** Apu Gini  
**KRISMAS:** 23 (man)  
**ADRES:** P.O. Box 2076, Boroko, NCD.  
**SAVE LAIKIM:** Go lotu, ritim Baibel, lukim TV, pilai spots na harim gospel musik.

**NEM:** Extery Thomas  
**KRISMAS:** 18 (man)  
**ADRES:** Bema Lae Post Office, Morobe Province.  
**SAVE LAIKIM:** Raitim pas, mekim pren, go lotu, prea na wokabout long bus.

**NEM:** Mipssel Khay  
**KRISMAS:** 19 (man)  
**ADRES:** Mipssel Khay, Ivingoi OBM, P.O. Box 1289, Goroka, E.H.P.  
**SAVE LAIKIM:** Raitim pas, mekim pren, go lotu, prea na wokabout long bus.

# Panagah lainim ol pleslain long ol meri karim bebi

**BIPO Bipo** tru, long wanpela ples long Siwai insait long sautwes Bogenvil, i bin i gat planti man i stap. Ol dispela lain man i bin lukautim wanpela liklik boi na nem bilong em Panagah. Dispela boi i no bin gat papamama, olsem na taim em i stap em i kamap bikpela man.

Em nau long dispela taim, em i bin marit long dispela ples. Long dispela taim, ol man i save katim bel bilong ol meri long taim ol i laik karim pikinini i stap. Taim ol i katim bel bilong ol meri ol i save dai.

Long wanpela taim nau, meri bilong Panagah i laik karim pikinini, olsem na Panagah i go na sindaun long dua bilong haus. Long taim em i lukluk i go, em i lukim ol man bilong katim bel bilong meri bilong em i kam. Wantu Panagah i singaut, yupela i noken katim bel bilong meri bilong mi.

Tasol ol lain man ya i bekim, mipela i mas katim bel bilong meri bilong yu bai olgeta pen bilong em i pinis. Panagah i no laik bekim tok, olsem na em i pasim dua bilong haus na sindaun i stap.

Liklik taim bihain nau, Panagah i singaut long ol man bilong katim bel na tok, em nau meri i karim pikinini pinis. Bihain em i kam ausait na i tok, yupela i mas mekim olsem: "Yupela ol man i mas go long bus na kisim sampela marasin bilong tumbuna, na givim long meri bai em i karim pikinini kwik".

Long dispela taim, ol i stat long bihainim dispela tok Panagah i bin autim long em bipo i kam inap ol waitman i kam bungim yumi. Na nau yumi i gat haus sik long ol mama i ken karim pikinini.

**KORIKUNU Bogenvil**



# Mi no laik slip wantaim boi pren bilong mi

**Dia Laiplain,**

**Laikim tru.**

Mi wanpela meri husat gat 17 krismas na mi wokim Gret 11. Mi wok long painim wanpela bekim long wari bilong mi.

Mi gat boi pren husat mi stap raun wantaim em long 5-pela yia nau na em i promisim mi em bai maritim mi taim mi pinisim skul bilong mi.

Hevi bilong mi em boi pren bilong mi laik mi slip wantaim em bikos em tok em laikim mi tru. Mi tok nogat long slip wantaim em bikos mi bilip em i no gut na edukesen bilong mi i bikpela samting moa.

Bikos mi no laik slip wantaim em, em tok em bai lusim mi. Tasol mi laikim em tru bikos em wanpela biknem spotsman na em luk nais tru.

Bai mi mekim wanem long senisim tingting bilong boi pren bilong mi?

**Dia Pren,**


Tenkyu long pas bilong yu we yu autim wari bilong yu.

Yu tokim mipela yu gat boi pren husat i lukim long 5-pela yia nau.

Em askim yu long slip wantaim em tasol yu tok nogat long wokim dispela bikos yu bilip dispela i nogut samting na edukesen bilong yu i bikpela moa samting.

Pren, mipela amamas long yu tok nogat long boi pren bilong yu husat i laik slip wantaim yu maski yu tupela i no marit yet.

I gat ol rait taim long wokim wan samting. God i mekim pasin long slip wantaim long wanpela man na meri husat i marit long wokim bikos long bikpela laik ol gat long wanpela arapela na bikos



long laip taim komitmen ol gat.

Mipela i amamas bikos yu luksave na blip olsem edukesen-bilong yu i moa bikpela long wokim pasin long slip wantaim na mipela wan bel wantaim yu long dispela.

Mipela laik autim sam-pela tingting long wanem samting tru em tru lav o bikpela laik.

Yu tokim mipela yu laikim tru boi pren bilong yu bikos em luk nais tru na gat nem insait long spot.

Lavim arapela i moa long wanem samting yu tok long en na wanem samting yu save long en. Dispela ol samting i kam

bihain long pasin, bilip, tingting bilong man o meri. Trupela lav em yu wari na kea long husat yu laikim.

Ritim 1 Corinthians septa 13, ves 4 i go 7: I gat tupela arapela tupela toktok we i go wantaim lav na dispela tupela toktok em lust na infatuation.

Mipela laik yu painim dispela tupela toktok insait long buk we gat mining bilong ol toktok na lukim wanem toktok i sut long prensip bilong yu na boi pren bilong yu.

I luk olsem boi pren bilong yu laik yusim bodi bilong yu na yu tok em bosim yu tumas. Pren, dispela em ol kain pasin yu laik man yu maritim bai gat?

Mipela laik askim yu long traim toktok wantaim em moa strong na sapos em no senis, mipela ting yu kisim strongpela moa eksen na lusim em.

Bai i gat ol arapela mangi husat i stap na bai rispektim yu na disisen yu mekim.

Mipela strongim yu long raun wantaim ol gutpela pren na mipela strongim yu tu long autim wari bilong yu wantaim pasto bilong yu.

**TOKSAVE**

Sapos yu gat wari o hevi, rait i kam long Lifeline, P.O. Box 6047, Boroko, NCD. Yu ken ringim mipela tu long telipon namba 3260011.

Raitim trupela nem na etres bilong yu i kam na bai mipela i salim bekim long pas bilong yu. Mipela bai toktok long ol trupela samting yu askim long em tasol bai mipela i no inap long putim trupela nem bilong yu.

- Laiplain





# Manus raba industri kam bek

WANPELA kampani bilong Malaysia bai kirapim bek driman bilong ol fama husat groim ol raba diwai long Manus taim ol sainim wanbel tok wantaim Manus' Provinsel Administresen long bringim bek industri. Netrol-Risos em dispela kampani we las yia ol sainim dispela wanbel tok na long stat long dispela yia, i stat givim ol mesin long helpim ol pipel stat tepim o katim skin bilong diwai long kisim raba. Administreta bilong provins, Wep Kanawi tok i gat arere long 100

smol holda raba fama insait long provins na Netrol Risos, husat bai kamapim projek na baim tu raba bai helpim ol fama. Mista Kanawi tok bipo ol bin salim ol cut-lemp raba bilong ol go long ol namel lain na long dispela, ol fama i no kisim gutpela helpim. "Taim ol mesin na samting olsem naip, baket na ol arapela samting i kam long Malaysia, ol fama i inap long salim wanem raba ol gat i go long kampani husat bai kisim na salim produs i go ausait long provins."

## Save bai helpim arapela

35 ruel fama long Nawae Distrik bilong Morobe Provins i gat sampela moa save nau we bai helpim ol go aut long distrik long lainim ol pipel long strongim ol yet long wok olsem ol fama. Aninit long Yangpela Didiman program we Lutheran Developmen Sevis i go pas long ronim dispela 35 fama i greduet wantaim ol setifiket bihain long 9-pela mun trening bilong ol. Ol patipen i kam long wan wan viles insait long distrik we Lutheran Developmen Sevis i makim we ol kos bilong ol lainim ol long ol samting olsem gutpela menesmen bilong graun, laipstok menesmen na pis faming. I bin gat tu komyuniti developmen kos we ol patipen i lainim long ol skil long lukautim mani buk bilong ol, helt kea, maikro fainens, maket skil na sosel skil. Dispela kos i namba wan kain kos long kamap long Rabisap viles long Erap-Wain Lokel Level Gavman.

## Nu Ailan luksave long strong bilong ol agrikalsa kibung

NU AILAN Provinsel Gavman i luksave olsem ol kibung na skul woksop long agrikalsa na wok didiman i wok karim planti gutpela kaikai na soim rot long plenim ron bilong agrikalsa sekta insait long provins i go long bihain taim. Dispela luksave bilong NIPG nau i kamap olsem wanpela tok orait bilong makim K160,000 moa long karimaut ol dispela kain woksop long dispela yia. Bihainim planti gutpela tok luksave long strong bilong ol dispela agrikalsa woksop, Nu Ailan Provinsel Eksekutiv Kaunsel i bin sindaunim wanpela spesol miting long Trinde Epril 11 na tok oraitim dispela manim mak long dispela wok. Samting olsem 120 manmeri em ol i makim ol pinis long sindaun long dispela Integretet Agrikalsa na Trening

Program (IATP) na ol agrikalsa woksop long namba tu hap bilong dispela yia. Taim em i tok oraitim polisi sabmisen we i askim long dispela hap manimak, Siaman bilong Praimeri na Industri Netseral Risoses, Alfred Elisha i tok olsem IATP program we em i wanpela wok bung program wantaim Yunivesiti bilong Vudal i senisim laip bilong planti manmeri i bin sindaun long en. Em i tok olsem dispela woksop wantaim ol arapela 2007 provinsel agrikalsa woksop i karim gutpela kaikai tru. Deputi Gavana bilong Nu Ailan Provins Gerson Rabana yet i bin siaman long dispela spesol PEC miting. Planti save manmeri i bilip olsem sapos Papua Niugini i strongim wok agrikalsa bai ekonomi gro gut.

# Baim ol lokel kaikai tasol

## Noreen Dada i raitim


TINGTING i kirap long kamapim wanpela kempen we wok i sut long lukim pablik sapatim baim bilong ol fres gaden kaikai bilong Papua Niugini (PNG) tasol. Dispela kain kempen i wankain long promosen sampela kampani i wokim long skulim pablik long sapatim pasin long baim ol PNG prodak. Long woksop we i kamap long liklik taim i go pinis long Goroka long Isten Hailans Provins ol singaut i kirap long ol manmeri long pilim amamas na noken sem long

baim ol fres gaden kaikai bilong PNG. Ol lain long agrikalsa sekta i wok long lukluk strong nau long lonsim dispela kempen long lukim tu olsem ol fama i gat moa sans long salim ol gaden kaikai bilong ol. Blackey Elo wanpela viles ekstensen opisa i tok planti stua wok long salim ol ovasis gaden kaikai tasol em tok dispela ken senis sapos ol manmeri i kisim strong long baim ol gaden kaikai bilong PNG tasol. "Mipela ken groim hai kwaliti o gutpela fres kaikai we i ken mobeta long ol kaikai

long ovasis," Elo i tok. Mipela mas tingim hat wok ol ruel fama i wokim na givim namba wan tingting i go long givim helpim long sait bilong baim ol lokel gaden kaikai we ol salim long ol maket, em i tok. Em i tok Ol gavman' ejensi olsem Dipatmen bilong Agrikalsa na Laipstok wantaim tu Fres Produs Developmen Ejensi (FPDA) mas go pas long promotim dispela kempen long kamapim fres produs industri we bai helpim long givim moa sans long ol manmeri na yut long kisim sampela kain pe.



PLANIM RAIS: Tupela Yarapos Sekonderi Skul sumatin meri i planim rais. Em wanpela projek skul i strong long wokim na kamap "self reliant" o stap long mak we ol ken lukautim-ol yet.



### COFFEE INDUSTRY CORPORATION LTD

**OL WIKLI MAKET PRAIS - Bilong Wik i pinis long 20/04/07. TINGIM: Olgeta prais i stap long Kina long wan wan kilogram.**

	GREEN BEAN (Delivered-In-Store)					PARCHMENT (Factory Door)			
	ARABICA				ROBUSTA	ARABICA		ROBUSTA	CHERRY
	A	X	PSC-X	Y1	Robusta	Class 1	Class 2	Robusta	Cherry
KAINANTU	NB	NB	-	NB	-	3.90 to 4.00	3.70 to 3.80	-	- to 1.15
GOROKA	7.00 to 8.40	6.50 to 6.90	6.25 to 6.30	5.95 to 6.00	-	3.90 to 4.10	380 to 390	-	- to 1.00
KUNDIAWA	NB	NB	-	NB	-	NA	NA	-	NA
MINI/BANZ	NB	NB	-	NB	-	- to 4.00	3.70 to 3.80	-	- to 1.00
MT. HAGEN	NA	- to 7.10	-	- to 6.10	-	3.60 to 4.00	3.40 to 3.90	-	.95 to 1.03
LAE	NA	NA	NA	NA	-	3.20 to 3.50	NQ	NA	-
ASEKI	NB	NB	-	NB	-	NA	NA	NA	-
AVERAGE	7.70	6.70	6.45	6.01	NQ	3.74	3.54	NA	1.03

NQ: I nogat prais. NB: I no baim. NA: I no gat.

Kopi maket i bin kirap isi isi dispela wik we ol prais i go daun long taim we i no bin i gat bikpela baim na salim. Tasol, dispela sindaun i bin senis long Fonde taim ol namba bilong saplai na diman o laikim i kamaut long ICO na i bin i gat gutpela luksave long en na i bin i gat planti baim. Tasol, ol prais i bin go daun gen long Fraide bikos i gat ol opsen salim i kamap. Ol Arabika kopi prais long Nu Yok i bin pinisim wik 0.9 cents/lb antap moa taim ol robusta prais long London i bin winim \$40/ton (1.8 cents/lb).

### Lukautim Kopi Na Kopi Bai Lukautim Yu





**Bisnis bilong Groim Diwai insait long PNG - Planim diwai long ol renfores eria**

Rot bilong groim ol spisis diwai i save groa insait long PNG

**Azadirachta indica (neem)**

Nem bilong en: neem

Ples diwai i kam long en: Saut na Sautis Esia

Wanem kain diwai:

Longpela bilong em taim em i bikpela i go namel long 15-20 mita. Bikpela bilong em long namel taim em i bikpela i ken go inap 100cm. Diwai bilong em i gat bol inap long 2-5 mita. Em i ken groa namel long ol arapela diwai. Groa bilong em i ken go inap long 5-11 mita insait long 8-pela yia tasol.

Ples we em i save groa:

Em i save groa long ol ples i gat namel long 450 na 1500 milimita ren. Ples hot na kol we em i save laik groa long en em namel lon 9 na 35 digri sentigred. Em i save groa namel long 0 na 1500 mita antap long solwara. Em i ken strong long taim i gat namel long 7 na 8 mun ples drai. Em i save groa gut long ol kain kain graun. Em i no save laikim ol graun i gat planti wara tumas o graun i gat planti wesana long en na i gat planti han wara i ron aninit long graun.

Strong bilong em:

Em i gutpela long groim olsem banis long strongpela win, ren, bilong givim bek gris lon graun na kisim bek graun long ples i gat planti wara long en. Diwai bilong em i gutpela long raunim ol binatang na i gutpela long mekim haus, ol sia na tebol, mekim pepa na paiawut. Olgeta hap bilong dispela diwai em yu ken yusim. Ol sid o pikinini diwai na lip em yu ken mekim gutpela marasin bilong kilim ol kain kain binatang olsem mosquito. Em i gat strong long groa long kain kain graun nogut na ples we i hot na i drai.

Birua bilong em:

**MCCARTHY & ASSOCIATES (FORESTRY) PTY. LTD.**  
National & International Forest Consultants  
mccaf@datec.net.pg

"Long kisim tok stia long olgeta wok diwai"



Lip na plaua bilong neem diwai.

Ol sid o pikinini diwai bilong em i ken bagarap long paia na lusim strong bilong em hariap.

Ol prodak na karim bilong en:

Ol diwai prodak bilong em olsem paiawut na timba. Ol diwai i gat 8-pela krismas i ken mekim namel long 108 na 137 kubik mita long wan wan hekta, maski ol diwai bilong em i ken daun liklik long ol ples we i nogat planti wara long graun. Ol lip bilong em i gutpela marasin. Ol sid i ken kamapim ol marasin bilong kilim ol binatang. Tasol wel bilong em i no gutpela long kaikai. Yu ken kaikaim ol kru bilong em olsem kumu.

Rot bilong groim: Dispela diwai i save groa long ol sidling. Yu mas planim ol sidling bihain long 3 o 4-pela mun na longpela bilong pikinini diwai inap long 50cm. Yu mas rausim ol gras nogut long namba wan sisen long em i groa.

Sid tritmen:

Yu mas rausim skin bilong sid pastaim long yu planim long graun. Yu ken groim ol sid insait long ol neseri pot.

Menesmen:

Bilong kisim piul wut long ol plantesen, yu mas groim diwai we i gat 2.5 mita namel long ol na katim olgeta 5-pela yia. Rotesen bilong piul wut em namel long 8 na 10-pela yia na long kisim timba, namel long 15 na 30 yia.

**Wel pam, pis na kakaruk bai strong moa long Madang**

Mina Evara i raitim

WOK bilong wel pam, piseris na kakaruk bai kamap bikpela insait long Madang Provins.

Dispela em bihain long Madang Provinsel Gavman i sainim wanpela agrimen o tok wanbel wantaim Rurel Developmen Benk (RDB) klostu tupela wik i go pinis.

Ol lain husat i bin go pas long sainim dispela agrimen em Ekting Gavana bilong Madang Bunag Kiup na Menesing Dairekta bilong RDB Richard Maru.

Aninit long dispela agrimen provinsel gavman i putim mani mak olsem K300, 000 bipo long RDB i ken givim mani mak olsem K3 milien long strongim dispela ol wok bilong wel pam, pis na kakaruk insait long Madang.

Aninit tu long dispela agrimen ol i kisim tripela praivet bisnis patna long wok bung wantaim ol ples lain long strongim dispela ol wok didiman.

Dispela ol patna em Ramu Suga long strongim wok wel pam, Frabelle, wanpela kampani long Lae, Morobe Provins, long sait bilong pis na Bangwi long Madang yet long wok bilong Kakaruk.

Mista Kiup i tok olsem ol dispela ol wok i no nupela long provins tasol i no go gut bilong wanem i nogat maket na gutpela sapot bilong ol dispela wok didiman.

Em i tok long dispela as ol i askim praivet bisnis long kam wok bung wantaim ol ples lain.

"Wantaim praivet bisnis, bai ol ples lain i gat maket long salim ol kaikai we ol i tuhat long kamapim," em i tok.

Dispela wanbel pasin i bin kamap long taim ol gavana bilong Momase rijen i bin bung long Madang na lain olsem Morobe Gavana Luther Wenge husat em i Siaman bilong Mamose Gavana's Kaunsel na tu Gayana bilong Sandaun Provins Carlos Yuni i bin givim wanbel na sapot bilong ol.

**PNG hadwut diwai klostu bai pinis**



**KLOSTU PINIS:** I gat bikpela laik tru long dispela Merbau diwai bilong mekim ol floa bilong haus, na em i klostu pinis nau. Dispela i soim ol merbau diwai i lot i stap long Indonesia. **Poto: GREENPEACE**

BIKPELA envoironmen grup, Greenpeace i tok pasin Saina i mekim long laikim tumas hadwut diwai bilong Papua Niugini (PNG) i mekim dispela diwai em klostu bai pinis olgeta.

Greenpeace i bin tok Saina i save baim klostu 60 tausen kubik mita bilong dispela diwai las yia na planti ol i tok i save kisim hait i go aut long PNG na Indonesia.


Dwai Merbau, ol i save yusim long mekim floa bilong ol haus long kantri yet na ol i save salim ol tu i go long Amerika, Kenada, Siapan, Australia na

Yurop. Greenpeace i bin tok bikpela laik tru long dispela diwai long Saina, Yurop, Not Amerika na Esia Pasifik i mekim dispela diwai klostu bai pinis.

Kain sindaun bilong ekonomi we i no gro tumas na sot long ol kain diwai olsem long ol bus, i lukim Saina i kamap olsem kantri i save baim moa ol diwai wantaim tu merbau.

- Radio Australia Nius

**Cat® Skid Steer Loaders 'B' Series**



Engine performance and operator comfort maximise production.

216, 226, 228, 232, 236, 242, 248, 252, 262, 268

**Smooth, Easy Controls**

- Two hydraulic joystick controls require only minimum wrist/hand movement, greatly reducing operator fatigue.
- Auxiliary hydraulics are actuated by a thumb-operated rocker switch on the joystick.
- Hand-throttle allows you to run at a constant speed, or an accelerator pedal can be used during load and carry, excavating or backdragging.

**Operator Comfort**

- Optional suspension seat adds operator comfort.
- Clear view of the work tool reduces operator fatigue and increases productivity.

**Power and Versatility**

- The Cat 3034 Engine is proven and reliable.
- Powerful hydraulics deliver outstanding lift and breakout forces.

Hastings Deering



PORT MORESBY  
Spring Garden Road, Hohola, PNG  
Ph: (675) 300 8300 - Fax: (675) 325 0141

	PHONE	FAX
LAE	472 2355	472 1477
TABUBIL	548 9162	548 9155
RABAUL	982 1244	982 1129
LHIR	986 4105	986 4107
KIMBE	983 5144	983 5144

Product People Commitment.

We deliver.



# Broncos kirap nogut long Titans

BRISBANE Broncos i bin kirap nogut tru taim nupela NRL tim, Gold Coast Titans i winim ol 28-16 long Suncorp stadium las wik Fraide.

Dispela em i namba 4 lus bilong Brisbane long NRL dispela yia na wanpela win bilong ol tasol i kam long raun 4 gem bilong ol agensim Sydney Roosters.

Broncos i mas painim gem bilong ol dispela wiken taim ol i bungim Newcastle Knights long energy Australia stadium.

Tasol ol Knights tu bai no inap givim sans bilong wanem ol bai pilaim dispela gem long

soim laspela respek long nambawan pilaia bilong ol, Andrew Johns.

Tasol sapos beklain bilong Broncos i paia bihainim ol strongpela ron bilong ol fowet bai ol inap long bagarap pati bilong Knights.

Titans bai bungim Sea Eagles long Brookevale na ol tu bai gat bikipela nait long hap.

Gem bilong Titans na Broncos em i nupela salens long NRL we i lukim tupela tim bilong Queensland yet i brukim bun.

Tasol Titans i no givim sans long bikipela brata bilong ol long ai

bilong 47, 686 manmeri husat i kamap long luk-luk.

Dispela i bin hom graun gem bilong Titans tasol ol i kisim i go pilai long hom graun bilong Brisbane bilong wanem ples bilong ol i no redi yet.

Sapot bilong ol Titans sapota tu i winim bilong Brisbane na i givim hevi tu long ol biknem pilaia bilong Brisbane olsem kepten Darren Lockyer.

Na dispela wiken i no luk olsem gem bilong ol bai go isi moa.

Broncos nau i stap namba 13 long pions leda wantaim 2 pions na Titans i stap namba 7 wantaim 6 pions.

# Frans sapatim soka developmen long PNG

Andrew Molen i raitim

FRANCE gavman long Trinde dispela wik i sainim wanpela tok orait (MOA) wantaim Osenia Futbol Konfederesen (OFC) long ol bai sapatim developmen bilong soka long PNG.

Sainim bilong dispela tok orait i kamap long wankain taim dispela OFC anda-12 yut soka festival i wok long kamap long Mosbi.

Dispela bai lukim ol i putim ol bai givim (Yuro) €6, 000 long dispela tonamen long PNG olgeta yia we dispela bai helpim tru developmen bilong soka long kantri.

"Astingting bilong mipela long dispela progrem em i no long kamap wol sempion tasol long skulim ol manki bilong yumi, long bungim ol na wok wantaim ol," presiden bilong OFC Reynald Temarii tok.

Embeseda bilong Frans (France), Patrick Boursin i tok Frans gavman i amamas long helpim bilong wanem soka i strong long kantri bilong ol na tu siaman bilong OFC, Temarii na man i makim FIFA long dispela tonamen, Christian Karambeu em ol i kam aninit long France.




SOKA DEVELOPMEN: France Embeseda Patrick Boursin (lephan), Reynald Temarii, PNGFA Presiden David Chung na Christine Karambeu soim sapat bihain long ol i sainim MOA.

Long dispela as ol i laik helpim ol long developim soka insait long PNG na Osenia rijen na helpim ol manki long kisim gutpela edukesen na kamap gutpela manmeri long komyuniti.

"Antap long dispela, France gavman bai givim wanwan skul husat i kisim wanwan ol tim bilong narapela husat i kam long dispela tonamen, wanwan kompyuta," Mista Boursin i tok.

Em i tok ol i makim ol manki wantaim 12-pela krismas bilong wanem em i gutpela long statim ol taim ol i liklik yet bai ol i ken kamap ol gutpela pilaia taim ol i bikipela.

"Long rijinel level nau mipela i stat long 12-pela krismas tasol mipela i lukluk nau long statim ol long pilai long 6-pela krismas i go inap long 16 krismas," Temarii tok.



HAT TASOL: Brent Tate bilong Brisbane i painim hat long brukim difens bilong Luke Bailey (lephan), Anthony Lafranchi na Michael Henderson bilong Titans las wik long Brisbane. POTO: AAP image/Colin Whelan/Action Photographics.

# Olgeta spots i mas save long HIV/AIDS

Andrew Molen i raitim

OLGETA spots insait long Papua Niugini i mas save long HIV/AIDS na olgeta administreta na ofisol bai kisim trening long save moa long dispela.

Dispela em i astingting bilong Nesenel Olimpik Komiti bilong PNG na Pasifik na tu intanesenel olimpik komiti.

Long dispela astingting bai ol i kamapim wanpela bung o trening woksop long skulim ol manmeri long wanem kain wok ol inap mekim insait long spots long helpim long surukim toktok bilong HIV/AIDS.

Nau yet 11-pela bilong 16 olimpik komiti long Pasifik i tok klia olsem ol bai kamap long dispela bung we bai stat long Crown Plaza long Mosbi tete (Fonde) na pinis long Sarere.

"Mipela i makim spots olsem wanpela rot long kisim toksave bilong dispela HIV/AIDS i go aut bilong wanem spots i gat gutpela wokbung namel long ol yet.

"Spots i gat gutpela pasin bilong harim tok (disiplin), ol i save gut long pasin bilong wokbung na ol i no save bagarapim ol arapela husat i gat dispela sik nogut," Steven Vete bilong UNAIDS Esia Pasifik Ildasip forum

bilong HIV/AIDS na developmen long Suva, Fiji, i tok.

Em i tok ol i statim dispela trening bihain long wanpela bung bilong ol minista long 2001 we i painim olsem ol lida i no save wok strong tumas long daunim hevi bilong HIV/AIDS.

"Long hap mipela i tingting long kisim dispela toktok i go insait long spots," Vete i tok.

5-pela eria ol i lukluk long kisim toktok bilong HIV/AIDS i go em politiks, ol sios, Bisnis, Midia na ol meri.

"Namel long dispela ol grup em i gat ol yut na ol lain husat i gat sik HIV/AIDS," Vete i tok.

Na spots em i samting we ol bai yusim long kisim toktok i go long dispela ol grup.

Sekreteri Jenerel bilong PNG Spots Federesen Sir John Dawanicura i bilip spots em i wanpela rot we bai kisim toksave i go long olgeta yet.

"Dispela ol trening bai kamap wantaim helpim bilong Nesenel AIDS Kaunsel na ol arapela ogenaisesen," Sir John i tok.

Em i tok ol bai mekim olgeta spots federesen i mas makim wanpela ofisol long kamap long dispela trening.



## LAW AND JUSTICE SECTOR East Sepik Province Court Exhibition

Dispela toksave i go long ol pipol bilong East Sepik Province olsem bai igat wanpela kot eksibisin ol Kot na ol narapela dipatmen insait long lo na jastis bai wokim kamap.

**Date:** Mande namba 30 de bilong mun Epril i go inap long Fraide namba 4 de bilong mun Mei stat long 8 kilok long olgeta moning.

**Ples bilong eksibisin:** Prince Charles Oval, Wewak

Mipela askim ol skul pikinini, ol man na meri i wokim wok bilong lo na jastis insait long provinsol, distrik na komyuniti level na ol jenerel pablik long kam long dispela eksibisin na painimaut long wok bilong wanwan dipatmen insait long lo na jastis.

Kam na lainim long wei bilong go long Kot tu.

Yu bai gat taim long askim kwestin na kisim ol fri infomesin pepa.

Ol lo na jastis dipatmen husat bai stap long dispela eksibisin em ol lain long Kots (ol Suprim, Nesenel na Distrik Kots), Polis, Welfea, Koreksenel Sevises, Ombudsmen Komisin, Parol Opis, Pablik Solisita, Pablik Posekiuta, Atoni Jenerel na East Sepik Women Against Violence.

Long moa toksave plis ringim:  
Kuskus bilong Kot, Wewak Distrik Kot  
long telepon 856 2319 o 856 2251 o Leslie Kolis long 321 7661  
o kam long Kot Haus long Wewak na toktok long ol wokman na meri bilong Kot Haus.



**DAI HAT SAPOT:**  
 Timox Hama (Iephan),  
 Gilbert Ariko na Danny  
 Hari bilong Sauten  
 Hailens i wokabaut  
 long Lae i go long  
 Popondetta na bihainim  
 Kokoda trek i kam long  
 Pot Mosbi long lukim  
 namba wan SP kap gem  
 namel long tim bilong ol,  
 M&J Muruks na Brian  
 Bell Bulldogs. Tripela i  
 bikpela sapota tru bilong  
 Muruks  
 na i bin wari tru taim  
 tim bilong  
 ol i lus 19-12.



**PAWA RAN:** M&J Muruks kepten Joseph Omai mekim wnapela strong ran bilong agensim takol bilong Benjamin John bilong Brian Bell Bulldogs long Pot Mosbi las wik Sande. 'Dogs i win 19-12.

**MI NO AUT:** Demas  
 Tovia bilong PNG Power  
 i lukluk long pilai bilong  
 Brown Eagles tai mem i  
 tasim em wantaim bal  
 tasol man ya i tok em i  
 no aut.



**OL POTO:**  
 Andrew Molen.



**PUTIM HAN:** Dispela tupela pilai bilong Kina 1 (raithan) na BSP 1 i pait long kisim bal long praivet kampani netbol gren fainol long Pot Mosbi las wik Sande, Kina i win.



**NATIONAL CAPITAL DISTRICT COMMISSION**  
*Department of Regulatory Services*  
*Licensing Division.*

**PUBLIC NOTICE**

The public within the NCD, particularly those residing within the close vicinity of the location indicated below are advised that the following new applications for liquor license have been received. Your views are sought in writing **no later than 24th April 2007**, to the licensing manager **CJ- P.O Box 7270, BOROKO.**

No	Name & Address of Premises	Location Lot/Sect	Street	Suburb	Class of license	Electorate
1	Benj Holdings Intl Ltd P.O Box 682 Gordons, NCD	38/33	Off Waigani Drive	Steamships Company Waigani	Restaurant	Moresby North East
2	The Curve Ltd P.O Box 7665 Boroko	58/05	Off Okari Street	Boroko	Restaurant	Moresby North East
3	PNG Nambawan Trophy P.O Box 4391 Boroko	23/404	Off Okari Street	Boroko	Restaurant	Moresby North East
4	The Uro Urcino Ltd P.O Box 6266	19/111	Hubert Murray H/way	Koki	Bottle Shop	Moresby South
5	Sekiya Aiyako	01/279		Erima	Bottle Shop	Moresby South

**AMBROSE TOUA**  
 Acting City Manager

POMRFL		Sande Epril 22, 2007	
Sarere Epril 21, 2007		Oval 1	
Raun 11		Gem 2	
PRL 1		09:20	Fisika vs Dogura Rats W/Pool C
10:00	Souths vs Waliya U19	10:00	Junction vs Leftovers W/Pool D
11:00	West vs Dobo Warriors A	10:40	Texas vs BS Mixmates M/Pool B
12:30	Souths vs Waliya A	11:20	KLS vs Outsiders M/Pool A
02:00	Brothers vs Puma A	12:00	Kaypee vs Madeka W/Pool C
03:30	Paga vs hawks A	12:40	Naron vs Junction M/Pool B
		13:20	K Imindos vs D Rats M/Pool A
PRL 2		14:00	Gara Utd vs BFC Granville W/Pool D
09:00	Magani vs Butterflies U19	14:40	Mixmates vs Levale W/Pool C
10:00	Brothers vs Puma U19	15:20	Nalas vs Kawa M/Pool A
11:00	Tarangau vs Royals U19	16:00	Levale vs Mixmates M/Pool A
12:00	Kobe Tigers vs Defence B		
01:30	Tarangau vs Royals B		
03:00	Paga vs Hawks B		
		Oval 2, Gem 2	
		09:20	Graveside vs K Imindos M/Pool A
Sande Epril 22, 2007		10:00	Kawa vs Nalas W/Pool C
PRL 2		10:40	Nen Konok vs Namisini W/Pool D
09:30	Kone Tigers vs Defence U19	11:20	Gara Utd vs Nen Konok M/Pool B
10:30	West vs Dobo Warriors U19	12:00	KLS vs Graveside W/Pool C
11:30	Brothers vs Puma U19	12:40	Madeka vs Fisika M/Pool A
PRL 3		13:20	Leftovers vs Namisini M/Pool B
09:30	Souths vs Waliya B	14:00	K Imindos vs outsiders W/Pool C
11:00	Magani vs Butterflies B	14:40	Naron vs Kian W/Pool D
12:30	West vs Dobo Warriors B	15:20	Kian vs BFC Granville M/Pool B
		16:00	BS Mixmates vs Texas W/Pool D
PRL 1			
09:30	Paga vs Hawks U19		
10:30	Kone Tigers vs Defence A		
12:00	Magani vs Butterflies A		
01:30	Tarangau vs Royals A		
03:00	BB bulldogs vs P Warriors SPC		

**Toksave: Bai gat gem long Sarere tu tasol dro bilong ol i no kamap long hla.**

**Morobe Dvelopmen Soka Asosiesen**



# Pawa lifting mekim promis

Andrew Molen i raitim

**PNG Pawa Lifting Federesen i mekim promis long Gavana bilong Nesanel Kapitel Distrik (NCD) Wari Vele olsem ol bai traim hat tru long win na kisim gol medol i kam bek long bekim helpim bilong em long ol.**

Vais Presiden bilong PNG Pawa Lifting Federesen Frank Robby i tok dispela taim ol i kisim K10, 000 sek mani long Vele long Mosbi long Mande.

"Mipela bai mekim Mista Vele i pilim olsem dispela mani em i givim i no go nating.

"Mipela bai lukim tru olsem

mipela i winim gol," Robby i tok.

Em i tok helpim bilong Vele i kam long taim we ol i bungim bikipela hevi tru long baim ol levi fi bilong ol pilaia bilong ol husat bai go long Arafura na Saut Pasifik Gems dispela yia.

"Olgeta taim mipela i laik go pilai, levi fi tasol em i wanpela bikipela hevi bilong mipela.

"Planti bilong ol pilaia i no wok o i wok tasol i no save kisim bikipela mani na planti taim mipela i save painim hat," Robby i tok.

Em i tok ol save raitim ol sponsasip pas bilong ol tasol i nogat wanpela gutpela sam-

ing i save kamap.

Dispela yia wan wan pilaia i mas baim K2000 levi fi na dispela helpim bilong Mista Vele bai rausim hap bilong dispela hevi, Robby i tok.

Eksekutiv Opisa bilong Mista Vele, Leonard Brian i tok ol i amamas long helpim Federesen bihain long ol i harim long hevi bilong ol.

"Mista Vele em i man bilong laikim spots na em i laik helpim," Brian husat i makim Vele long presentesen i tok.

Em i tok opis bilong Mista Vele i givim planti helpim pinis long spots na ol bai givim sampela moa dispela yia.

Brenda Goro, wanpela memba bilong dispela spot i tok em i gutpela long gavman i givim kain helpim bilong wanem em bai helpim planti ol yangpela manmeri.

"Gavman i mas givim moa sapot long olgeta spots, i no pawa lifting tasol," em i tok.

Las wik, Mista Vele i givim K30, 000 long kikkboxing na nau K10, 000 long pawa lifting.

Mipela i gat mani bilong spots i stap na taim ol spots i rait i kam mipela i save sindaun na skelim gut bipo mipela i givim ol. Mipela i no lukluk long wanpela spots tasol, mipela i laik helpim olgeta yet, Brian i tok.



## SPOT RAUN wantaim

### SCOTT VAVINE ML

#### OFC tonamen gutpela bilong PNG soka

PAPUA Niugini soka federesen na Osenia futbol konfederesen (OFC) i mekim gutpela wok long kisim dispela tonamen bilong anda-12 soka festival i kam long graun bilong yumi yet long PNG dispela wik. Sampela bai askim olsem dispela bai kisim wanpela, gutpela samting i kam long sait bilong developmen bilong dispela gem.

Orait long dispela, yumi lukluk gut long dispela tonamen na wanem ol gutpela samting em bai kisim i kam long soka na kantri wantaim.

Planti bai tok olsem dispela em tonamen nating we ol tim bai pilai sampela de long kisim taitol.

Tasol nogat, em bai kisim planti gutpela samting tu olsem,

"Em i givim sans long kantri bilong yumi long soim kalsa bilong yumi, ol pipol na komyniti wantaim.

"Raun bilong ol tim i go long ol skul tu i givim nupela ekspirians long laip bilong ol skul manki we ol i gat sans long bung wantaim ol arapela wan lain bilong ol long ol arapela kantri.

Long sait bilong sosol stadi bilong ol, dispela bai helpim ol long lainim nupela samting long ol nupela poro bilong ol na bihain taim ol i ken go i kam na lukim ol long ples bilong ol.

Long sait bilong spots, yes, em i helpim tru long apim laik bilong ol manki long pilai spots na wanpela de ol i ken makim kantri bilong ol.

"PNGFA nau i ken lukluk long dispela tonamen long opim rot bilong ol long kisim moa teknikel developmen program long helpim olgeta teknikel eria bilong dispela spot. Dispela bai strongim tu wokbung namel long ol ofisol bilong PNGFA na OFC.

"Dispela tonamen tu bai helpim gut ikonomi bilong kantri. I no long sait bilong spots tasol, tasol em i helpim tu ol bisnis sekta.

"Ol wokmanmeri tu i kisim gutpela save na ekspirians long kamapim na ronim kain bikipela tonamen olsem. Dispela ol save na ekspirians ol i kisim bai helpim ol long kamapim wanpela gutpela moa kain tonamen olsem bihain taim.

## Gem bilong mipela

PLANTI mangi nau i gat sans long pilai gem ol i save laikim na ol i ken tok amamas long PNGRFL na Siaman bilong Skul Bois Ragbi Lig, Iffysoe Segeyaro.

Na wantaim kam bek bilong SP Kap kompetisen, dispela i strongim tru sapot bilong ol manmeri na ol mangi husat i save bihainim tru ol fevret tim na pilaia bilong ol long SP Kap na Nesanel Ragbi Lig (NRL) long Australia wantaim.

Igive "Menji" John, William Moni na Desmond Joe em tripela manki husat i save pilai skul bois ragbi lig na tripela i tok ol i laik kamap biknem pilaia bilong PNG bihain taim.

Tripela wantaim i save pilai long anda-12 divisen long Mosbi, John i mekim gret 2 long New Erima Praimeri Skul, Moni mekim gret 3 long Hohola Demonstresen Skul na Joe tu i mekim gret 3 long St Peters Praimeri Skul.

Wantok Niuspepa i bungim dispela tripela mangi taim ol i ron olsem bol boi long raun wan SP Kap gem namel long M&B Muruks na Brian Bell Bulldogs long Mosbi las wik Sande.

Tripela mangi wantaim bilong Tari long Sauten Hailans Provins na dispela de i givim sans long ol i lukim sempion tim bilong provins bilong oi, Mendi Muruks.

Fevret pilaia bilong John em Menji Yere long SP Kap na Matt King long NRL, Moni save laikim Geno Kima na Anthony Minichiello na bilong Joe em Joseph Omai na Jonathan Thurston.

"Mipela i gat bikipela laik stret long gem na mipela i laik pilai long SP kap bihain taim," John i tok.


Segeyaro i bin tok skul bois ragbi lig i go bikipela dispela yia we i lukim sampela moa provins i joinim kompetisen.

Dispela kompetisen i bin pinis tasol Segeyaro i strong na kisim i kam bek long 2005 bilong wanem em i bilip gem bai strong moa sapos developmen i stat wantaim ol mangi.

Nau yet ol PNG skul boi tim i kamapim ol gutpela risal long ol intanesenel gem na dispela i soim olsem astingting bilong skul bois ragbi lig i wok long karim kaikai.



LAIKIM GEM: Igive John (Ilephan), William Moni na Desmond Joe i gat tingting long kamap ol biknem pilaia bilong PNG bihain taim.



PAWA: Wanpela pawa lifting etlit i soim ol ofisol bilong NCD long wanem samting pawa lifting inap mekim long spots bilong ol.

# Krismas i winim ol ragbi refri

Sape Metta i raitim


WE stap ol yangpela na fit refri husat i ken i go pas long ol ragbi lig pilai long wan wan senta long PNG?

Dispela em i wanpela bikipela askim wanpela bipo biknem ragbi lig pilaia na refri bilong Papua Niugini (PNG) long Goroka, Isten Hailans Provins, husat i no laik tokaut long nem bilong em i mekim.

Em i tok long lukluk bilong em planti ol sinia refri em ol i abrusim pinis mak bilong krismas bilong ol long wok olsem refri bilong ol ragbi lig kompetisen long kantri.

Dispela bipo refri i tok planti ol refri nau husat i save lukautim ol gem i no fit moa bilong wanem ol i lapun pinis na ol i no strong olsem bipo taim ol i stat.

"Long lukluk bilong mi, mi luksave olsem ol sinia refri olsem Moses Tolingling, Sari Fareho



GO: Moses Tolingling, wanpela sinia refri bilong PNG i salim wanpela pilaia i go aut long gem long SP kap las yia. FAIL POTO.

na Tony Kuni (POMR-FL), Luxie Metta (Lae lig), Saea Kavora (Madang lig), Willie Tovebae (Goroka lig) na ol arapela em krismas i winim ol pinis tasol ol i go het yet long mekim wok refri," dispela bipo refri i tok.

Em i tok, "I tru olsem dispela ol refri em ol i gat planti ekspirians long ronim ol gem tasol ol i abrusim taim bilong ol olsem na ol i mas tingting long sanap i go long sait na givim sans

long ol yangpela refri." Dispela ol sinia na ekspirians refri em krismas bilong ol i stap nabaut long 45 na i go antap long 50. Na we stap ol yangpela refri husat bai kamap na kisim ples bilong ol dis-

pela sinia refri, em i tok.

I gat bilip olsem i gat planti yangpela man i stap husat i laik kisim refri trening kos na ronim ol gem tasol i nogat wanpela, gutpela hap i stap long kisim dispela kain ol man na trenim ol.


Em i tok dispela kain ol tingting i stap tasol we stap ol otoriti olsem PNG Spots Komisen (bipo Spots komisen) na PNGRFL husat ol bai ken kamapim trening kos bilong ol refri.

Em i taim bilong ol atoriti olsem PNGSF na PNGRFL long kamapim kain trening bilong ol yangpela refri.


"Yumi no inap sidaun tasol na lukluk long ol refri husat i gat 40 na 50 krismas i go het long ronim gem.

"Tingim, yumi ken wokhat long trening na pilai tasol sapos i nogat refri bai gem i no inap kamap," dispela refri i tok.





# WANTOK SPOTS



Isu 1708

Wan wik: Fonde Epril 19-25, 2007

## Bulldogs i gat wok long 2007

Andrew Molen i raitim

BRIAN Bell Bulldogs bilong Pot Mosbi gat wanpela tingting long SP kap kompetisen long 2007 sisen-em long kisim kap i kam bek long Mosbi.

Oi i laik soim ol arapela tim olsem ol i no inap givim sans dispela sisen.

Bulldogs kepten, Thomas Ninkama i tok las wik Sande bihain long raun wan gem bilong ol egensim M&J Muruks long Pot Mosbi olsem ol i luksave long ol asua bilong ol las yia na dispela sisen ol i laik stretim.

"Las yia mipela i gat sampela hevi long gem bilong mipela tasol nau mipela i gat bilip long mipela yet na tingting bilong mipela i strong long pilai," em i tok.

Bulldogs i kam bek strong long namba tu hap bilong gem long winim ol 2006 primia, 19-12.

"Mipela i pasim tok olsem mipela ol pilaia bilong Mosbi gat planti gutpela samting long yusim long trening na pilai olsem na mipela i mas soim dispela long gem bilong mipela.

"Mipela ol Mosbi pilaia i mas givim olgeta save na strong bilong mipela long ol gem long kisim dispela kap i kam bek long Mosbi," Ninkama i tok.

"Mipela i no difen gut na mipela i givim sans long ol tu wantaim ol lus bal," Muruks kepten Joseph Omai tok.

"Mipela i save ol tim bai kam strong long mipela dispela yia tasol nau mipela i lukfowet tasol long narapela gem," Omai tok.

Ninkama i tok tu olsem gutpela kika em bikpela samting long gem na ol i gat tupela olsem Benjamin John na Emmanuel Palme

Muruks bai kisim Toyota Mioks long Madang na Bulldogs bai skelim Pagini Warriors long Pot Mosbi dispela Sande.

INSAIT

Broncos i no painim gem bilong ol yet

Pes 25

Moa gren fainol stori na piksa long wiken

Pes 26

Pawa lifting promisim Gavana Vele

Pes 27



# Oi yut i gat sans

...wol kap pilaia laikim moa i go pilai ovasis



PHOTO: Andrew Molen

SALENS: Sigi Wolfgang bilong PNG tim 3 i laik ronawe long Alfred Bobby bilong Solomon Ailan long gem 1 bilong ol long PRL long Trinde dispela wik tasol Bobby i putim ai gut long em.

Andrew Molen i raitim

CHRISTIAN Karambeu, wanpela intanesenel soka pilaia bilong New Caledonia i laik lukim planti moa pilaia bilong ol pasifik kantri olsem PNG i go pilai ovasis.

Karambeu husat i bin stap long 1998 wol kap tim bilong France taim ol i winim wol kap long dispela yia i tok em i laki long go long dispela kain levon na ol arapela yangpela pilaia i mas wokhat tu long kamap olsem.

"Yumi gat olgeta save na strong tasol olgeta tingting na bel bilong yumi mas pas tru long gem bilong yumi bai yumi nap long kamap olsem ol bikpela tim na pilaia long Yurop na arapela hap long wol," Karambeu i tok.

Em i tok wanpela rot em long developim ol yangpela pilaia taim ol i liklik yet bai ol i ken kisim gutpela luksave.

"Oi i mas lainim tu

long harim tok na bihainim ol lo bilong gem na wanem kantri ol i stap long en," Karambeu husat i kamap long Pot Mosbi long Tunde dispela wik i tok.

Em i makim OFC long dispela anda-12 soka yut festival we i stat long Pot Mosbi long Trinde Epril 17 na bai go inap long Fraide Epril, 20.


"Mi kam long soim sapot na helpim long promotim na tu skulim ol manki long gem," Karambeu i tok.

Kantri husat i win bai go pilai agensim ol arapela kantri long Europe.

"Dispela em i bikpela sans bilong ol manki long go pilai long Europe bilong wanem planti ol bikman bilong soka bai stap na lukluk," Karambeu i tok.

Karambeu i tok em yet i no bin i gat sans long stap insait long kain tonamen taim em i liklik tasol ol dispela yut i gat bilong sans na ol i mas kisim olgeta sapot.

## TOKSAVE IKAM LONG




Mipela bai lukautim insurens wari bilong

- Haus na samting insait long haus
- Kar na PMV wantaim
- Bisnis (liklik na bikpela wantaim)

Mipela bai stretim olgeta insurens wari bilong yu

Lukim mipela nao



Richard Kassman  
General Manager



Wayne Gembol  
Chief Underwriter

or go lukim  
Insurens Broka bilong yu

Level 3 Pacific Place, Cnr Musgrave Street & Champion Parade  
PO Box 1383, Port Moresby Telephone: (675) 321 0127 / 321 1263 Fax: (675) 321 1386 Email: r.kassman@inspacpng.com.pg

Publisher of the newspaper operates at Section 58, Allotment 3, Office 2, Waigani Drive



# Wantok

Digitized version made available by



**Copyright:** Under copyright

**Rights Holder:** Word Publishing Company Limited

**Use:** This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

**Constraints:** This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

**Note on digitized version:** Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.